

ANG SIMBAHAN NI JESUKRISTO SA MGA SANTOS SA ULAHING MGA ADLAW • HULYO 2014

# Liahona

**Pagkaginikanan  
sa Mga Young  
Adult, p. 34**

**Brazil: Usa Ka Siglo sa  
Pagtubo, p. 18**

**Pagtan-aw sa Manluluwas  
diha sa mga Simbolo, p. 52**



*“Usahay kita ang focus, ug atong dawaton ang ‘pagbugal-bugal’ sa paghupot sa mga sumbanan sa Dios ug paghimo sa Iyang buhat. Mopamatuod ko nga dili kita angayng mahadlok kon kita nakagamot sa Iyang doktrina. Tingali kita makasinati nga dili masabtan, pagpanaway, ug gani sayop nga pag-akusar, apan wala kita mag-inusara. Ang atong Manluluwas ‘gitamay ug gisalikway sa mga tawo’ [Isaias 53:3]. Sagrado natong pribilehiyo nga mobarug uban Kaniya!”*

Elder Robert D. Hales sa Korum sa Napulog Duha ka mga Apostoles, “Lig-ong Mobarug sa Balaan nga mga Dapit,” *Liahona*, Mayo 2013, 50.



**MGA MENSAHE**

- 4 Mensahe sa Unang Kapangulo-  
han: Ang Saad sa Pagpabalik sa  
mga Kasingkasing**  
Ni Presidente Henry B. Eyring
- 7 Mensahe sa Visiting Teaching:  
Ang Balaan nga Misyon ni  
Jesukristo: Manlalaban**

**LABING IMPORTANTING  
MGA ARTIKULO**

- 18 Mga Pioneer sa Matag Yuta:  
Ang Simbahan sa Brazil:  
Ang Umaabut Miabut sa  
Katapusan**  
Ni Mark L. Grover  
*Ang Simbahan sa Brazil mitubo  
gikan sa usa ka gamay nga pamil-  
yang langyaw ngadto sa sobra sa  
usa ka milyon ka mga miyembro.*

**NAA SA HAPIN**

Atubangan: Paghulagway sa litrato pinaagi  
ni Cody Bell. Sulod sa atubangang hapin:  
Gilitratohan © Robert Harding World Imagery/  
Corbis.

- 24 Ang Basahon ni Mormon, ang  
Pagpundok sa Israel, ug ang  
Ikaduhang Pag-anhi**  
Ni Elder Russell M. Nelson  
*Ang Basahon ni Mormon mao  
ang instrumento sa Dios sa pagta-  
bang sa pagtuman sa duha ka  
balaang mga tumong.*

- 30 Magpakahisama ni Ammon**  
*Ang istorya ba ni Ammon maka-  
tabang ninyo sa pagpaaktibo sa  
mga miyembro sa inyong ward  
o branch?*

- 34 Napulo ka mga Kasayuran  
alang sa mga Ginikanan sa  
mga Young Adult**  
Ni Wendy Ulrich  
*Kining 5 ka mga hagit ug 10 ka  
mga sugyot makatabang ninyo  
nga makasabut sa inyong mga  
anak nga young adult.*

**MGA DEPARTAMENTO**

- 8 Notebook sa Abril 2014  
nga Komperensya**
- 10 Unsa ang Atong Gituohan:  
Nagtudlo Kita pinaagi sa  
Gahum sa Espiritu Santo**
- 12 Pagserbisyo diha sa Simbahan:  
Paggiya Sama sa Manluluwas**  
Ni Ryan Carr
- 14 Ang mga Propeta sa Daang  
Tugon: Elijah**
- 15 Pagtudlo sa Alang sa Kalig-on  
sa mga Kabatan-onan: Trabaho  
ug Pagpaningkamot sa  
Kaugalingon**
- 16 Mga Balita sa Simbahan**
- 38 Mga Tingog sa mga Santos sa  
Ulahing mga Adlaw**
- 80 Hangtud Kita Magkita Pag-usab:  
Ipunting ang Inyong mga Mata  
diha sa Baybayon**  
Ni Richard M. Romney  
*Kamo walay kapaingnan kon  
kamo mag-focus sa mga balud.*

42



- 42 Pagkahimong Hingpit diha kang Kristo**  
Ni Elder Gerrit W. Gong



*Tan-awa kon imo bang makit-an ang Liahona nga gitago dinhi niini nga isyu Timaan: Pilia ang purple nga mga bulak.*

- 48 Balaang mga Pakigsaad Maka-himo og Lig-ong mga Kristiyano**  
Ni Elder D. Todd Christofferson  
*Sa unsang paagi kita makaangkon sa moral ug espirituhanong gahum?*

- 52 Unsay Inyong Nakita?**  
Ni David A. Edwards  
*Tan-awa og maayo ang mga ordina sa ebanghelyo. Mahimong makat-on kamo og butang nga bag-o.*

- 55 Atong Luna**

- 56 Alang sa Kalig-on sa mga Kabatan-onan: Trabaho — Kinsay Nagkinahanglan Niini?**  
Ni Randall L. Ridd

- 58 Pagbalhin og Tubo gamit ang Lapukon nga Sapatos**  
Raymond M. Allton  
*Gikapoy pa kaayo ko tungod sa akong trabaho sa buntag sa dihang ang akong quorum adviser miabut.*

- 60 Mubo ug Direkta**

- 61 Poster: Ang mga Butang Usahay Lahi Kay Sa Atong Nakita**

- 62 Pagerbisyo alang sa Sakto nga mga Rason**  
Rasem Maluff  
*Duna koy nindot nga kaugmaon sa football. Kinahanglan ba gayud moserbisyo ko og misyon?*

- 64 Ang mga Mormon Nagtuo Gyud sa Dios**  
Brenda Hernandez Ruiz  
*Sa dihang akong gisultihan ang babaye nga usa ko ka Mormon, dili na siya gusto nga makig-istorya nako.*

70



- 66 Linain nga Saksi: Unsa ang atong mahimo aron takus sa Espiritu?**  
Ni Presidente Boyd K. Packer

- 67 Ang Akong Leksyon kabahin sa Hugot nga Pagtuo**  
Ni Emma R.  
*Usa ka liso sa melon nagtudlo nako kabahin sa hugot nga pagtuo.*

- 68 Ang Akong Lawas Usa ka Templo**  
Ni Marissa Widdison  
*Aduna ka bay mga pangutana mahitungod sa imong lawas?*

- 70 Pagdala sa Primary ngadto sa Panimalay: Mahimo Kitang mga Miyembro sa Simbahan pinaagi sa Bunyag ug Kumpirma**  
Ni Jennifer Maddy

- 72 Atong Pahina**

- 73 Andam sa Pagerbisyo**  
Ni Elder Eduardo Gavarret  
*Ang tubig bugnaw gyud kaayo, apan gusto gihapon ko nga magpabunyag.*

- 74 Mga Higala sa Tibuok Kalibutan: Ako si Pedro gikan sa Brazil**  
Ni Amie Jane Leavitt

- 76 Para sa Gagmayng mga Bata: Si Sarah Milakaw ug Milakaw**  
Ni Heidi Poelman

- 81 Litrato sa Propeta: Thomas S. Monson**

64



Internasyonal nga magasin sa Ang Simbahan ni Jesukristo sa mga Santos sa Ulahing mga Adlaw nga giimprinta sa Cebuano

**Ang Unang Kapanguloan:** Thomas S. Monson, Henry B. Eyring, Dieter F. Uchtdorf

**Korum sa Napulog Duha ka mga Apostoles:**

Boyd K. Packer, L. Tom Perry, Russell M. Nelson, Dallin H. Oaks, M. Russell Ballard, Richard G. Scott, Robert D. Hales, Jeffrey R. Holland, David A. Bednar, Quentin L. Cook, D. Todd Christofferson, Neil L. Andersen

**Editor:** Craig A. Cardon

**Mga Adviser:** Jose L. Alonso, Mervyn B. Arnold, Shayne M. Bowen, Stanley G. Ellis, Christoffel Golden

**Tigdumalang Direktor:** David T. Warner

**Direktor sa Operasyon:** Vincent A. Vaughn

**Direktor sa mga Magasin sa Simbahan:** Allan R. Loyborg

**Business Manager:** Garff Cannon

**Tigdumalang Editor:** R. Val Johnson

**Luyo-Luyo sa Tigdumalang Editor:** Ryan Carr

**Team sa Pagsulat ug Pag-edit:** Brittany Beattie, David Dickson, David A. Edwards, Jennifer Grace Fallon, Matthew D. Flitton, Mindy Raye Friedman, Lori Fuller, Garrett H. Garff, LaRene Porter Gaunt, Michael R. Morris, Sally Johnson Odekirk, Joshua J. Perkey, Jan Pinborough, Richard M. Romney, Paul VanDenBergh, Marissa Widdison

**Tigdumalang Direktor sa Art:** J. Scott Knudsen

**Direktor sa Art:** Tadd R. Peterson

**Team sa Pagdesinyo:** Jeanette Andrews, Fay P. Andrus,

Mandie M. Bentley, C. Kimball Bott, Thomas Child, Nate Gines, Colleen Hincley, Eric P. Johnson, Susan Lofgren, Scott M. Mooy, Mark W. Robison, Brad Teare, K. Nicole Walkenhorst

**Coordinator sa Intellectual Property:**

Collette Nebeker Aune

**Tigdumala sa Produksyon:** Jane Ann Peters

**Team sa Produksyon:** Kevin C. Banks, Connie Bowthorpe

Bridge, Julie Burdett, Bryan W. Gygi, Denise Kirby, Ginny J.

Nilson, Gayle Tate Rafferty

**Prepress:** Jeff L. Martin

**Direktor sa Pag-imprinta:** Craig K. Sedgwick

**Direktor sa Pagpang-apud-apod:** Stephen R. Christiansen

**Paghubad:** Francisco M. dela Cruz

Ipadala ang subskripsyon, mga pangutana, ug mga taho ngadto sa *Dateline Philippines* sa *Liahona*, The Church of Jesus Christ of Latter-day Saints, Temple Drive, Greenmeadows Subdivision, Quetzon City 1110, Metro Manila, Philippines o sa P. O. Box 1505, Ortigas Center, Emerald Avenue, Pasig 1600, Metro Manila, Philippines. Numero sa telepono 635-9183. Presyo sa subskripsyon sa Pilipinas, P48 matag tuig, P4.00 matag gula, gawas sa mga espesyal nga isyu.

**Isumiter ang mga manuskrito ug mga pangutana**

online sa [liahona.lds.org](http://liahona.lds.org); kon ipadala ngadto sa *Liahona*, Room 2420, 50 East North Temple Street, Salt Lake City, UT 84150-0024, USA; o i-e-mail sa: [liahona@ldschurch.org](mailto:liahona@ldschurch.org)

Ang *Liahona* (usa ka termino sa Basahon ni Mormon nga nagpasabot nga "kompas o direktor") gimantala sa Albanian, Armenian, Bislama, Bulgarian, Cambodian, Cebuano, Chinese, Chinese (simplified), Croatian, Czech, Danish, Dutch, English, Estonian, Fijian, Finnish, French, German, Greek, Hungarian, Icelandic, Indonesian, Italian, Japanese, Kiribati, Korean, Latvian, Lithuanian, Malagasy, Marshallese, Mongolian, Norwegian, Polish, Portuguese, Romanian, Russian, Samoan, Slovenian, Spanish, Swahili, Swedish, Tagalog, Tahitian, Thai, Tongan, Ukrainian, Urdu, ug Vietnamese. (Ang kasagad magkalahi sa pinulongan.)

© 2014 sa Intellectual Reserve, Inc. Tanang mga katungod gigahin. Gigamit sa Ang Simbahan ni Jesukristo sa mga Santos sa Ulahing mga Adlaw nga may pagtugot. Gi-imprinta sa Tinipong Bansa sa Amerika.

Ang teksto ug biswal nga materyal diha sa *Liahona* mahimong kopyahan alang sa sulagma, dili pangkomersyo nga paggamit sa simbahan o panimalay. Ang biswal nga materyal dili mahimong kopyahan kon kini adunay mga pagdili diha sa linya sa kredito sa maong artwork. Ang mga pangutana kinahanglan ipadala ngadto sa Intellectual Property Office, 50 East North Temple Street, Salt Lake City, UT 84150, USA; e-mail: [cor-intellectualproperty@ldschurch.org](mailto:cor-intellectualproperty@ldschurch.org).

**For Readers in the United States and Canada:**

July 2014 Vol. 17 No. 7. LIAHONA (USPS 311-480) Cebuano (ISSN 1096-5114) is published monthly by The Church of Jesus Christ of Latter-day Saints, 50 East North Temple, Salt Lake City, UT 84150. USA subscription price is \$10.00 per year; Canada, \$12.00 plus applicable taxes. Periodicals Postage Paid at Salt Lake City, Utah. Sixty days' notice required for change of address. Include address label from a recent issue; old and new address *must* be included. Send USA and Canadian subscriptions to Salt Lake Distribution Center at address below. Subscription help line: 1-800-537-5971. Credit card orders (Visa, MasterCard, American Express) may be taken by phone. (Canada Post Information: Publication Agreement #40017431)

POSTMASTER: Send all UAA to CFS (see DMM 707.4.12.5). NONPOSTAL AND MILITARY FACILITIES: Send address changes to Distribution Services, Church Magazines, P.O. Box 26368, Salt Lake City, UT 84126-0368, USA.

# Mga Ideya sa Family Home Evening

*Kini nga isyu naglangkob og mga artikulo ug mga kalihokan nga magamit sa family home evening. Ang mosunod mao ang duha ka mga ideya.*



PAGHULAGWAY SA LITRATO PINAGI NI CODY BELL

## "Pagkahimong Hingpit diha kang Kristo,"

pahina 42: Gamit sa mga pagtulun-an ni Elder Gong kabahin sa pagkaperpeksyonista, paghimo og usa ka husto o sayop nga quiz alang sa inyong pamilya aron pagtabang nila nga makaamgo kon sila duna bay kalagmitan sa pagkaperpeksyonista. Mahimo mong mogamit sa pamahayag sama sa "Ako magmalipayon ra bisag maghimo og sayop" o "Lisud alang nako sa pagpasaylo sa uban" sa inyong quiz. Basaha og dungan, kon unsa ang gitudlo ni Elder Gong mahitungod sa pagsalig diha sa Manluwas. Mahimo usab ninyong gamiton ang mga pahina 177-78 sa *Isangyaw ang Akong Ebanghelyo: Usa ka Giya ngadto sa Misyonaryo nga Pangalagad* sa pagtudlo kon unsaon sa paghimo og angay nga mga tumong ug sa pagbuntog sa pagkaperpeksyonista.

## "Ang Akong Lawas Usa ka Templo,"

pahina 68: Gamita ang mga pangutana niini nga artikulo sa pagtudlo sa inyong mga anak sa pagtahud ug paghigugma sa ilang mga lawas. Mahimo kamong modalit og himsog nga mga snack, sama sa prutas o mga utanon, sa pagtudlo sa inyong mga anak mahitungod sa angayng kan-on. Mahimo kamong magdula og usa ka sport o mobuhat og kalihokan sa gawas aron sa pagtabang sa inyong mga anak nga makadayeg sa maayong panglawas ug kalagsik. Awhaga ang inyong mga anak sa pagtabang sa usa ka bata o tin-edyer sa ilang ward, branch, o eskwelahan nga may kakulangan. Mahimo usab kamong mokanta sa "I'll Walk with You" [Mouban Ko Nimo] (*Children's Songbook*, 140).

## SA INYONG PINULONGAN

Ang *Liahona* ug ubang mga materyal sa Simbahan anaa sa daghang mga pinulongan sa [languages.lds.org](http://languages.lds.org).

## MGA HILISGUTAN NIINI NGA ISYU

*Ang mga numero nagrepresentar sa unang pahina sa artikulo.*

**Basahon ni Mormon, 24,**  
30, 38, 55

**Buhat, 15, 56, 58**

**Bunyag, 52, 70, 73**

**Calling, mga, 12**

**Daang Tugon, 14**

**Espiritu Santo, 10, 40, 66**

**Family history, 4, 6, 14, 55**

**Hugot nga Pagtuo, 48, 67**

**Ikaduhang Pag-anhi, 24**

**Jesukristo, 7, 12, 42**

**Kaminyon, 41**

**Kasugaoan, mga, 60**

**Kumpirmasyon, 52, 70**

**Mahangturong panglantaw, 42, 80**

**Misyonaryo nga buhat, 18, 30, 62, 64**

**Ordinansa, mga, 52, 70**

**Pagkaginikanan, 34**

**Pagkakabig, 18**

**Pagpa-aktibo, 30, 38**

**Pagpamatuod, 64**

**Pagtudlo, 10**

**Pag-ula, 7, 42**

**Pakigsaad, mga, 24, 48**

**Pamilya, 34, 39, 40, 41, 80**

**Pioneer, mga, 18, 76**

**Pisikal nga lawas, 68**

**Propeta, mga, 14, 81**

**Sakrament, 52, 70**

**Serbisyo, 12, 56, 58, 62, 73**

**Templo, 18**

**Young Adult, mga, 34**



**Ni Presidente  
Henry B. Eyring**  
Unang Magtatambag sa  
Unang KapanguloHAN

## ANG SAAD SA PAGPABALIK SA MGA Kasingkasing

Ang akong inahan, si Mildred Bennion Eyring, nagtubo sa komunidad sa pag-uma sa Granger, Utah, USA. Usa sa iyang igsoong lalaki, si Roy, misunod sa negosyo sa pamilya sa pagpamuhi og mga karnero. Isip usa ka batan-ong lalaki siya migahin og daghang mga semana layo sa panimalay. Sa kadugayan siya nahimong dili kaayo interesado sa Simbahan. Wala madugay siya mibalhin sa Idaho, USA, naminyo, ug adunay tulo ka anak. Siya namatay sa edad nga 34 sa dihang ang iyang asawa 28 anyos ug ang ilang mga anak gagmay pa.

Bisan tuod og ang gamay nga pamilya ni Roy tua sa Idaho ug ang akong mama mibalhin og mga 2,500 ka milya (4,025 km) ngadto sa New Jersey, USA, siya kanunay misulat kanila og mga sulat sa paghigugma ug pag-awhag. Ang pamilya sa akong tiyo mapinanggaong motawag sa akong mama og “Tiya Mid.”

Milabay ang katuigan, ug usa ka adlaw niana nakadawat ko og tawag sa telepono gikan sa usa sa akong mga ig-agaw. Gisulthian ko nga ang biyuda ni Roy namatay. Ang akong ig-agaw miingon, “Si Tiya Mid gusto nga mahibalo ka.” Si Tiya Mid dugay nang namatay, apan ang pamilya mibati pa gihapon sa iyang gugma ug naningkamot sa pagpahibalo nako.

Nakapanghinuktok ko kon unsa ka dako sa tahas sa akong inahan diha sa iyang pamilya susama sa tahas sa mga propeta nga Nephite diha sa ilang mga pamilya pinaagi sa pagpabiling duol sa mga paryente nga gusto nilang tudloan sa ebanghelyo ni Jesukristo. Misulat si Nephi og rekord nga iyang gilauman nga makaimpluwensya sa mga anak sa iyang igsoong mga lalaki sa pagbalik ngadto sa tinuohan sa ilang patriyarka, nga si Lehi. Ang mga anak nga lalaki ni Mosiah nagpakita sa samang gugma samtang sila nagsangyaw sa ebanghelyo ngadto sa kaliwatan ni Lehi.

Ang Ginoo mihatag og paagi nato nga mobati sa gugma diha sa mga pamilya nga magpadayon hangtud sa kahangturan. Ang kabatan-onan sa Simbahan karon mibati sa ilang mga kasingkasing sa pagpabalik sa ilang mga pamilya. Sila nangita og mga pangalan sa mga sakop sa pamilya kinsa wala makabaton og kahigayunan sa pagdawat sa mga ordinansa sa kaluwasan niini nga kinabuhi. Sila modala niadtong mga pangalan ngadto sa templo. Kon sila moubog na sa tubig sa bunyag, sila dunay oportunidad nga mobati sa gugma sa Ginoo ug sa mga sakop sa pamilya diin sila nagpahigayon og pag-proxy nga mga ordinansa.

Nakahinumdom gihapon ko sa gugma sa tingog sa akong ig-agaw kinsa mitawag ug miingon, “Ang among mama namatay, ug si Tiya Mid gusto nga mahibalo kamo.”

Kaninyo kinsa mopahigayon og mga ordinansa alang sa mga sakop sa pamilya nagtabang pinaagi sa gugma, sama sa gibuhat sa anak nga lalaki ni Mosiah ug sa propeta nga si Nephi. Sama nila, kamo mobati og hingpit nga kalipay alang niadtong modawat sa inyong halad. Makalaum usab kamo nga mobati sa samang dakong katagbawan nga gibati ni Ammon, kinsa miistorya sa iyang misyonaryo nga pagserbisyo sa lagyo nga mga sakop sa pamilya:

“Busa, maghimaya kita, oo, maghimaya kita sa Ginoo; oo, kita maglipay, kay ang atong kalipay puno; oo, kita magdayeg sa atong Dios sa kahangturan. Tan-awa, kinsa ang makahimaya pag-ayo diha sa Ginoo? Oo, kinsa ang makasulti pag-ayo diha sa iyang dako nga gahum, ug sa iyang kalooy, ug sa iyang pagkamainantuson ngadto sa mga katawhan? Tan-awa, ako moingon nganha kaninyo, ako dili makasulti sa kinagamyang nga bahin sa akong gibati” (Alma 26:16).

Ako mopamatuod nga ang inyong mga pagbati sa gugma alang sa mga sakop sa inyong pamilya—bisan asa



sila—mao ang katumanan sa saad ni Elijah nga moabut. Siya miabut. Ang mga kasingkasing sa mga anak mobalik ngadto sa ilang mga amahan, ug mga kasingkasing sa mga amahan mobalik ngadto sa ilang mga bata (tan-awa sa Malaquias 4: 5–6; Joseph Smith—Kasaysayan 1:38–39). Kon inyong gibati ang kadasig sa pagpa-ngita sa mga ngalan sa inyong mga katigulangan ug modala niadtong mga ngalan sa templo, inyong masinati ang katumanan niana nga panagna.

Usa kini ka panalagin sa pag-puyo sa mga panahon dihang natuman ang saad sa pagpabalik sa mga

kasingkasing. Si Mildred Bennion Eyring mibati og tinguha sa iyang kasingkasing. Siya nahigugma sa pamilya sa iyang igsoon, ug siya

mitabang kanila. Gibati nila ang ilang mga kasingkasing mibalik sa paghigugma ni Tiya Mid tungod kay sila nasayud nga siya nahigugma kanila. ■

#### PAGTUDLO GIKAN NIINI NGA MENSAHE

**M**ahimo nimong basahon ang mga panagna mahitungod sa espiritu ni Elijah niadtong inyong gibisitahan (tan-awa sa Malaquias 4:5–6; Joseph Smith—Kasaysayan 1:38–39). Hisguti ang mga paagi nga moapil sa family history, lakip ang mga himan sama sa pag-index, paglitrato, ug pag-blog. Kon kadtong inyong gibisitahan dili sinati sa FamilySearch.org, ikonsiderar ang paggahin og panahon sa pagpakita niini ngadto kanila.

### Pag-ilaila sa Akong Lola

Ni Jewelene Carter



**A**lang sa usa sa akong mga proyekto sa Young Women, miboluntaryo ko sa pagtabang sa akong lola nga makit-an ang iyang mga katigulangan pinaagi sa pagtan-aw sa microfilm sa family history center sa Mesa, Arizona, USA. Samtang nagtupad kami sa paglingkod

ug nagsiksik sa among pamilya, nagsugod ako sa paghunahuna: "Nakaila ba gayud ako sa akong lola nga nia sa akong tupad?"

Among makita ang daghang sakop sa pamilya, miandam sa ilang impormasyon, ug miadto sa Mesa Arizona Temple sa pagpahigayon sa ilang bunyag ug kumpirmasyon. Wala madugay, ang akong lola mihatag nako og binugkos nga koleksyon sa iyang family history.

Tungod kay siya nag-antus sa rheumatoid arthritis, sakit

kaayo alang sa akong lola ang pag-type. Akong gikalipay ang pagtabang niya sa computer. Kaming duha, mosulat sa mga istorya sa iyang kinabuhi alang sa espirituhanong kaayohan sa among pamilya. Ganahan ko sa usa ka bahin sa iyang kinabuhi ug nagkat-on og maayo sa kasaysayan sa Simbahan samtang kami naghan-ay niini nga mga proyekto.

*Ang tagsulat nagpuyo karon sa Virginia, USA.*

## MGA BATA

### Gugma sa Panimalay

*Ang palibut matahum*

*Kon dunay gugma;*

*Ug kalipay anaa*

*Kon dunay gugma.*

*("Gugma sa Panimalay" Mga Himno ug mga Awit sa mga Bata, nu. 44)*

Gusto ang Langitnong Amahan nga higugmaon nato ang atong mga pamilya aron kita magmalipayon. Kon mas moserbisyo kita sa atong mga pamilya, mas higugmaon nato ang Langitnong Amahan ug ang atong mga sakop sa pamilya.



Pagdrowing og mga kasingkasing sama niining usa sa usa ka piraso nga papel ug guntinga kini. Pagsulat og malipayong mga sulat o pag-drawing og mga li-trato niini ug ihilum kinig hatag sa mga miyembro sa inyong pamilya. Bantayi kon unsa ka malipayon sila tungod niini!



*Tun-i sa mainampuong paagi kini nga materyal ug tinguhaa nga masayud unsaon kini sa pag-pakigbahin. Sa unsang paagi nga ang pagsabut sa kinabuhi ug misyon sa Manluluwas makadugang sa inyong hugot nga pagtuo diha Kaniya ug makapanalangin niadtong inyong giamuma pinaagi sa visiting teaching? Alang sa dugang nga impormasyon, adto sa [reliefsociety.lds.org](http://reliefsociety.lds.org).*

## Ang Balaan nga Misyon ni Jesukristo: Manlalaban


*Kini kabahin sa sunod-sunod nga Mensahe sa Visiting Teaching nga naghulagway sa mga aspeto sa misyon sa Manluluwas.*

Si Jesukristo mao ang atong Manlalaban ngadto sa Amahan. Ang pulong *manlalaban* dunay Latin nga mga gamot nga nagpasabut og “usa kinsa nangamuyo alang sa lain.”<sup>1</sup> Naghangyo ang Manluluwas alang nato, naggamit sa pagsabut, kaangayan, ug kalooy. Nasayud nga kini mopuno nato sa gugma ug pasalamat alang sa Iyang Pag-ula.

“Paminaw ni [Jesukristo] kinsa mao ang manlalaban ngadto sa Amahan, kinsa nangamuyo sa inyong kahimoan diha sa iyang atubangan—

“Nag-ingon: Amahan, tan-awa ang mga pag-antus ug ang kamatayon kaniya kinsa wala makabuhat og sala, kinsa ikaw nahimuot; tan-awa ang dugo sa imong Anak nga gipaagas, ang dugo kaniya kinsa ikaw mihatag nga ang imong kaugalingon unta pagahimayaon;

“Busa, Amahan, luwasa kining akong mga kaigsoonan nga mituo sa akong ngalan, nga sila moduol ngari kanako ug makabaton sa walay katapusan



nga kinabuhi.” (D&P 45:3–5).

Diha ni Jesukristo isip atong Manlalaban, si Elder D. Todd Christofferson sa Korum sa Napulog Duha Ka mga Apostoles miingon: “Kini mao ang dakong kahulugan ngari nako, nga ako bisan unsa nga higayon ug sa bisan unsang kahimtang makaduol pinaagi sa pag-ampo sa trono sa grasya, nga ang akong Langitnong Amahan maminaw sa akong pangamuyo, nga ang akong mga Manlalaban, kinsa wala makabuhat og sala, kansang dugo gipaagas mohangyo alang kanako.”<sup>2</sup>

### Dugang mga Kasulatan

Mosiah 15:8–9; Moroni 7:28; Doktrina ug mga Pakigsaad 29:5; 110:4

#### MUBO NGA MGA SULAT

1. Tan-awa sa Russell M. Nelson, “Jesus Christ—Our Master and More” (Brigham Young University fireside, Feb. 2, 1992), 4; [speeches.byu.edu](http://speeches.byu.edu).
2. D. Todd Christofferson, “I Know in Whom I Have Trusted,” *Ensign*, Mayo 1993, 83.
3. Tan-awa usab sa *Anak nga mga Babaye sa Akong Gingharian: Ang Kasaysayan ug Buhat sa Relief Society* (2011), 212.



## Hugot nga Pagtuo, Pamilya, Kahupayan

### Gikan sa mga Kasulatan

Sa tibuok kasaysayan sa Simbahan sa Ginoo, babaye nga mga disipulo ni Jesukristo misunod sa iyang ehemplo. Si Ester matitudanon ug maisugon. Ang iyang ig-agaw nga si Mardocheo mipadala kaniya og kopya sa mando sa hari nga ang mga Judeo pagalaglagon, ug siya gisangunan kaniya “sa pagpangaliyupo sa atubangan niya [ang hari] alang sa iyang katawhan.” Siya midugang: “Ug kinsay nahibalo kon ikaw wala pa mahiabut sa gingharian sa maingon niini nga panahon?” (Ester 4:8, 14.)

Bisan pa sa kakuyaw, si Ester miuyon: “Busa ako moadto sa hari, nga dili subay sa balaod: ug kong ako mamatay, mamatay ako” (Ester 4:16).

Dayon si Ester mapainubsanong nakigsulti sa hari ug “miluhod sa iyang tiilan, ug nangaliyupo kaniya inubanan sa luha . . . sa pagbawi sa mga sulat . . . aron sa paglaglag sa mga Judeo.” Siya midugang, “Kay unsaon ko sa pag-antus nga magatan-aw sa dautan nga mahatabo sa akong katawohan?” (tan-awa sa Ester 8:3, 5–6). Nahumok ang kasingkasing sa hari, ug siya mitugot sa iyang hangyo.<sup>3</sup>

### Ikonsiderar Kini

Sa unsang paagi ang pagkamanlalaban ni Jesukristo makadasig nato sa paghatag og kalooy ug pagpasaylo sa uban?

# NOTEBOOK SA ABRIL 2014 NGA KOMPERENSYA

*“Unsa nga Ako ang Ginoo namulong, Ako namulong; . . . bisan pinaagi sa akong kaugalingon nga tingog o pinaagi sa tingog sa akong mga sulugoon, kini managsama ra” (D&P 1:38).*

*Samtang kamo magribyu sa kinatibuk-ang komperensya sa Abril 2014, inyong magamit kining mga pahina (ug mga Notebook sa Komperensya sa umaabut nga mga isyu) aron sa pagtabang kaninyo sa pagtuon ug paggamit sa bag-o nga mga pagtulun-an sa buhi nga mga propeta ug mga apostoles ug ubang mga lider sa Simbahan.*

## DOKTRINA NGA GIHATAGAN OG GIBUG-ATON



## Kaminyoon ug Kaputli

“[Bag-ohay lang,] ang Unang Kapangulohan ug ang Korum sa Napulog Duha mimantala og sulat ngadto sa mga lider sa Simbahan sa tibuok kalibutan. Ang porsyon niini mabasa: ‘Ang kausaban sa sibil nga balaod dili, ug sa pagkati-nuod dili makausab sa moral nga balaod nga giestablisar sa Dios. Ang Dios naglaum kanato nga mosuporta ug mosunod sa Iyang mga sugo bisan pa man sa managlahing mga opinyon ug mga uso sa katilingban. Ang Iyang balaod sa kaputli klaro: ang sekswal nga relasyon tukma lamang tali sa lalaki ug babaye kinsa legal nga naminyo isip bana ug asawa.’

“Bisan kon ang kalibutan mopalayo sa sumbanan sa balaod sa Ginoo kabahin sa kaputli, kita dili. . . .

“Bisan kon daghang gobyerno ug inila nga mga indibidwal ang miusab

sa kahulugan sa kaminyoon, ang Ginoo wala. Sukad sa sinugdanan, ang Dios mipasiugda sa kaminyoon tali sa usa ka lalaki ug usa ka babaye—si Adan ug si Eva. Gikatakda niya ang mga katuyoan sa kaminyoon nga mas molabaw pa sa personal nga katagbawan ug katumanan sa mga hamtong ngadto, sa mas importante, sa pagpatunhay og maayo nga kahimtang alang sa mga anak nga matawo, mapadako, ug maamuma. Ang mga pamilya mao ang bahandi sa langit.”

**Elder Neil L. Andersen sa Korum sa Napulog Duha ka mga Apostoles, “Espirituhanong mga Alimpulos,” *Liahona*, Mayo 2014, 19.**

Si Elder Andersen naghisgut kon unsaon pagdumala sa mga pangutana ug kabalaka sa lisud nga mga hilisgutan sa [lds.org/go/andersen714](http://lds.org/go/andersen714).

## PROPETIKANHON NGA SAAD



## Magmaisug


“Aron makahimo kita og sakto nga mga desisyon, gikinahanglan ang kaisug—ang kaisug sa pagsulti og dili kon gikinahanglan nato, ang kaisug sa pagsulti og oo kon angay, ang kaisug sa pagbuhat sa matarung nga butang tungod kay kini husto. . . .

Kaisug sa kaugalingon naglakip sa pagbuhat sa matarung nga butang bisan og kita nahadlok, pagpanalipod sa atong mga gituohan bisan sa risgo nga biay-biayon, ug mopadayon niadto nga mga gituohan bisan hulgaon nga mawad-an og mga higala o kahimtang sa katilingban. . . .

Samtang kita magpadayon, maningkamot sa pagpakabuhi kon unsay gikinahanglan natong buhaton, sigurado kitang makadawat og tabang gikan sa Ginoo ug makakaplag og kahupayan sa Iyang mga pulong.”

**Presidente Thomas S. Monson, “Magmakusganon Ka ug Magmaisug,” *Liahona*, Mayo 2014, 66, 67, 69.**

Pagkat-on gikan ni Presidente Monson kon unsaon nato pagpalambo og kaisug sa [lds.org/go/monson2714](http://lds.org/go/monson2714).



## Pagpadali sa Buhat sa Kaluwasan

**P**ipila sa labing importante nga mga hilisgutan, gihisgutan sa sobra sa usa ka mamumulong sa kinatibuk-ang komperensya. Ania unsay gisulti sa tulo ka mga mamumulong mahitungod sa pagpadali sa buhat sa kaluwasan:

- “Bisan unsa kaimportante ang imong mensahe [sa misyonaryo], ikaw dili makahigayon sa paghatag niini kon walay maka-nunayon, magpadayon nga follow-up.”<sup>1</sup> —Elder M. Russell Ballard. Pagkat-on og dugang kabahin sa pagdapit ni Elder Ballard sa [lds.org/go/ballard714](https://lds.org/go/ballard714).
- “Ang Gilbert Arizona Temple . . . nahimo kining ika-142 nga templo nga magamit. . . Kon ang tanang gipahibalo sa una nga mga templo mahuman na, kita adunay 170 ka mga templo

nga magamit sa tibuok kalibutan.”<sup>2</sup> —Presidente Thomas S. Monson. Pagkat-on og dugang sa [lds.org/go/monson714](https://lds.org/go/monson714).

- “Kita kinahanglang ‘mosalikway sa mga butang niini [nga ] kalibutan, . . . [mo]hupot ngadto sa [atong] mga pakigsaad’ [D&P 25:10, 13], ug moduol kang Kristo ug mosunod Kaniya. Mao kana ang buhaton sa mga disipulo!”<sup>3</sup> —Linda K. Burton. Tan-awa ang pagpamulong ni Sister Burton sa [lds.org/go/burton714](https://lds.org/go/burton714).

#### MUBO NGA MGA SULAT

1. “Pag-Follow Up,” *Liahona*, Mayo 2014, 78.
2. “Welcome sa Komperensya,” *Liahona*, Mayo 2014, 4.
3. “Gikinahanglan: Mga Kamot ug mga Kasingkasing sa Pagpadali sa Buhat,” *Liahona*, Mayo 2014, 122.

#### UNSAON PAGPAHIGAYON OG “FAMILYTREE GATHERING”

“Sa katapusan anaa na kanato ang doktrina, mga templo, ug teknolohiya aron mabuhat sa mga pamilya kining mahimayaong buhat sa kaluwasan. Mosugyot ko . . . [kada pamilya] mahimong magmiting alang sa ‘FamilyTree Gathering.’ Kinahanglang pabalik-balik kini nga paningkamot.”

—Elder Quentin L. Cook, “Mga Gamut ug mga Sanga,” *Liahona*, Mayo 2014, 47.

1. Pagpundok uban sa inyong pamilya ug pagpakigbahin og mga kasaysayan, mga istorya, mga litrato ug mga butang nga kabilin.
2. Pag-upload og mga istorya ug mga litrato ngadto sa FamilyTree ug ikonektar ang mga dokumento ngadto sa katigulangan.
3. Pagtino kon kinsang katigulangan ang nagkinahanglan og ordinansa sa templo ug pag-assigned og mga sakop sa pamilya nga mobuhat niini.

Pangitaa ang uban pang mga paagi nga giingon ni Elder Cook nga kita mapanalanginan pinaagi sa family history sa [lds.org/go/cook714](https://lds.org/go/cook714).



Sa pagbasa, pagtan-aw, o pagpaminaw sa mga pakigpulong sa kinatibuk-ang komperensya, bisitaha ang [conference.lds.org](https://conference.lds.org).

# NAGTUDLO KITA PINAAGI SA GAHUM SA ESPIRITU SANTO

Nagatuo kita nga ang pagtudlo sa ebanghelyo ni Jesukristo pinaagi sa gahum sa Espiritu Santo mahinungdanon sa buhat sa Dios sa kaluwasan. Ang epektibong pagtudlo makatabang sa mga tawo nga molambo sa ilang hugot nga pagtuo ug magtinguha sa pagsunod sa ebanghelyo. Ang pagtudlo mahimong mahitabo sa daghang kalihokan, sama sa paghatag sa mga leksyon ug mga pakigpulong sa simbahan; apan nagtudlo usab kita kon atong hisgutan ang mga kasulatan uban sa usa ka sakop sa pamilya o

“Ang mga magtutudlo niini nga simbahan magtudlo sa mga baru-ganan sa akong ebanghelyo, nga anaa sa Biblia ug sa Basahon ni Mormon, diin anaa ang kahingpitan sa ebanghelyo.

“Ug sila magsunod sa mga pakig-saad ug sa mga artikulo sa simbahan sa pagbuhat kanila, ug kini mao ang ilang mga pagtudlo, ingon nga sila gimandoan pinaagi sa Espiritu.

“Ug ang Espiritu ihatag nganha kaninyo pinaagi sa pag-ampo diha sa hugot nga pagtuo; ug kon kamo dili makadawat sa Espiritu kamo dili motudlo” (D&P 42:12–14).

kon mopasabut kita ngadto sa usa ka silingan kabahin sa priesthood.

Hunahunaa kining upat ka mga baruganan alang sa epektibong pagtudlo:

- **Higugmaa kadtong inyong gitudloan.** Ila-ilaha sila. Mainampoong ikonsiderar ang ilang mga panginahanglan samtang kamo mangandam sa pagtudlo. Sulayi ang paggamit og lain-laing pamaagi sa pagtudlo: lain-laing mga pamaagi makatabang sa lain-laing mga tawo (tan-awa ang pipila ka mga ideya sa tuo).
- **Motudlo pinaagi sa Espiritu.** Si Nephi mitudlo, “Kon ang tawo mamulong pinaagi sa gahum sa Espiritu Santo ang gahum sa Espiritu Santo modala niini ngadto sa mga kasingkasing sa mga katawhan” (2 Nephi 33:1). Samtang kamo magtudlo, mahimo ninyong dapiton ang impluwensya sa Espiritu pinaagi sa pagpamatuod ug pinaagi sa paggamit sa mga kasulatan ug mga pagtulun-an sa mga propeta sa ulahing mga adlaw. Tinguhaa ang giya sa Espiritu Santo samtang kamo nangandam sa pagtudlo. Siya modasig kaninyo nga masayud unsaon sa pagtudlo.
- **Itudlo ang doktrina.** Aprubado nga mga materyal sa kurikulum gikan sa Simbahan, sama sa mga kasulatan, mga pakigpulong sa kinatibuk-ang

komperensya, ug mga manwal, naglangkob og doktrina—mahangturong mga kamatuoran gikan sa Dios.

- **Dapita ang makugihon nga pagkat-on.** Samtang kamo magtudlo, hinumdumi nga si kinsa kadtong maminaw maoy responsable sa ilang kaugalingong pagkat-on. Awhaga sila sa pagpangutana, sa pagpakigbahin sa ilang mga hunahuna kabahin sa hilisgutan, ug pagpamalandong kon sa unsang paagi sila makasunod sa mga baruganan sa ebanghelyo. Ang ilang pagpamatuod niadtong mga baruganan molambo samtang sila nagpuyo niini (tan-awa sa Juan 7:17).

Si Presidente Gordon B. Hinckley (1910–2008) namulong mahitungod sa kaimportante sa maayong pagtulun-an: “Kinabuhing dayon moabut lamang kon ang mga lalaki ug mga babaye *magtudlo sa epektibong paagi* nga sila mag-usab ug modisiplina sa ilang kinabuhi. Dili nila mahimong ipamugos ang pagkamatarung o ngadto sa langit. Kinahanglan sila pagagiyahan, ug nagpasabut kana sa pagtudlo” (gikutlo sa Jeffrey R. Holland, “A Teacher Come from God, *Ensign*, Mayo 1998, 26). ■

*Alang sa dugang nga impormasyon, tan-awa sa Doktrina ug mga Pakigsaad 50:13–22; Handbook 2: Administering the Church (2010), 5.5.4.*


Mao kini ang ubang mga pa-  
maagi sa pagtudlo nga maka-  
tabang kaninyo sa pagtudlo sa  
mga tawo nga may lain-laing  
matang sa estilo sa pagkat-on:



Pagdula o pagkanta og sagradong  
musika. Ang mga himno ug mga kanta  
sa Primary makatudlo sa doktrina ug  
makadapit sa Espiritu sa Ginoo.



Pagsaysay og  
makapabayaw nga  
mga istorya ug mga  
ehemplo, lakip ang  
mga istorya gikan  
sa mga kasulatan  
ug sa inyong  
kaugalingong  
kinabuhi.



Pangutana og makapaawhag niadtong  
inyong gitudloan sa pagpamalandong  
ug sa pagpakigbahin sa ilang mga  
hunahuna ug pagbati.



Ipakita ang litrato ug pisikal nga  
mga butang. Ang mga baruganan  
sa ebanghelyo ikakumpara sa mga  
liso, mga bato, mga tanom, ug uban  
pang pamilyar nga mga butang.

Pagpamatuod kabahin  
sa mga baruganan  
sa ebanghelyo nga  
inyong gitudlo. Ang  
pagpamatuod modapit  
sa Espiritu Santo sa  
pagsaksi sa kamatuoran.



# PAGGIYA SAMA SA MANLULUWAS

Ni Ryan Carr

Mga Magasin sa Simbahan

Adunay tin-aw nga kalainan tali sa dautan nga mga lider sa kalibutan ug sa hingpit nga lider, ang Manluluwas sa kalibutan. Si Presidente Spencer W. Kimball (1895–1985) mipasabut: “Kadtong mga lider sa kasaysayan nga nakahimo og subo kaayong epekto sa mga katawhan makasubo kaayo tungod kay sila nagkulang sa hapit bisan unsa nga matang sa mga hiyas nga naa nianang Tawo sa Galilea. Diin si Jesus dili hakog, sila mga hakog. Diin si Jesus nagpakabana sa kagawasan, sila nagpakabana sa pagkontrolar. Diin si Jesus nagpakabana sa serbisyo, sila nagpakabana sa kahintang. Diin nahatag ni Jesus ang tinuod nga mga panginahanglan sa uban, sila naghuhahuna lamang sa ilang kaugalingong mga panginahanglan ug gusto. Diin si Jesus nagpakabana sa kalamboan sa iyang mga disipulo, sila nagtinguha sa pagmaniubra sa mga mortal. Diin si Jesus nga puno sa kamanggiloy-on sa pagbalanse sa kaangayan, sila sa kasagaran napuno sa kabangis ug dili makiangayon.”<sup>1</sup>

Aron molampus isip mga lider sa Simbahan sa Ginoo, kita kinahanglan nga mosunod sa Iyang ehemplo. Ang mosunod nga mga ideya makatabang nato nga mahimong mas sama kang Kristo sa atong pagpangulo.

Ang mga lider nga sama ni Kristo moserbisyo “uban sa bug-os nga tinguha ngadto sa himaya sa Dios” (D&P 4:5), nagtinguha sa pagbuhat sa kabubut-on sa Langitnong Amahan. Ang Manluluwas miingon, “Kay ako nanaug gikan sa langit, dili sa pagbuhat sa akong kaugalingong

kabubut-on, kon dili sa kabubut-on sa nagpadala kanako” (Juan 6:38).

Ang mga lider nga sama ni Kristo dili mosalig sa “gahum sa tawo” (2 Nephi 4:34). Mapainubsanon silang mag-ampo alang sa giya. Maghulat sila sa Ginoo ug magtinguha sa Iyang buhaton sa Iyang panahon ug sa Iyang paagi kay sa mag-agad sa ilang kaugalingong mga talento ug abilidad.

Mga lider nga sama ni Kristo dili magtinguha og posisyon sa Simbahan; ilang gitan-aw ang mga calling isip mga oportunidad sa pagserbisyo, dili mga promosyon. Ni isipon nila ang pagka-release nga demosyon. Ang pagka-release natural nga kabahin sa matag calling.

Ang mga lider nga sama ni Kristo mga sulugoon; sila motabang, motudlo, ug moawhag niadtong ilang giserbisyon. Nagtinguha sila sa pagpanalangin sa uban, sama sa gibuhat sa Manluluwas: “Dili siya maghimo og bisan unsa gawas kon kini alang sa kaayohan sa kalibutan” (2 Nephi 26:24). Ilang giisip ang ilang mga kaugalingon nga mga representante sa Ginoo sa pagtabang sa uban nga makabalik ngadto Kaniya.

Ang mga lider nga sama ni Kristo magtinguha sa pagtabang sa uban nga molambo. Si Presidente Kimball mitudlo usab:

“Si Jesus misalig gayud sa iyang mga sumusunod sa pagpakigbahin

## “APAN WALA AKOY BISAN UNSA NGA MGA KASINATIAN SA PAGPANGULO!”

Awag og kabalaka kon kamo wala pay daghang kasinatian. Gitawag kamo pinaagi sa inspirasyon, sa usa ka tawo nga dunay awtoridad (tan-awa sa Mga Artikulo sa Hugot nga Pagtuo 1:5). Ang Ginoo nakakita unsa inyong potensyal. Ang inyong tawag sa pagpangulo mahimong usa ka oportunidad sa pagpalambo sa inyong mga kalig-on ug pagbuntog sa mga kahuyang.

Sa negosyo ug sa ubang mga organisasyon, ang edukasyon ug kasinatian sa usa ka lider sa maoy kanunayng importante nga mga kwalipikasyon, apan ang pamaagi sa Ginoo lahi. Si Presidente Lorenzo Snow (1814–1901) mitudlo: [Ang] mga apostoles nga gitawag sa Dios, ang gitawag ni Jesus, ang Anak sa Dios, . . . sila walay grado; wala sila makasabut sa mga siyensya, wala silay tag-as nga posisyon sa Judea—sila kabus ug walay alamag; mga kabus sa katungdanan sa kinabuhi. . . . Apan, lahi ang Ginoo. Siya mihimo sa Iyang mga pagtawag lahi kay sa niadtong mga pagtawag sa mga tawo.”<sup>1</sup> Maayo na lang, kinsa ang tawagon sa Ginoo Siya mopasarang!<sup>2</sup>

### MUBO NGA MGA SULAT

1. *Mga Pagtulun-an sa mga Presidente sa Simbahan: Lorenzo Snow* (2012), 177.
2. See Thomas S. Monson, “Duty Calls,” *Liahona*, Hulyo 1996, 42.



## ALANG SA MGA LIDER KINSA MOTAMBAG SA MGA MIYEMBRO SA SIMBAHAN

**S**amtang kamo makigkita sa mga miyembro sa Simbahan kinsa nagkinahanglan sa inyong tabang, sila tingali gusto nga inyong sulbaron ang ilang mga problema alang nila. Apan sa pagbuhat sa ingon naghikaw kanila sa personal nga paglambo. Tingali moabut sila nga nagdahum og diha-diha dayon nga solusyon, apan ang ilang mga problema sa kasagaran nagkinahanglan og mas daghang panahon aron masulbad. Kini mao ang pipila ka komon nga mga hagit. Ang mosunod nga mga pangutana, gisugyot sa mga lider sa priesthood, makatabang samtang mangandam kamo sa pagtambag sa mga miyembro:

- Nagtambag ug nagtabang ba kamo sa mga miyembro sa paagi nga ang pagbuntog sa ilang mga hagit magpabilin nga ilang mga responsibilidad?
- Naggiya ba kamo sa mga miyembro aron sila mismo ang mangita sa tubag?
- Nag-follow up ba kamo sa mga buluhaton nga ilang giuyunan nga buhaton?
- Nagtabang ba kamo nila nga makakita og mga kapanguhaan sa pagsulbad sa ilang kaugalingong mga problema?
- Nag-awhag ba kamo nila sa pagpangamuyo ngadto sa Ginoo?
- Ang inyo bang tambag nag-awhag sa mga miyembro sa pag-uswag?

Siyempre, ang tanang mga sitwasyon managlahi, mao nga importante sa pagsunod sa giya sa Espiritu. Pagserbisyo uban sa gugma, paulub, ug espirituhanong kasensitibo mosangput sa maayong mga resulta.

sa iyang buhat uban kanila aron sila molambo. Mao kana ang usa sa labing importanting mga leksyon sa iyang pagpangulo. Kon atong isalikway ang tabang sa uban aron mas madali ug epektibong mahuman ang buluhaton, ang buluhaton mahimong matuman, apan wala ang kauswagan ug kalamboan sa mga sumusunod nga maoy importante kaayo. . . .

“Si Jesus mihatag sa mga tawo sa kamatuoran ug mga buluhaton haum sa ilang kapasidad. Dili Niya sila hatagan og labaw sa ilang mahimo, apan mihatag kanila og

igo aron madugangan ang ilang pagkaespirituhanon.”<sup>2</sup>

Si Propeta Joseph Smith mihulagway kon giunsa niya sa pagpangulo pag-ayo ang mga tawo: “Ako mitudlo kanila og husto nga mga baruganan, ug gidumala nila ang ilang mga kaugalingon.”<sup>3</sup> Mao kini ang diwa sa pamaagi sa Ginoo sa pagpangulo. ■

### MUBO NGA MGA SULAT

1. Spencer W. Kimball, “Jesus: The Perfect Leader,” *Ensign*, Ago. 1979, 7.
2. Spencer W. Kimball, “Jesus: The Perfect Leader,” 6.
3. *Mga Pagtulun-an sa mga Presidente sa Simbahan: Joseph Smith* (2007), 344.

# ELIJAH

*“Si Elijah mao ang usa sa labing bantugan sa mga propeta, ug ang Ginoo mitugyan kaniya sa gahum sa pagbugkos.”<sup>1</sup> —Presidente Joseph Fielding Smith (1876–1972)*

Ako nangalagad isip propeta didto sa Amihanan nga Gingharian sa Israel.<sup>2</sup> Tungod sa kadautan sa mga Israelite, wala nako pauwana ang langit, nga maoy hinungdan sa kagutom diha sa yuta. Panahon sa kagutom, ako nagpuyo sa usa ka sapa ug gidad-an akog pagkaon sa mga uwak, apan naughan ang sapa.<sup>3</sup>

Ang Ginoo misugo nako nga madto sa usa ka balo kinsa nagpuyo sa Sarepta, ug nga siya mopakaon kanako. Akong nakita siya nga nanga-hoy aron mag-andam sa katapusang pagkaon alang sa iyang kaugalingon ug sa iyang anak nga lalaki. Misulti ako kaniya nga kon siya mopakaon nako pag-una, ang iyang “tadyaw sa harina dili [gayud] mahutdan, ni mahutdan [gayud] ang tibud-tibud sa lana, hangtud sa adlaw nga ang Ginoo magapaulan ibabaw sa yuta.”<sup>4</sup> Siya migamit sa hugot nga pagtuo, ug ang Ginoo mituman sa Iyang saad.

Samtang ako nagpuyo uban sa iyang pamilya, ang anak nga lalaki sa balo namatay. Nangamuyo ko, “O Ginoo

akong Dios, ako nagahangyo kanimo nga pabalikon mo unta pag-usab kaniya ang kalag niining bataa.”<sup>5</sup> Ang Ginoo namati sa akong pangamuyo, ug ang iyang anak nabuhi pag-usab.<sup>6</sup>

Sa wala madugay, akong gipakita ang gahum sa Ginoo ngadto sa katawhan sa Israel pinaagi sa paghagit sa mga pari ni Baal sa usa ka sangka. Ang mga pari nag-andam og mga sakripisyo ug mitawag ni Baal tibuok adlaw sa pagpakanaog og kalayo, apan walay kalayo nga nakita. Nag-buhat ako og altar sa 12 ka mga bato, simbolo sa 12 ka mga tribo sa Israel, ug nagkalot sa usa ka kanal libut sa altar. Dayon gibubuan nako ang altar ug ang sakripisyo niini og 12 ka baril nga tubig, mibasa sa kahoy ug mipuno sa kanal. Mitawag ko sa Ginoo, ug Siya mipadala og kalayo nga miugdaw sa sakripisyo, sa altar, ug sa tubig. Human niana, nag-ampo ko sa Ginoo, ug Siya mipaulan sa kalangitan.<sup>7</sup>

Sa katapusan sa akong kinabuhi, wala ko mamatay apan mikayab ngadto sa langit sa usa ka carro sa

kalayo.<sup>8</sup> Atol sa mortal nga pangalagad ni Kristo, mipakita ko didto sa Bukid sa Transfigurasyon ug mihatag sa yawe sa priesthood ngadto kang Pedro, Santiago ug Juan.<sup>9</sup>

Nagpakita ko pag-usab sa ulahing mga adlaw “aron sa pagpabalik sa mga kasingkasing sa mga amahan ngadto sa mga anak, ug ang mga anak ngadto sa mga amahan,” miadto sa Kirtland Temple niadtong Abril 3, 1836, ug mipahiuli sa mga yawe sa gahum sa pagbugkos ngadto ni Joseph Smith ug Oliver Cowdery.<sup>10</sup> ■

## MUBO NGA MGA SULAT

1. Joseph Fielding Smith, *Answers to Gospel Questions*, ed. Joseph Fielding Smith Jr., 5 vols. (1957–1966), 4:193.
2. Tan-awa sa Giya ngadto sa mga Kasulatan, “Elijah”; scriptures.lds.org.
3. Tan-awa sa 1 Mga Hari 17:1–7.
4. Tan-awa sa 1 Mga Hari 17:8–16.
5. Tan-awa sa 1 Mga Hari 17:21.
6. Tan-awa sa 1 Mga Hari 17:8–24.
7. Tan-awa sa 1 Mga Hari 18.
8. Tan-awa sa 2 Mga Hari 2:11.
9. Tan-awa sa Mateo 17:3; Giya ngadto sa mga Kasulatan, “Transfigurasyon”; scriptures.lds.org.
10. Tan-awa sa Doktrina ug mga Pakigsaad 110:13–16.



ELIJAH RAISES THE WIDOW'S SON FROM DEATH; NI ROBERT T. BARRITT; ELIJAH CONTESTS AGAINST THE PRIESTS OF BAAL; NI JERRY HARSTON; ELIJAH ASCENDING INTO HEAVEN; NI W. H. MARGETSON; SA MAAYONG KABUBUNAN SA CHURCH HISTORY MUSEUM; THE TRANSFIGURATION; NI CARL HEINRICH BLOCH; SA MAAYONG KABUBUNAN SA NATIONAL HISTORIC MUSEUM SA FREDERIKSBORG SA HILLEROD, DENMARK; ELIJAH APPEARING IN THE KIRTLAND TEMPLE; NI DANIEL A. LEWIS; PAGHULAGWAY SA MGA UWAK NI KOZHISTOCK/THINKSTOCK







# TRABAHO UG PAGPANINGKAMOT SA KAUGALINGON

Samtang ang kabatan-onan ug mga bata makakat-on sa pagtrabaho ug mahimong mapaningskamuton sa kaugalingon, sila nag-andam sa “pagtampo sa kalibutan nga [ilang] gipuy-an” (*Alang sa Kalig-on sa Kabatan-onan* [2011], 40).

Sa mga pahina 56–57 niini nga isyu, si Randall L. Ridd, ikaduhang magtambag sa kinatibuk-ang kapangulohan sa Young Men, mipakigbahin sa unsay iyang nakat-unan sa pagtrabaho sa konstruksyon uban sa iyang papa. Naghisgot siya sa kaimportante sa pagtrabaho og maayo, pagbaton og maayong kinaiya, ug pagtukod sa gingharian sa Ginoo. Si Brother Ridd nagpahinumdom nato: “Kinsay nanginahanglan og trabaho? Kitang tanan! Mao kini ang sinugdanan sa pagpaningskamot sa kaugalingon, kalampusan ug kalipay niining kinabuhia. Samtang kamo magmalipayong moapil sa pagtrabaho, tanang naglibut ninyo moani tungod sa mga binhi nga inyong gitanom.”

## Mga Sugyot sa Pagtudlo sa mga Kabatan-onan

- *Alang sa Kalig-on sa Kabatan-onan* nag-ingon, “Paghimo og taas nga mga tumong alang sa inyong kaugalingon, ug magma-himong andam nga motrabaho og maayo aron makab-ot kini” (40). Mahimo kamong motan-aw uban sa inyong mga anak sa Mormon Messages for Youth video “A Work in Progress” (tan-awa sa Marriage and Family videos sa [mormonchannel.org/come-follow-me](http://mormonchannel.org/come-follow-me)). Dayon magtinabangay sa paghimo og pipila ka mga tumong ug maghimo og plano aron makab-ot kini.

- Ang trabaho mas sayon kon kita dunay usa ka positibo nga kinaiya. Basaha ang “Pagbalhin og Tubo gamit ang Lapukon nga Sapatos” sa mga pahina 58–59 niini nga isyu ug hisguti kon sa unsang paagi ang inyong kinaiya nakaapekto sa inyong buhat.
- “Usa ka matang sa pagkatalipulan mao ang paggahin og sobrang kaayo nga panahon sa mga kalihokan nga mopahilayo kaninyo sa mabungahong buhat, sama sa paggamit sa Internet, pagdula og mga video game, ug pagtan-aw sa telebisyon” (*Alang sa Kalig-on sa Kabatan-onan*, 40). Pangutan-a ang inyong mga anak mahitungod sa kaayohan ug mga kakuyaw sa Internet, mga video game, ug telebisyon. Kanus-a kining mga himan makabalda? Unsa nga mga panalangin ang moabut gikan sa mabungahon nga mga buhat? Hunahunaa sa pagtabang sa inyong mga anak nga makasinati niini nga mga panalangin pinaagi sa paghiklin una sa tanan nga mga teknolohiya ug magtinabangay sa usa ka proyekto.

## Mga Sugyot sa Pagtudlo sa mga Anak

- Ang misyonaryo nga buhat lisud, ug ang pagkat-on nga mahimong mapaningskamuton sa kaugalingon makatabang sa mga anak sa pagpangandam alang niana nga buhat. Uban sa inyong mga anak, paghimo og lista sa mga buluhaton sa balay nga kinahanglang mahibaloan sa mga misyonaryo unsaon sa pagbuhat

## MGA KASULATAN KABAHI NIINI NGA HILISGUTAN

Isaias 55:2)

2 Nephi 5:17, 27

Mosiah 4:16–21

Doktrina ug mga Pakigsaad

58:26–29

Joseph Smith—Kasaysayan

1:55

(pananglitan sa pagpanglaba, pagluto, ug pagpanglimpyo). Dayon tabangi ninyo pagbuhat ang maong mga buluhaton.

- Sa iyang artikulo, si Brother Ridd nagpahinumdom nato nga “ang labing importante nga buhat mao ang buhat sa Dios.” Sa unsang paagi nga ang inyong pamilya makapadayon sa buhat sa Ginoo? Paghunahuna og usa ka kalihokan nga inyong mabuhat og dungan nga makatabang sa pagdala sa uban nga mas maduol ngadto ni Kristo.
- Kabahin sa pagpaningskamot sa kaugalingon mao ang pagkat-on unsaon pagdumala sa kwarta. Tudloi ang inyong mga anak sa mga baruganan sa pagbadyet ug sa kaimportante sa paghimo sa ikapulo nga bahin sa ilang badyet. ■

# MGA BALITA SA SIMBAHAN

*Bisitaha ang news.lds.org alang sa dugang nga mga balita ug mga kalihokan sa Simbahan.*

## Ang LDS Charities Nahisgutan sa Kalihokan sa United Nations

Ang buhat sa LDS Charities mao ang hilisgutan sa bag-ong panel discussion sa punoang buhatan sa United Nations sa New York, USA. Ang kalihokan, “Pagdiskubre sa Mormonismo ug ang Tahas Niini sa Humanitarian nga Tabang,” kabahin sa Focus on Faith nga serye nga gipasiugdahan sa seksyon sa dili panggobyerno nga organisasyon sa U.N. Department of Public Information.

“Kini nga serye nagtinguha sa paghatag og usa ka mas lapad nga panabut kon sa unsa nga paagi nga ang lahi nga mga sistema sa pagtuo adunay komon nga sukaranang mga baruganan sama sa pagkamatugtanon, pagtinahuray alang niadtong lahi kay sa atong kaugalingon, ug usa ka pasalig sa pakig-uli ug malinawon nga resolusyon sa panagbangi,” pasabut sa tigdumala sa panel nga si Felipe Queipo, ang assistant sa public information sa U.N. kinsa usa ka miyembro sa Simbahan gikan sa Spain.

“Ang pag-atiman sa kabus mao ang sukaranang katungdanan ni bisan kinsa nga nagtahud sa Dios ug ang panag-igsoonay sa tanan—sa pagserbisyo, pagdasig, pagpanalangin, ug paghupay sa pag-antus nga gawasnon sa mga pagdani sa relihiyon, katilingbanon nga mga pilosopiya, nasyonalidad, tribo, sekso, o kagikan,” miingon si Sharon Eubank, direktor sa

LDS Charities, kinsa miapil sa mga panaghisgutan.

Sa iyang pakigpulong giribyu usab niya ang gipahayag nga katuyoan sa LDS Charities: aron sa paghupay sa pag-antus, pagpasiugda og pagpaningkamot sa kaugalingon, ug paghatag og mga oportunidad sa pagserbisyo sa mga pamilya sa tanang nasyonalidad. Ang mahinungdanon nga mga proyekto niini, siya miingon, mao ang limpyo nga tubig, neonatal resuscitation, pag-atiman sa panan-aw, pagpang-apud-apod og wheelchair, mga bakuna, pagkaon, ug tubag sa emerhensya.

Ubang mga partisipante nga mga Santos sa Ulahing mga Adlaw naglakip ni Ahmad S. Corbitt, direktor sa Church’s New York Office of Public and International Affairs, ug ni John P. (Phil) Colton, kinsa nagserbisyo uban sa iyang asawa, si Barbara, isip usa ka representante sa U.N. alang sa LDS Charities.

Si Brother Corbitt miingon nga adunay “mga tawo nga mabination sa tanang mga relihiyon sa kalibutan,” naghatag og gibug-aton sa kaimportante sa pagtinabangay. Si Brother Colton mipasabut nga ang LDS Charities naghatag og tabang sa dul-an sa duha ka milyon ka mga tawo sa 132 ka mga nasud pagka-2013. ■

*Ang mga representante sa Simbahan miapil sa usa ka panel discussion sa United Nations.*



## BAG-ONG MGA PRESIDENTE SA MISYON GITAWAG SA PAGSERBISYO

Ang Unang Kapangulohan mitawag og 122 ka bag-ong mga presidente sa misyon ug sa ilang mga asawa nga moserbisyo sa natudlo nga mga dapit asa sila ma-assign sugod sa Hulyo 2014. Alang sa impormasyon kabahin sa bag-ong mga presidente sa misyon, adto sa [lds.org/church/news/church-announces-2014-mission-president-assignments](http://lds.org/church/news/church-announces-2014-mission-president-assignments).

## ANG MGA LIDER MITANYAG OG KAHUPAYAN, SUPORTA SA PILIPINAS

Niadtong Pebrero, 100 ka adlaw human ang Bagyong Haiyan miguba sa Tacloban, si Sister Linda K. Burton, kinatibuk-ang presidente sa Relief Society, ug Sister Carol F. McConkie, unang magtatambag sa kinatibuk-ang kapa-ngulohan sa Young Women, mibiyaheng ngadto sa dapit nga naigo sa katalagman sa pagtanyag ug suporta ug kahupayan.

“Nasayud ko nga kinahanglan nakong gaksong ang mga sister,” miingon si Sister Burton. “Nasayud ko nga wala koy mahimo kaayo, apan nahibalo ko nga kinahanglan kong moadto sa Tacloban ug mogakos sa mga tawo kutob sa akong mahimo.”

Ang bagyong Haiyan miguba sa sobra sa 1.1 ka milyon ka mga panimalay sa sentro sa Pilipinas, mibilin og sobra sa 6,100 ka patay nga mga tawo, lakip sa 42 ka mga Santos sa Ulahing mga Adlaw. Human sa bagyo, ang Simbahan mipadala og mga relief supply ug nakig-alayon sa lokal ug internasyonal nga mga organisasyon aron moabag og pagkaon, kapuy-an, pagpalimpyo sa tubig, paghawan sa mga nangaguba, pagpahiuli sa panginabuhian.

Sila si Sister Burton ug Sister McConkie mireport nga sila nakakaplag og paglaum ug pagkamalaumon taliwala sa mga Santos, kinsa nagtukod og balik sa ilang mga panimalay ug naglig-on sa ilang mga pagpamatuod pinaagi sa pagserbisyo sa usag usa.

*Si Sister Carol F. McConkie mibisita sa mga bata sa Tacloban Philippines Stake Center.*



*Si Elder Jeffrey R. Holland namulong ngadto sa mga miyembro sa Taiwan.*

## Ang mga Apostoles Nangalagad sa Daghang mga Nasud

Ang mga sakop sa Korum sa Napulog Duha ka mga Apostoles nagpadayon sa pagpangalagad sa Simbahan sa tibuok kalibutan. Atol sa bag-ong mga assignment:

- Si Elder Russell M. Nelson ug si Elder Neil L. Andersen mihatag og tambag ug direksyon sa mga Santos sa Australia, New Zealand, French Polynesia, Fiji, New Caledonia, Tonga, ug Papua New Guinea. Si Elder Nelson naghisgot sa panginahanglan sa paglig-on sa mga pamilya, ug si Elder Andersen mipahinumdom sa mga miyembro sa pagmaya. Sa lain-laing assignment, si Elder Andersen nakighimamat sa mga miyembro ug mga lider sa komunidad sa mga dapit sa Pilipinas nga naigo sa linog ug mga bagyo.
  - Si Elder Dallin H. Oaks mipahinungod sa Mexico City Missionary Training Center. Iyang giawhag ang mga misyonaryo sa pagtuon og maayo ug paghalad sa ilang mga kaugalingon ngadto sa Ginoo.
  - Si Elder M. Russell Ballard mi-sulti sa mga Santos sa South America South Area nga “ang adlaw sa mga anak nga lalaki ug anak nga babaye ni Lehi nagtubo,” uban sa 4.5 ka milyon ka mga miyembro ug 14 ka templo sa South America. Kini nagtuman sa panagna nga gihimo sa iyang apohan nga lalaki nga si Elder Melvin J. Ballard (1873–1939) nga ang South America mahimo nga usa ka pwersa sa Simbahan.
  - Si Elder Jeffrey R. Holland miawhag sa mga miyembro sa Taiwan ug Hong Kong sa paghimo sa templo nga bahin sa ilang kinabuhi pinaagi sa pagtambong kanunay kutob sa ilang mahimo.
  - Si Elder David A. Bednar mipahinumdom sa mga Santos sa Ulahing mga Adlaw sa Uganda nga sila mga pioneer sa pagtukod sa Simbahan sa ilang nasud. Siya mipahinumdom sa mga miyembro sa Kenya sa kaimportante sa kanunay nga pagpakita og gugma sa panimalay.
  - Si Elder Quentin L. Cook mitudlo sa mga miyembro sa Central America sa kaimportante sa pagserbisyo sa Dios, sa usag usa, ug sa ilang mga silingan.
- Sa pagkat-on og dugang mahitungod sa pagpangalagad sa mga Apostoles, adto sa [lds.org/prophets-and-apostles](http://lds.org/prophets-and-apostles). ■



ANG  
SIMBAHAN SA  
**Brazil**  
ANG UMAABUT  
MIABUT SA KATAPUSAN

**Ni Mark L. Grover**

Retirado nga propesor sa Latin America studies, sa Brigham Young University

**S**a pisikal nga gidak-on ug sa populasyon, ang Brazil mao ang ikalima sa labing dako nga nasud sa kalibutan. Apan sa 100 ka tuig ang milabay, ang populasyon migamay, ug ang pipila mipahimulos sa natural nga kahamugaway: usa ka tropikal nga klima, tambok nga mga yuta, ug usa ka abunda sa mineral ug tubig.

Si Max ug Amalie Zapf naintriga sa Brazil ug nakahukom nga mopuyo didto. Nagpasakop sila sa Simbahan sa Germany niadtong 1908 ug milalin ngadto sa Brazil niadtong Marso 1913. Isip unang nailhan nga mga miyembro sa Simbahan nga nagpuyo sa Brazil, sila naghinam-hinam nga anaa sa usa ka nasud uban sa daghan nga mga saad. Apan ang Simbahan wala natukod sa South America, ug si Max ug Amalie sa wala madugay nakaamgo nga pagkamingaw nga bation nga sila walay kahigayunan sa pagsimba ug makig-uban sa ubang mga miyembro.<sup>1</sup>

Human sa 10 ka tuig sa Brazil, nasayran nilang Max ug Amalie Zapf ang laing matinud-anong miyembro sa Simbahan, si Augusta Lippelt, kinsa milalin niadtong 1923 gikan sa Germany uban sa iyang upat ka mga anak ug dili miyembro nga bana ngadto sa Brazil sa habagatang bahin sa Santa Catarina. Ang mga Zapfs mibalhin ngadto sa Santa Catarina aron maduol sa mga Lippelts.

Paglabay sa duha ka tuig giablihan ang South American Mission sa Buenos Aires, Argentina. Ang ikaduhang presidente sa misyon, K. B. Reinhold Stoof, gikan usab sa Germany, nadasig sa pag-establisar sa Simbahan taliwala sa daghang mga langyaw nga German nga populasyon sa habagatang Brazil. Niadtong 1928 iyang gitudlo ang duha ka mga misyonaryo, si William Fred Heinz ug Emil A. J. Schindler, sa Joinville, usa ka siyudad nga dunay dakong populasyon sa mga langyaw nga German. Pagka 1930, si Presidente Stoof mibisita sa mga Zapfs ug mga Lippelts ug mitukod og branch, diin ang duha ka mga pamilya sa katapusan makasimba ug makaambit na sa sakrament.

Unsay kalainan ang mahimo sa 100 ka tuig. Sa wala pa moabut ang Zapfs niadtong 1913, ang Brazil walay mga miyembro, walay mga misyonaryo, ug walay organisasyon sa Simbahan. Karon labaw sa usa ka milyon ka mga miyembro nagpuyo sa Brazil, ang nasud nga ikatulo nga dunay kinadak-ang populasyon sa



*Kini nga mga misyonaryo nagserbisyo sa Rio de Janeiro sa hinaposa nga bahin niadtong 1930, lakip ni Daniel Shupe, kinsa mitabang sa paghubad sa Basahon ni Mormon ngadto sa Portuguese.*

kini ngadto sa Portuguese, ang opisyal nga pinulongan sa nasud. Ang mga misyonaryo nagserbisyo sa daghang mga siyudad sa tibuok nasud hangtud sa Ikaduhang Gubat sa Kalibutan nga kinahanglan silang mobiya sa nasud. Ang mga misyonaryo mibalik human sa gubat, ug ang buhat nagsugod na usab.

Sa siyudad sa Campinas, sa estado sa São Paulo, pipila ka batan-ong mga lalaki ug babaye nagpasakop ug nagpabiling matinud-anon. Usa niadtong unang mga miyembro mao si Antônio Carlos Camargo. Mipasakop siya sa dihang tin-edyer pa niadtong 1947, nakig-date ug naminyo sa usa ka miyembro sa Simbahan, ug niadtong 1954 mieskwela sa Brigham Young University ug sa wala madugay sa University of Utah. Siya ug ang iyang asawa mibalik ngadto sa Brazil niadtong 1963 alang sa iyang trabaho sa

**HAN-AY SA MGA PANGHITABO [TIME LINE]**

1928: Unang mga misyonaryo nga gipadala ngadto sa Brazil taliwala sa German-speaking nga populasyon sa Joinville

1930: Miorganisar sa unang branch, sa Joinville

▼ 1931: Unang meetinghouse nga gipangag-ya sa Simbahan sa South America nga gipahinungod, sa Joinville



► 1935: Unang misyon nga natukod, punoang buhatan sa São Paulo



mga miyembro sa Simbahan (sunod sa Estados Unidos ug Mexico). Ang Simbahan karon adunay mga kongregasyon sa tibuok estado ug dagkong mga siyudad sa Brazil. Ang mga kaliwat nila ni Max ug Amalie nakatagamtam sa mga benepisyo sa usa ka lig-on ug madasigon nga Simbahan sa usa ka talagsaon ug madanihon nga kasaysayan.

**Nagtubo nga Sama sa usa ka Tugas**

Usa ka panagna nga gihatag didto sa Argentina niadtong 1926 ni Elder Melvin J. Ballard (1873–1939) sa Korum sa Napulog Duha ka mga Apostoles nagsugyot nga ang rehiyon sa sinugdanan hinay nga nagtubo, apan kini sa umaabut modako og maayo. Nanagna siya: “Ang buhat sa Ginoo motubo sa hinay-hinay dinhi sama sa usa ka tugas nga motubo sa hinay-hinay gikan sa usa ka liso. Dili kini mosulbong sa usa ka adlaw sama sa sunflower nga daling motubo ug dayon mamatay.”<sup>2</sup>

Pipila lamang ang nagpamiyembro sa Simbahan sa nag-unang katuigan sa Brazil Mission, nga giablihan niadtong 1935. Ang Simbahan naglihok sa kasagaran sa pinulongan nga German hangtud 1940, sa dihang giusab

usa ka kompanya sa textile ug nahibulong sa pagtubo sa Simbahan. Sa dihang mibiya sila niadtong 1954, dihay pipila lamang ka gagmay nga mga branch, gidumala sa usa sa mga Amerikano nga mga misyonaryo. Hinoon, atol sa ilang pagkawala sa siyam ka tuig, hapit 16,000 ka mga taga-Brazil ang nagpasakop sa Simbahan, lakip sa daghang batan-ong mga pamilya kinsa dunay abilidad sa pagpangulo ug matinud-anong pasalig. Si Antônio namahayag, “Sila mga hamili ug halangdon nga gipili sa Ginoo dinhi sa São Paulo.”<sup>3</sup>

Niadtong 1966, 31 ka tuig human maablihi ang Misyon sa Brazil, ang unang stake sa South America naorganisar sa São Paulo. Si Elder Spencer W. Kimball (1895–1985), kaniadto sakop sa Korum sa Napulog Duha ka mga Apostoles, miorganisar sa stake uban ni Walter Spät isip presidente ug si Antônio isip iyang ikaduha nga magtatambag.

Pipila lamang sa bag-ong mga lider ang nakakita sa usa ka stake. Apan ang Ginoo miandam ni Antônio, kinsa dunay daghang mga kasinatian sa simbahan sa Estados Unidos ug nakahimo sa pagtabang sa mga kapanguloan sa stake. Gikan sa pagpangulo sa mga ward ug branch

nianang unang stake miabut ang mga lider alang sa dugang daghang mga stake. Ang ilang impluwensya nabati sa tibuok nasud samtang ang organisasyon sa stake nagsugod sa madasigon nga kalamboan.


### Panahon sa Paglambo

Usa ka wala damha nga mga pahibalo nakaaghat og mas dako nga pagtubo sa Simbahan sa Brazil: ang pagtukod sa templo. Ang mga miyembro nasayud sa kaimportante sa mga templo, apan ang kadaghanan nakakita lamang sa mga litrato. Ang pinakaduol nga templo anaa sa Estados Unidos, liboan ka milya ang gilay-on. Si Presidente Kimball mibisita sa Brazil niadtong Marso 1975 ug sa usa ka regional conference mipahibalo sa pagtukod og templo sa São Paulo. Hilabihan nga kahinam ug sakripisyo sa panalapi

samang higayon, si Presidente Kimball mihangyo sa mga presidente sa stake sa Brazil sa paghimo og mga tumong aron sa pagdugang sa gidaghanon sa kabatan-onan nga taga-Brazil nga matawag sa pagserbisyo og misyon. Sa wala madugay labaw sa katunga sa mga misyonaryo nga nagserbisyo sa Brazil mga lumad nga taga-Brazil. Kining returned nga mga misyonaryo sa wala madugay nahimong lokal nga mga lider sa Simbahan.

Apan ang pagtubo sa Simbahan nakasugat og: kakulang sa kasinatian sa mga miyembro. Kini nga hagit, hinoon, dunay positibo nga resulta: kini nagkinahanglan og dugang nga hugot nga pagtuo ug espirituhang giya tali sa mga miyembro. Sama pananglit, niadtong Nobyembre 1992 usa ka stake naorganisar sa Uruguaiiana, sa kasadpang bahin sa Brazil, layo sa na-establisar nga stake sa Simbahan. Usa ka

► 1939:  
Basahon  
ni Mormon  
gimantala sa  
Portuguese



1954: Unang hi-  
gayon nga usa ka  
Presidente sa Sim-  
bahan, si David O.  
McKay, mibisita sa  
nasud

1959:  
Ikaduha  
nga misyon  
naorganisar

1966: Unang  
stake natukod sa  
South America,  
São Paulo Brazil  
Stake

► 1978:  
Unang  
templo gipa-  
hinungod  
sa South  
America, sa  
São Paulo



nakapahaman niini niadtong 1978. Mga miyembro mita-  
bang sa pagbayad sa bili sa pagtukod sa templo pinaagi sa  
mga donasyon. Daghan nila mibaligya sa ilang mga sakya-  
nan, alahas, ug yuta aron makakwarta alang sa ilang mga  
donasyon.

Ang pagpahinungod sa templo niadtong Oktubre ug  
Nobyembre 1978 giunhan niadtong Hunyo pinaagi sa pag-  
padayag sa priesthood (tan-awa sa Opisyal nga Pahayag 2).  
Kini nga pagpadayag nagpasabut nga ang tanang takus nga  
mga miyembro sa Brazil makaapil sa pagpahinungod ug sa  
mga panalangin sa templo.

Ang mga pagpadayag sa priesthood ug pagpahinungod  
sa templo maoy nakapasiugda sa usa sa dakong misyo-  
naryo nga kalampusan nga nakita sa Simbahan: labaw sa  
700,000 ka mga taga-Brazil nagpamiyembro sa Simbahan  
sa misunod nga duha ka dekada.

Dugang nga mga panghitabo nakapadugang niini nga  
pagtubo. Ang nasud nakasinati og importante nga politikal  
ug sosyal nga kausaban nga nakaingon sa pagtubo. Dag-  
hang mga taga-Brazil mibalhin ngadto sa urban nga mga  
dapit ug nahimong mas bukas sa bag-ong relihiyon. Sa

matinud-anon ug dugay na nga miyembro sa Simbahan, si  
José Candido Ferreira dos Santos, gitawag isip patriyarka sa  
bag-ong natukod nga stake, siya nabalaka. Siya mipasabut  
ngadto sa General Authority: “Dili ko mahimong usa ka  
patriyarka. Wala koy ideya kon unsa kana. Wala ko maka-  
hinumdom sukad nga nakahimamat og patriyarka ug wala  
gani koy patriyarkal nga panalangin.” Ang General Authority  
misugyot og solusyon. Sa silingang siyudad sa Alegrete, usa  
ka bag-ong patriyarka, si Ruí Antônio Dávila, bag-ohay  
usab nga natawag ug anaa sa susamang sitwasyon. Ang  
duha ka mga patriyarka kinahanglan mohatag og patriyar-  
kal nga panalangin sa usag usa.

Samtang nagdawat si Brother Santos sa iyang mga pana-  
langin gikan ni Brother Dávila, natingala siya dihang nadu-  
ngog niya ang mga panalangin nga gipamulong kalabut sa  
iyang nangagi ug sa iyang personal nga tinguha nga walay  
kahigayunan nga mahibaloan sa patriyarka. Sa dihang si  
Brother Santos na sad ang mihatag og panalangin sa ulo  
ni Brother Davila, nakahilak sila sa samang kasinatian ang  
nahitabo. Ang duha ka mga tawo pagkahuman nagginaksa-  
nay uban sa lawom nga pagsabut sa unsay nahitabo.<sup>4</sup> Sama



nga ang Espiritu midasig nila sa paghatag sa ilang unang patriyarkal nga panalangin, ang Espiritu midasig kanila samtang sila mihatag sa gatusan pa ka mga tawo. Ang Ginoo mihatag og daghang mga espirituhanong mga panalangin sa usa ka nasud diin ang mga kasinatian sa Simbahan limitado.

### Makanunayong Pundo sa Edukasyon

Ang kakulang sa edukasyon sa mga miyembro mao ang laing hagit. Kasagaran, kon ang mga misyonaryo mouli na, sila andam sa espirituhanon apan kulang sa edukasyon sa pag-angkon og igo nga panarbaho. Si Reinaldo Barreto, usa ka presidente sa stake

ug makatrabaho, apan ang tinuod nga kalampanan sa programa mao nga makita ang ilang lebel sa pagsalig nga molambo. Sila dunay dakong paglaum.”<sup>5</sup>

### Mahalaron nga mga Miyembro

Ang kalig-on sa Simbahan sa Brazil dili lamang sa gidaghanon sa mga miyembro apan usab sa ilang pagkamahalaron sa ebanghelyo. Sama pananglit, si Gelson Pizzirani, usa ka retirado nga tigdumala sa airline, gitanyagan og usa ka mahagiton ug nindot kaayo nga trabaho: pagtabang sa pagtukod og usa ka bag-ong airline sa Brazil. Sa samang higayon, siya ug ang



◀ 1985: Si Elder Helio R. Camargo gitawag isip General Authority, labing una gikan sa Brazil

1986: Brazil nahimong ikaupat nga nasud nga dunay kapin sa 50 ka mga stake

1987: Ang Brazil Area gitukod


1993: Ang Brazil nahimong ikatulo nga nasud nga dunay 100 ka mga stake



◀ 1997: Ang ikaduhang pinakadako nga missionary training center sa Simbahan natukod sa São Paulo



sa São Paulo, mipasabut, “Usa gayud ka hagit ang pagpangita og trabaho. Daghang mga misyonaryo nawagtangan og paglaum sa pag-uswag, gani nawala ang ilang espirituhanong kalig-on sa ilang mga misyon.” Edukasyon mao ang yawe kanunay sa pagbuntog niini nga hagit.



Tungod niini, sa pag-establisar sa Perpetual Education Fund [Makanunayong Pundo sa Edukasyon] ni Presidente Gordon B. Hinckley (1910–2008) niadtong 2001 nakapanalangin kini sa liboan ka mga returned missionary. Kini naghatag nila og mga oportunidad sa pagbansay, nga miresulta sa mas maayo nga trabaho. Ang mga miyembro mas makasuporta sa pamilya ug pagpalapad pa sa ilang mga edukasyon. Si Presidente Barreto, kinsa nahimong tigdumala sa programa sa PEF [MPE] sa Brazil, miingon, “Usa ka panalangin nga makita ang batan-ong mga miyembro makahuman sa ilang edukasyon

Sukad niadtong 1999, liboan ka mga miyembro sa Brazil nakaserbisyo sa ilang mga komunidad isip kabahin sa mga paningkamot sa Mormon Helping Hands.





iyang asawa, si Miriam, gitawag sa pagdumala sa Brazil Brasília Mission. Walay pangutana kon unsay buhaton. Sukad sa ilang bunyag isip mga tin-edyer, ilang gipahinungod ang ilang kinabuhi ngadto sa Simbahan. Sa wala pa ang ilang kaminyoon, si Brother Pizzirani gitawag sa pagserbisyo isip presidente sa branch. Siya gitawag nga mahimong presidente sa stake sa edad nga 25 ug midawat og laing daghang ubang mga calling, lakip ang Area Seventy. Si Sister Pizzirani nagserbisyo sa stake ug ward Relief Society, Young Women, ug mga calling sa Primary. Siya mipahayag sa iyang mga pagbati mahitungod sa mga panalangin sa ebanghelyo: “Ang akong kinabuhi klarong napanalanginan tungod kay ako naningkamot sa pagsunod sa mga sugo. Alang sa matag sugo nga akong sundon, ako makadawat og panalangin.”<sup>6</sup>



▲ 2000: Ang Recife ug Porto Alegre Brazil Temple gipahinungod

2002: Ang Campinas Temple gipahinungod

2002: Mormon Helping Hands makadawat sa nasyonal nga pahalipay isip usa sa labing importanting organisasyon sa bolunter sa Brazil



◀ 2008: Ang Curitiba Temple gipahinungod



▲ 2012: Ang Manaus Temple gipahinungod

Human sa ilang misyon sa Brasília, ang ilang mga plano nga manimuyo nabalda sa usa ka mubo nga tawag sa pagserbisyo isip presidente sa Brazil Campinas Mission. Human sa pipila ka bulan nga pahulay, sila midawat sa tawag niadtong 2013 nga mahimong presidente ug matron sa Recife Brazil Temple. Usa sa mga misyonaryo kinsa nagbunyag ni Brother Pizzirani bag-ong gitawag uban sa iyang asawa sa pagserbisyo sa Recife Temple, diin ang misyonaryo ug kinabig nagserbisyo og dungan.

Ang ehemplo sa mga Pizziranis sa pagbiya sa mga oportunidad sa panarbaho aron moserbisyo sa Ginoo makadagis apan kasagaran tali sa matinud-anong mga miyembro sa Brazil.

Ang 100 ka tuig sukad miabut ang pamilyang Zapf sa Brazil nakakita og daghang positibong mga kausaban apan usab panagsa nga mga kalisud. Ang mga propeta nga nakabisita, bisan pa niana, wala magduha-duha sa pagpahayag og hugot nga pagtuo sa kaugmaon sa nasud. Kadto nga mga panagna natuman samtang ang Brazil mipahimutang sa kalibutan isip lider sa ekonomikanhong pagtubo ug kalamboan. Ang mga kaliwat sa mga

## PAGTUBO SA SIMBAHAN SA BRAZIL

1935	1938	1948	1958	1968	1978	1988	1998	2008	2013	ANG SIMBAHAN SA BRAZIL *
148	216	536	1,454	31,635	54,410	265,286	703,210	1,060,556	1,239,166	Mga miyembro: 1,239,166

Mga stake: 242  
Mga Misyon: 32  
Mga Templo:  
6 ang nag-operate, 2 gitukod pa



\* Pagka Nobyembre 2013

Zapfs—sa ilang tinuod nga mga kaliwat ug niadtong kinsa misunod sa ilang mga tunob diha sa ebanghelyo—nag-ani sa mga kaayohan sa kakugi ug pailub niadtong unang mga paningkamot sa pagtanom sa mga liso sa ebanghelyo. Ang ikaduha nga bahin sa panagna ni Elder Melvin J. Ballard nga gihatag niadtong 1926 nahitabo: “Liboan ang magpamiyembro sa Simbahan dinhi. Kini gibahin ngadto sa labaw sa usa ka misyon ug mahimong usa sa labing lig-on sa Simbahan.” ■

### MUBO NGA MGA SULAT

1. Sibila Hack Nunes (apo ni Max ug Amalie Zapf), giinterbyu ni Michael si Landon, Curitiba, Brazil, Hulyo 30, 2004, Church History Library.
2. Melvin J. Ballard, sa Bryant S. Hinckley, *Sermons and Missionary Services of Melvin Joseph Ballard* (1949), 100.
3. Antônio Carlos Camargo, giinterbyu ni Mark L. Grover, São Paulo, Brazil, Hunyo 27, 2006, Harold B. Lee Library, p. 22.
4. Jose Candido Ferreira dos Santos, giinterbyu ni Mark L. Grover, Rio Grande do Sul, Brazil, Mayo 4, 2010, Harold B. Lee Library; Rui Antonio Dávila, giinterbyu ni Mark L. Grover, Rio Grande do Sul, Brazil, Mayo 5, 2010, Harold B. Lee Library.
5. Reinaldo de Souza Barreto, giinterbyu ni Mark L. Grover, São Paulo, Brazil, Hunyo 16, 2006, Harold B. Lee Library, p. 14.
6. Miriam da Silva Sulé Pizzirani, giinterbyu ni L. Grover, São Paulo, Brazil, Marso 21, 1982, Harold B. Lee Library, p. 7.



**Ni Elder  
Russell M. Nelson**

Sa Korum sa  
Napulog Duha ka  
mga Apostoles

# ANG Basahon ni Mormon, ANG Pagpundok sa Israel, UG ANG Ikaduhang Pag-anhi

*Ang pag-abut sa Basahon ni Mormon mao ang usa ka makita nga timailhan sa kalibutan nga ang Ginoo misugod pagpundok sa Israel ug pagtuman sa mga pakigsaad nga Iyang gihimo ngadto ni Abraham, Isaac ug Jacob.*

**A**ng Kapitulo 5 sa *Isangyaw ang Akong Ebanghelyo: Usa ka Giya ngadto sa Misyonaryo nga Pangalagad* hingpit nga gigahin ngadto sa Basahon ni Mormon. Kini nga kapitulo nagtudlo nga ang Basahon ni Mormon:

- Mao ang sukaranan sa atong relihiyon.
- Nagpamatuod ni Jesukristo.
- Nagsuporta sa Biblia.
- Motubag sa mga pangutana sa kalag.
- Nagdasig sa mga tawo sa pagpaduol sa Dios.



Kining tanang pamahayag tinuod gayud, apan kini nahimo gikan sa atong panglantaw isip mortal nga binuhat. Unsa kaha ang panglantaw sa atong Amahan sa Langit ug sa Iyang Hinigugmang Anak, si Jesukristo, diha sa Basahon ni Mormon?

Ang Ilang panglantaw siguradong naumol sa duha ka dugay na nga mga saad nga Ilang gihimo ngadto sa tanang katawhan. Kining duha ka mga saad may kalambigitan, na-dokumentuhan, padayong gipatuman, ug gani pagatumanon pa. Ang una mao ang Ilang saad kaniadto sa pagpundok sa nagkatibulaag nga Israel. Ang ikaduha mao ang Ilang dugay na nga mga saad sa Ikaduhang Pag-anhi sa Ginoo.

### Ang Pakigsaad ni Abraham ug sa Balay ni Israel

Ang dispensasyon ni Abraham, ang Dios mihimo og pakigsaad uban ni Amahang Abraham nga pinaagi niini nga kaliwatan, mga tawo sa tanan nga mga nasud mapanalaninan. Laing importante nga bahin niana nga saad gihimo

usab. Kini nga mga saad, unang gihatag ngadto ni Abraham ug sa wala madugay ngadto ni Isaac ug Jacob, naglakip sa:

- Usa ka dako nga kaliwatan.<sup>1</sup>
- Ang kabilin sa piho nga mga yuta.<sup>2</sup>
- Ang binhi ni Abraham nga naghupot sa priesthood ngadto sa tanan nga mga nasud, aron ang tanan unta mapanalaninan pinaagi sa kaliwatan ni Abraham.<sup>3</sup>
- Kadtong dili kaliwat gikan ni Abraham kinsa modawat sa ebanghelyo mahimong binhi ni Abraham pinaagi sa pagsagop.<sup>4</sup>
- Ang Manluluwas sa kalibutan moabut pinaagi sa kaliwatan ni Abraham.<sup>5</sup>

Daghan sa kaliwatan ni Abraham—sa mga tribo sa karang Israel—sa katapusan misalikway sa mga pagtulunan sa Ginoo ug mipatay sa mga propeta. Ang mga napulo ka mga tribo gidala nga bihag ngadto sa Asiria. Gikan didto nawala sila sa mga rekord sa mga katawhan, apan wala



mawala sa Ginoo. Duha ka mga tribo nagpabilin sulod sa mubo nga panahon, apan tungod sa ilang pagsukol sila nabihag ngadto sa Babelon. Sa dihang mibalik na sila, sila gipaboran sa Ginoo, apan misalikway sila pag-usab Kaniya!

### Ang Pagkatibulaag ug Pagkapundok sa Israel

Usa ka mahigugmaon apan nagmasulub-on nga Amahan mipatibulaag sa Israel sa layo ug halapad, apan misaad Siya nga moabut ang adlaw nga ang nagkatibulaag nga Israel pagapundokon balik ngadto sa panon. Kini nga saad sama ka klaro sa saad sa pagkatibulaag sa Israel.<sup>6</sup> Si Isaias, pananglit, nakakita nga sa ulahing mga adlaw ang Ginoo mopadala og “matulin nga sinugo” ngadto niining mga tawo, kinsa mga “binutad ug mahinlo” (Isaias 18:2, 7).

Sama sa gipanagna, *tanan* nga mga butang ipahiuli niini nga dispensasyon. Busa, ang dugay nang gihulat nga pagpundok sa nagkatibulaag nga Israel kinahanglan gayud nga moabut isip kabahin niana nga pagpahiuli.<sup>7</sup> Sa pagpundok sa Israel kabahin sa ikaduhang saad tungod kay ang pagpundok gikinahanglan nga pasiuna sa Ikaduhang Pag-anhi sa Ginoo.<sup>8</sup> Pag-usab, kana nga langitnong panglantaw klaro kaayo.

Kini nga konsepto sa pagpundok mao ang usa sa mga importanting pagtulun-an sa Ang Simbahan ni Jesukristo sa mga Santos sa Ulahing mga Adlaw. Ang Ginoo mipahayag, “Ako mohatag nganha kaninyo og usa ka timailhan . . . nga



ako mopundok, gikan sa ilang dugay nga pagkatibulaag, sa akong mga katawhan, O balay ni Israel, ug motukod pag-usab taliwala kanila sa akong Zion” (3 Nephi 21:1).

Ang pag-abut sa Basahon ni Mormon mao ang makita nga timailhan sa kalibutan nga ang Ginoo misugod sa pagpundok sa Israel ug pagtuman sa mga pakigsaad nga Siya mihimo ngadto ni Abraham, Isaac ug Jacob.<sup>9</sup> Wala lamang nato itudlo kini nga konsepto, apan kita usab makaapil niini! Miapil kita samtang nagtabang kita sa pagpundok sa mga pinili sa Ginoo sa duha ka bahin sa tabil.

Sa kalooy, ang pagdapit sa “pagduol ngadto kang Kristo” (Jacob 1:7)<sup>10</sup> mahimo usab nga ihatag ngadto niadtong kinsa namatay nga walay kahibalo sa ebanghelyo.<sup>11</sup> Kabahin sa pagpangandam alang niadtong kinsa nagpuyo sa pikas nga bahin sa tabil nagkinahanglan og yutan-ong paningkamot niadtong kinsa nagpuyo dinhi nga bahin sa tabil. Kita magtipon og mga pedigree chart, maghimo og family group sheet, ug maghimo og halili [vicarious] nga buhat sa templo sa pagpundok sa mga tawo ngadto sa Ginoo ug ngadto sa ilang mga pamilya.<sup>12</sup>

Kining dispensasyon sa kahingpitan sa panahon nakita sa Dios isip panahon sa pagpundok, sa langit ug dinhi sa yuta. Ang Apostol nga si Pedro nasayud nga human sa usa ka panahon sa apostasiya, ang usa ka pagpahiuli moabut. Siya namahayag:

“Busa paghinulsol kamo, ug pamalik na kamo kaniya, aron mapala ang inyong mga sala, aron ang mga panahon sa kahayahay magaabut gikan sa atubangan sa Ginoo; . . .

“Siya nga pagahawiran una sa langit hangtud sa panahon sa pagtuman na sa tanang gisulti sa Dios pinaagi sa ba-ba sa iyang mga balaang propeta sukad pa sa karaang kapanahonan” (Mga Buhat 3:19, 21).

Sa atong panahon, sila si Pedro, Santiago ug Juan gipadala sa Ginoo uban sa “mga yawe sa [Iyang] mga gingharian, ug usa ka dispensasyon sa ebanghelyo alang sa katapusan nga higayon; ug alang sa kahingpitan sa panahon,” diin Siya “mopundok ngadto sa usa sa tanan nga mga butang, nga anaa sa langit, ug anaa sa yuta” (D&P 27:13).<sup>13</sup>

Daghang mga aspeto sa pakigsaad ni Abraham natuman na. Ang Manluluwas sa kalibutan sa pagkatinuod moabut pinaagi sa kaliwatan ni Abraham, pinaagi sa anak ni Jacob nga si Juda. Ang yuta gigahin alang sa kabilin sa dugay nang panahon. Usa ka mapa sa LDS nga edisyon sa Biblia nagpakita kon sa unsang paagi nga ang yuta napanunod pinaagi sa mga tribo gibahin taliwala sa mga kaliwat ni Reuben, Simeon, Juda, Issachar, Zabulun, Dan, Neptali, Gad, Aser, si Benjamin ug ni Joseph (gibahin tali sa iyang



anak nga lalaki, si Ephraim ug Manases).<sup>14</sup> Agig dugang sa kabilin ni Joseph diha sa Balaan nga Yuta, nakat-unan nato gikan sa Basahon ni Mormon nga ang yuta gigahin alang sa usa ka salin sa balay ni Jose mao ang America nga bahin sa kalibutan.<sup>15</sup>

Ang dakong saad nga ang *tanang* nasud mapanalanginan pinaagi sa kaliwatan ni Abraham, Isaac, ug Jacob kinahanglan pa nga matuman. Apan kini nga saad sa pagpundok, nga gihisgutan sa tanang mga kasulatan, matuman sama ka sigurado sa mga panagna sa pagkatibulaag sa Israel.<sup>16</sup>

### Ang Pagpundok isip Pasiuna ngadto sa Ikaduhang Pag-anhi

Nganong importante kaayo kini nga saad sa pagpundok? Tungod kay ang pagpundok sa Israel gikinahanglan sa pag-andam sa kalibutan alang sa Ikaduhang Pag-anhi! Ug ang Basahon ni Mormon mao ang instrumento sa Dios nga gikinahanglan sa pagtuman niining *duha* ka balaang mga tumong.<sup>17</sup>

Ang Basahon ni Mormon usa ka gasa gikan sa Dios sa tibuok kalibutan. Mao kini ang bugtong nga basahon nga gipamatuod sa Ginoo nga tinuod.<sup>18</sup> Kini usa ka gasa gikan ni Nephi, Jacob, Mormon, Moroni, ug ang dinasig ug namartir nga tighubad, si Propeta

Joseph Smith. Ang Basahon ni Mormon mao ang tuyo nga gitumong ngadto sa salin sa balay ni Israel.<sup>19</sup>

Kabahin sa Ikaduhang Pag-anhi, kita nasa-yud nga kini mao ang “hapit na moabut, ug diha sa usa ka panahon nga moabut” (D&P 63:53). Ug kon ang Manluluwas moanhi pag-usab, dili gayud kini matago.<sup>20</sup> Sa kasamtangan, ang dakong buhat kinahanglan gayud pagahimoon sa pagpundok sa Israel ug sa pag-andam sa kalibutan sa mahimayaong Ikaduhang Pag-anhi.

### Ang Pagpundok sa Israel Niini nga Dispensasyon

Salamat sa Basahon ni Mormon, nasayud kita kon kanus-a kining gisaad nga pagpundok mahitabo: “Busa, ang atong amahan wala mamulong sa atong binhi lamang, apan ngadto usab sa tanan nga balay ni Israel, nagtudlo sa pakigsaad diin kinahanglan matuman *sa ulahing mga adlaw*; diin nga pakigsaad gihimo sa Ginoo ngadto sa atong amahan si Abraham, nag-ingon: Sa imong binhi ang tanan nga mga kaliwatan sa yuta mapanalanginan” (1 Nephi 15:18; empasis gidugang).

Unom ka gatus ka tuig sa wala pa matawo si Jesus didto sa Bethlehem, ang mga propeta

**Ang mga Santos sa matag yuta makabaton og managsama nga pag-angkon sa mga panalangin sa Ginoo. Ang espirituhanong seguridad kanunay magdepende unsaon nato pagpuyo, dili diin kita nagpuyo.**



***Diha sa templo atong madawat ang atong labing taas nga panalangin, sama sa gisaad ngadto sa mga binhi ni Abraham, Isaac ug Jacob.***

nahibalo nga ang pagpundok sa Israel mahitabo “sa ulahing mga adlaw.”

Sa mga Santos sa ulahing mga adlaw, ang napasidunggan nga ngalan nga *Abraham* importante. Matag miyembro sa Simbahan masumpay ngadto ni Abraham.<sup>21</sup> Ang Ginoo mimatuod sa pakigsaad ni Abraham sa atong panahon pinaagi ni Propeta Joseph Smith.<sup>22</sup> Diha sa templo atong madawat ang atong labing taas nga panalangin, sama sa gisaad ngadto sa mga binhi ni Abraham, Isaac ug Jacob.<sup>23</sup>

Kinahanglan kitang makaangkon nianang langitnong panglantaw. Kinahanglan kitang masayud sa pakigsaad ni Abraham ug makasabut sa atong responsibilidad sa pagtabang sa pagpahinabo sa gisaad nga pagpundok sa Israel. Kinahanglan natong masayran *nganong* kita dunay kahigayunan sa pagdawat og patriyarkal nga panalangin ug makahibalo sa atong koneksyon ngadto sa karaang mga patriyarka. Kinahanglan kitang masayud nga ang anak ni Jacob nga si Joseph nahimo nga anak nga may katungod sa pagkatawo human mawala ni Reuben ang iyang katungod sa pagkatawo.<sup>24</sup> Si Joseph ug ang iyang mga anak, si Ephraim ug Manases, nahimo nga binhi sa paggiya sa pagpundok sa Israel.<sup>25</sup> Ang ubang mga tribo mosunod.

Hunahunaa kadtong langitnong mga mensahero kinsa nagdala og bililhong mga yawe sa priesthood ngadto sa gipahiuli nga Simbahan sa Ginoo. Niadtong Abril 3, 1836, human ang Ginoo midawat sa Kirtland Temple, miabut si Moises, kinsa mipahiuli sa “mga yawe sa pagpundok sa Israel” (D&P 110:11). Human niini, “Si Elias mipakita, ug mitugyan sa kapaigoan sa ebanghelyo ni Abraham, miingon nga diha kanamo ug sa among binhi sa tanan nga mga kaliwatan nga mosunod kanamo pagapanalanginan” (D&P 110:12). Sa ingon ang pakigsaad ni Abraham gibag-o isip kabahin sa Pagpahiuli! Dayon miabut si Elias, kinsa mipahiuli sa mga yawe sa pagbugkos, sumala sa gipagnagna ni Malaquias.<sup>26</sup> Gikinahanglan kadto nga mga yawe aron sa pagbugkos sa mga pamilya sa napundok nga Israel ug makahimo nila nga matagamtaman ang labing mahinungdanon sa tanan nga mga panalangin, ang kinabuhing dayon.

Unsa ang panglantaw sa Amahan ug sa Anak kabahin sa Basahon ni Mormon? Ila kining nakita isip ebidensya sa propetikanhon nga tawag ni Joseph Smith. Ila kining nakita isip instrumento diin ang mga tawo magkat-on pa mahitungod ni Jesukristo, motuo sa Iyang ebanghelyo, ug moapil sa

Iyang Simbahan. Ila kining nakita isip mga teksto sa pagklaro sa atong koneksyon uban sa balay ni Israel sa biblia. Ang Basahon ni Mormon mipahayag nga ang sinugdanan sa pagpundok<sup>27</sup> ug mao ang instrumento sa Dios sa pagpahinabo niana nga panagpundok. Kon wala ang Basahon ni Mormon, walay pagpundok sa Israel.<sup>28</sup>

Ang Basahon ni Mormon naglangkob sa kahingpitan sa ebanghelyo. Kon wala ang Basahon ni Mormon, gamay ra kitag mahibaloan mahitungod sa Pag-ula ni Jesukristo.<sup>29</sup> Tungod kay kini nagtudlo sa Pag-ula, ang Basahon ni Mormon nagtabang nato sa paghinulsol, paghimo ug paghupot og sagradong mga pakigsaad, ug makadawat sa mga ordinansa sa kaluwasan ug kahimayaan. Kini modala nato ngadto sa templo, diin kita mahimong sarang alang sa kinabuhing dayon.

Dinhi sa yuta makabaton kita nianang langitnong panglantaw sa tanan natong gibuhat. Uban niana nga panglantaw, atong makita nga ang misyonaryo nga buhat importante kaayo alang sa pagpundok sa Israel. Sa daghang mga nasud, ang atong mga misyonaryo nagsiksik alang sa mga nagkatibulaag nga Israel.

Ang Zion anaa kon ang matarung nga mga Santos nagpundok.<sup>30</sup> Publikasyon, komunikasyon, ug mga kongregasyon naghatag hapit tanan nga mga miyembro sa Simbahan og access sa doktrina, mga yawe, mga ordinansa, ug mga panalangin sa ebanghelyo, bisan asa pa sila. Para sayon sa mga Santos sa tibuok kalibutan, 143 ka mga templo anaa, ug daghan pa ang umaabut.<sup>31</sup>

Ang mga Santos sa matag yuta makabaton og managsama nga pag-angkon sa mga panalangin sa Ginoo. Espirituhanong seguridad kanunay magdepende *unsaon* nato sa pagpuyo, dili *diin* kita nagpuyo.

Ang pagpundok sa Israel *dili* mao ang katapusan. Kini mao lamang ang sinugdanan. Ang tumong nga atong gitinguha paglahutay naglakip sa mga ordinansa sa endowment ug pagbugkos diha sa templo. Naglakip kini sa atong pagsulod sa relasyon sa pakigsaad sa Dios pinaagi sa kaliwat o sa pagsagop ug dayon magpuyo uban Kaniya ug sa atong mga pamilya sa kahangturan. Mao kana ang himaya sa Dios—kinabuhing dayon alang sa Iyang mga anak.<sup>32</sup>

Ang atong mahigugmaong Amahan sa Langit gusto gayud nga ang Iyang mga anak makabalik ngadto Kaniya, dili sa pagpamugos apan pinaagi sa tagsa-tagsa nga mga pagpili ug sa personal nga pagpangandam. Ug Siya gusto nga sila mabugkos isip mahangturong mga pamilya.

Mao kana ang panglantaw sa atong Langitnong Amahan.

Mao kana ang panglantaw sa Hinigugma nga Anak. Ug kini mahimong mao usab ang atong panglantaw. ■

*Gikan sa pakigpulong nga gihatag atol sa seminar alang sa bag-ong mga presidente sa misyon sa Provo Missionary Training Center niadtong Hulyo 26, 2013.*

#### MUBO NGA MGA SULAT

1. Tan-awa sa Genesis 13:16; 22:17; Abraham 3:14.
2. Tan-awa sa Genesis 12:1, 7; Abraham 2:6.
3. Tan-awa sa Abraham 2:9, 11.
4. Tan-awa sa Mga Taga-Galatia 3:26–29; Abraham 2:10.
5. Tan-awa sa Genesis 49:10, 24.
6. Tan-awa sa Isaias 11:12; 22:16–18; 3 Nephi 15:20–22; Abraham 2:10–11.
7. Tan-awa sa 1 Nephi 15:18; tan-awa usab sa ulohan nga pahina sa Basahon ni Mormon.
8. Tan-awa sa Doktrina ug mga Pakigsaad 133:8–17.
9. Tan-awa sa Genesis 12:2–3; 26:3–4; 35:11–12; tan-awa usab sa mga ulohan sa kapitulo sa 3 Nephi 21 ug 29.
10. Tan-awa usab sa Omni 1:26; Moroni 10:30, 32; Doktrina ug mga Pakigsaad 20:59.
11. Tan-awa sa Doktrina ug mga Pakigsaad 137:5.
12. Tan-awa sa 1 Mga Taga-Corinto 15:29; 1 Pedro 4:6.
13. Si Pablo nanagna usab sa atong panahon: “Inig abut sa tukma nga panahon [ang Ginoo] laraw sa paghiusa diha kang Kristo sa tanang mga butang, mga butang diha sa langit ug mga butang dinhi sa yuta” (Mga Taga-Efeso 1:10).
14. Tan-awa sa Genesis 35:23–26; 41:50–52. Ang mga tribo ni Levi mihatag og mga pari taliwala sa mga katawhan ug ni nalakip isip usa ka tribo ni nakadawat og usa ka kabilin sa tribu. Duha ka anak nga lalaki ni Jose, Manases ug Ephraim, gihatagan og mga kabilin sa yuta ug gihap taliwala sa mga tribo puli sa ilang amahan. Ang gidaghanon sa dose ka mga tribo nagpadayon.
15. Tan-awa sa Ether 13:8; tan-awa usab sa Genesis 49:22.
16. Tan-awa sa Levitico 26:44; Deuteronomio 4: 27–31; 28; 29; 30:1–10; Nehemias 1:9; Isaias 11:11–12; Jeremias 31:7–12; Ezequiel 37:21–22; Amos 9:14–15; Mateo 24:31; Jacob 6:2. Tan-awa usab sa Russell M. Nelson, “The Exodus Repeated,” *Ensign*, Hulyo 1999, 6–13. Ang pagpundok sa Israel gitagna diha sa Isaias 49–51 ug Jacob 5.
17. Tan-awa sa Mateo 24:14; Doktrina ug mga Pakigsaad 133:17.
18. Tan-awa sa Doktrina ug mga Pakigsaad 17:6.
19. Tan-awa sa Mormon 7:10; 9:37; Moroni 10:31–34.
20. Tan-awa sa Isaias 40:5.
21. Ang pakigsaad usab madawat pinaagi sa pagsagop (tan-awa sa Mateo 3:9; Lucas 3:8; Mga Taga-Galatia 4:5–7).
22. Tan-awa sa Doktrina ug mga Pakigsaad 124:58; 132:31–32.
23. Tan-awa sa Doktrina ug mga Pakigsaad 84:33–40; 132:19; Abraham 2:11.
24. Tan-awa sa 1 Mga Cronicas 5:1.
25. Si Ephraim gihatagan sa katungod sa pagkatawo diha sa Israel sa pagdala sa mensahe sa Pagpahiuli sa tanan nga mga nasud ug sa paggiya sa pagpundok sa nagkatibulaag nga Israel (tan-awa sa Jeremias 31:7–9; Doktrina ug mga Pakigsaad 64:36; 133:32–34).
26. Tan-awa sa Doktrina ug mga Pakigsaad 110: 13–16; tan-awa usab sa Malaquias 4: 5–6.
27. Ang doktrina nga may kalabutan sa pagkatibulaag ug pagpundok sa balay ni Israel mao ang usa sa labing unang mga leksyon nga gitudlo diha sa Basahon ni Mormon (tan-awa sa 1 Nephi 10:14).
28. Tan-awa sa Bruce R. McConkie, *A New Witness for the Articles of Faith* (1985), 554.
29. Ang pulong *pag-ula* sa bisan unsa nga mga porma makita diha sa usa lang ka bersikulo nga King James Version sa Bag-ong Tugon (tan-awa sa Mga Taga-Roma 5:11). Makita kini sa 24 ka mga bersikulo sa Basahon ni Mormon.
30. Tan-awa sa Doktrina ug mga Pakigsaad 97:21.
31. Pagka Mayo 2014.
32. Tan-awa sa Moises 1:39.





# MAGPAKAHISAMA NI Ammon

*Kini nga bayani gikan sa Basahon ni Mormon makatudlo nato og daghan kabahin sa misyonaryo nga buhat ug sa pagpaaktibo karon.*

**S**i Ammon usa ka bayani diha sa Basahon ni Mormon, nailhan sa iyang maisugong pagserbisyo nga naglakip sa pagpanalipod sa mga panon ni Lamoni, usa ka hari sa Lamanite (tan-awa sa Alma 17:25–39; 18:1–10). Ang istorya ni Ammon, sama sa ubang mga panghitabo diha sa Basahon ni Mormon, makatudlo kanato og daghan kon unsaon sa pagpahimulos sa mga oportunidad ug pagbuntog sa mga hagit nga atong giatubang karon.

## Usa ka Makahuluganong Misyon

Si Suzanne E. Tarasevich sa Millville, New Jersey, USA, nakakat-on og pipila ka mga leksyon gikan ni Ammon samtang nagserbisyo og full-time nga misyon uban sa iyang bana, si Adolf.

“Sa dihang ang dako, puti nga sobre nga anaa sa among mission call nga miabut sa among mailbox,” siya miingon, “ang akong bana ug ako nalipay kaayo. Nagpuasa ug nag-ampo mi kabahin sa among call. Dili tungod kay nabalaka mi kon *asa* ang assignment, apan nagtinguha mi og maayo sa kumpirmasyon nga ang among abilidad magamit sa pagtuman sa among calling.

“Sa wala madugay nianang gabhiona, uban sa among mga anak ug apo nga nagkapundok, among giablihan ang sobre ug gibasa ang among call ngadto sa Poland Warsaw Mission. Samtang amo kining gibuhay, mibati mi og kalinaw sa kasingkasing nga kini, mao gyud, ang buluhaton nga para namo. Nalipay gyud mi kaayo.”

Hinooon, sa pag-abut na didto sa misyon,

si Sister Tarasevich nanlimbasog sa pagsa-but kon unsay iyang mahimo. “Gihatagan dayon ang akong bana og mga buluhaton nga nakahatag niya og mga hagit, mga oportunidad sa paglambo sa pagpangulo,” siya miingon. “Bisan kon kaming duha dili makasulti og Polish, ang iyang pagserbisyo ingon og epektibo bisan pa sa mga babag sa pinulongan.” Sa laing bahin, siya miingon, “ako mibati kanunay nga walay gamit ug nag-inusara. Nagduha-duha ko sa kamahulugan sa akong mga paningkamot sa misyon.”

## Gamhanang mga Misyonaryo

Nakahunahuna si Sister Tarasevich kabahin sa talagsaong mga misyonaryo sa Basahon ni Mormon. “Sa mga katuigan isip magtutudlo sa Primary, ganahan kaayo ko sa makapadasig ug makapa-awhag nga mga istorya ni Alma ug sa mga anak nga lalaki ni Mosiah nga nagtudlo sa mga bata mahitungod sa misyonaryo nga buhat. Kon maghunahuna ko og mga misyonaryo, ang imahen sa usa ka lig-on ug gamhanang si Ammon mosantup sa akong hunahuna, ug dali nakong nahunahunaan ang aktibong mga misyonaryo sa among misyon nga daw mga anak ni Mosiah karon. Apan naghunahuna ko kon mahimo ba sa usa ka ubanon nga apohang babaye sama nako kini nga tahas.”

Samtang naghunahuna siya, miingon siya, usa ka tingog sa kinahiladman hinay nga nangutana kaniya.

“Unsa ang unang buluhaton ni Ammon?”

“Mahimong usa ka sulugoon, moatiman sa



## PAGPANGITA SA USA NGA NAWALA

“Importante sa matag usa kanato sa pagpamalandong kon unsay bation nga mawala ug unsay gipasabut sa mahimong usa ka ‘espirituhanong’ magbalantay sa mga karnero kinsa mobiya sa 99 aron sa pagpangita sa usa nga nawala. Ang ingon nga magbalantay sa karnero mahimong magkinahanglan sa kahanas ug pana-bang sa search and rescue team, apan sila anaa, andam nga motabang, mokatkat diha gayud tapad nila aron sa pagluwas niadtong kinsa hilabihan ka bilihon sa panan-aw sa Dios, kay sila lyang mga anak.”

Elder L. Tom Perry sa Korum sa Napulog Duha ka mga Apostoles, “Pagdala og mga Kalag ngari Kanako,” *Liahona*, Mayo 2009, 112.

mga panon, ug mopundok sa nagkatibulaag nga mga karnero,” siya mitubag.

“Nan, magpakahisama ka ni Ammon.”

### Andam sa Pagserbisyo

Kini nga mga hunahuna naghatag ni Sister Tarasevich og ideya. “Diha-diha dayon akong nasabtan gayud kon unsa ang akong bu-luhaton,” siya miingon. “Nakaamgo ko nga samtang dili pa ko kaayo kahibalo sa pinulongan aron maka-proselyte, ang daghang kasinatian sa Relief Society naka-andam nako sa pagserbisyo sa uban—sa pagpangita, ug paghigugma niadtong mibati nga nakalimtan ug wala maapil.”

Nausab ang iyang panglantaw sa misyonaryo nga mga paningkamot. “Akong nasayran ang daghang paagi diin ang mga baruganan nga nakasentro ni Kristo makabuntog sa mga kakulangan sa pinulongan,” siya miingon. “Akong nakita kon unsay

akong mahimo sa pag-atiman sa mga panon ug pagpundok sa nagkatibulaag nga mga karnero.”

Human niana, siya miingon, “ang kinabuhi isip usa ka senior nga misyonaryo talagsaon nga panahon sa pagkat-on ug pagserbisyo samtang kami adunay pribilehiyo nga makakita sa ebanghelyo nga nakausab ug nakapalambo sa kinabuhi niadtong midawat niini.” Kanunay siyang mibati nga daw nagkanta sa iyang gitawag nga himno ni Ammon: “Tan-awa, ang akong hingpit nga kalipay napuno, oo, ang akong kasingkasing tugob sa hingpit nga kalipay, ug ako maglipay diha sa akong Dios” (Alma 26:11).

### Pagluwas sa Karnero

Si Peggy Wallace Poll sa South Weber, Utah, nakabaton og ideya gikan kang Ammon sa dihang siya gi-assign sa pagtudlo kabahin sa pagluwas ug pagpaaktibo sa usa

*Ang pag-amuma sa matag tawo nga may gugma mao ang labing maayong paagi sa pag-sunod sa ehemplo ni Ammon.*



ka miting sa pagbansay sa pagpangulo sa priesthood ug auxiliary sa stake.

“Nagbasa sa pamilyar nga istorya ni Ammon, nakabantay ko og usa ka bag-o nga butang, siya miingon. “Hinumdumi, si Ammon nagserbisyo og misyon didto sa mga Lamanite. Siya gihatagan og buluhaton nga moatiman sa harianon nga karnero. Dihay ubang mga sulugoon uban kaniya, ug samtang ilang gidala ang karnero ngadto sa Sebus aron pa-imnon, ang mga tulisan mikatag sa panon. Nahadlok pag-ayo ang ubang mga sulugoon. Klaro kaayo, nga ang uban nga mitugot nga makatag ang mga karnero gipahamtangan sa kamatayon, ug nakasiguro nga karon mag-antus sila sa samang kapalaran. (Tan-awa sa Alma 17:25–30.)

“Apan si Ammon nakakita og oportunidad,” miingon si Sister Poll. “Iyang gisultihan ang ubang mga sulugoon nga magmaya tungod kay siya dunay plano. Basaha ang Alma 17:31–33, ug makita ninyo nga klaro kining gipasabut:

1. Unaha sa pagkahibalo nga ang mga karnero nangawala.
2. [Nagdali] uban ang tumang kalagsik.’
3. Mipundok sa tanang mga karnero.
4. Midala nila nga luwas balik sa panon.
5. Milibut kanila, miluwas nila, ug miamuma nila uban sa gugma.”

Miingon si Sister Poll nakadayeg siya sa unsang paagi kini nga istorya magamit sa pagpaaktibo: “Posible nga tan-awon ang istorya ni Ammon isip simbolo sa mga lider sa Simbahan karon, pagluwas sa mga miyembro kinsa nagkatibulaag Adunay daghang mga impluwensya sa kalibutan nga, sama sa mga tulisan, makaabug sa mga miyembro gikan sa maayong pulong sa ebanghelyo. Kinahanglan kitang magmabinantayon ug molihok diha-diha dayon kon ang usa sa Iyang bililhong mga kalag wala diha sa panon.”

Siya mikutlo gikan ni Presidente Gordon B. Hinckley (1910–2008), kinsa miingon, “Maglaum ko, mag-ampo ko, nga ang matag usa kanato . . . mobuhat sa pagpangita niadtong nanginahanglan og tabang, niadtong nawad-an sa paglaum ug anaa sa lisud nga mga sirkumstansya, ug ibayaw sila diha sa diwa sa gugma sa paghangop sa Simbahan, diin ang lig-ong mga kamot ug mahigugmaong mga kasingkasing makapadasig kanila, makapahupay kanila, makatabang kanila, ug makapahimutang kanila sa paagi nga malipayon ug mabungahon nga kinabuhi.”<sup>1</sup> ■

#### MUBO NGA SULAT

1. Gordon B. Hinckley, “Reach with a Rescuing Hand,” *Ensign*, Nob. 1996, 86.



#### SI AMULEK MAKATUDLO USAB KANATO

**S**i Amulek lain nga bantugang bayani gikan sa Basahon ni Mormon. Siya nagpakita kon unsay dangatan sa mga tawo kon sila mobalik sa dalan sa pagkamatarung.

Adunahan ug inila, si Amulek miila nga siya nakasaksi sa mga misteryo ug gahum sa Dios apan nagpatig-a sa iyang kasingkasing “Ako gitawag sa makadaghan ug ako wala mopatalinghug; busa ako nasayud mahitungod niini nga mga butang, apan ako wala magpakasayud,” siya miingon (Alma 10:6; tan-awa usab ang mga bersikulo 4–5).

Apan ang Ginoo nagpadala og anghel sa pagsulti ni Amulek sa pagdawat ni Alma, ang propeta, sa iyang panimalay. Gipakaon ni Amulek si Alma, ug gipanalanginan ug gitudloan ni Alma si Amulek ug ang iyang panimalay. Dayon mikuyog si Amulek ni Alma sa pagpangalagad, nahimong gamhanan nga ikaduhang saksi sa mga kamatuoran sa ebanghelyo. (Tan-awa sa Alma 10:7–12.)

Si Amulek nahimong kompanyon ni Alma sa pag-awhag sa mga tawo sa paghinulsol, ug siya nagsangyaw sa ebanghelyo nga adunay kalig-on ug awtoridad nga nakapatingala sa mga tawo (tan-awa sa Alma 11:46). Gigapos ug gipriso, si Alma ug Amulek milagro nga nakagawas, nakaestablisar sa Simbahan sa Sidom, ug dayon nagtudlo sa ebanghelyo sa tibuok yuta (tan-awa sa Alma 14; 15; 31).

Sama ni Amulek, adunay daghan sa Simbahan karon, kon sila mobalik sa pagka-aktibo, makakaplag nga ang Ginoo mopanalangin kanila ug sila mahimong mas gamhanan nga saksi sa kamatuoran.

# NAPULO KA MGA KASAYURAN

## alang sa mga Ginikanan sa mga Young Adult

Ni Wendy Ulrich

Lisensyado nga Psychologist

Sa dihang ang akong bana ug ako mitabang sa among mga anak nga mobalhin ngadto sa mga dormitoryo sa kolehiyo o mosulod sa missionary training center, among gibati ang kombinasyon sa kaguol ug kagawasan sa paghunahuna nga sila—ug kami—sa katapusan “nahunan na.” Hinoon, sa wala madugay nakaamgo kami, nga uban sa pag-angkon sa bag-ong kahanas ug kagawasan, ang among mga anak nag-atubang og dugang pang mga hagit. Samtang ang among aktwal nga pagkontrolar sa ilang kinabuhi nawala na, ang ilang panginahanglan sa suporta—lahi nga matang sa suporta—sa pagkatinuod nadugangan.



## MGA HAGIT KARON

Ania ang pipila sa mga hagit nga giatubang sa mga young adult sa kalibutan karon, uban sa mga pangutana niadto nga kadtong mga hagit gikan sa mga ginikanan.



### DUGAY-DUGAYNG PANA-HON SA PAGPABILING SINGLE.

Mga uso sa katilingban sa pagsugod og mga pamilya sa ulahing bahin sa kinabuhi makapabati sa mga young adult nga padayon ang ilang pagkatin-edyer. Ang uban mobati og kaugtas, nagduha-duha kon mag-minyo ba sila o magbaton og anak. Isip mga ginikanan, sa unsang paagi kita makatabang nila nga makabaton og mahangturong panglantaw?

### WALAY KASIGUROAN

**SA PINANSYAL.** Daghan sa mga young adult dili tingali makatupong sa ilang mga ginikanan sa ekonomikanhong paagi. Tingali maglisud sila sa pagpangita og trabaho—gani sa degree sa kolehiyo—o sa pagsangkap alang sa usa ka pamilya. Isip mga ginikanan, kinahanglan ba kitang motabang, o atong hunahunaon nga ang atong mga anak motubo gikan sa pagdumala sa ilang kaugalingong mga panalapi?





### **MAKAKAPOY KAAYO NGA MGA OPSYON.**

Ang mga young adult karon dunay mas daghang nagkalain-lain mga kapilian sa panarbaho. Apan usahay kanang tanang kapilian ingon og makakapoy kaayo. Sa unsang paagi nga ang mga ginikanan makatabang sa hamtong nga mga anak sa pagsuhid sa mga opsyon apan usab makahukom sa makatagbaw nga panarbaho?

### **ANG PAGPUYO UBAN SA MGA GINIKANAN.**

Magminyo man sila o dili, ang nagtubo nga gidaghanon sa mga young adult nga nag edad og 18 ug 34 nagpuyo uban sa mga ginikanan. Kon ang mga hamtong nga mga anak mopuyo uban sa ilang mga ginikanan, unsaon sa mga ginikanan ang pagpakigsabut sama sa kinsa ang mopalit og pagkaon ug unsaon sa pagdisiplina sa mga apo?



*Bisan pa sa mga hagit sa kalibutan karon, mga ginikanan mahimong mopadayon sa pagpanalangin sa ilang young adult nga mga anak pinaagi sa paghatag og matarung nga mga suporta ug giya.*



### **GIAPILAN NGA RELIHI-**

**YON.** Karon, ang mga young adult sa tanang tinuohan dili na magpasakop og usa ka simbahan kay sama sa miaging henerasyon. Sa unsang paagi nga kita isip mga ginikanan makaawhag sa atong hamtong nga mga anak nga magpabiling aktibo sa Simbahan? Sa unsang paagi kita sa espirituhanon nga paagi makasuporta kanila bisan kon ilang pilion nga dili na moapil sa mga kalihokan sa Simbahan?

# MGA GIYA ALANG SA MGA GINIKANAN

Bisan ang atong hamtong nga mga anak tingali molabaw pa nato sa mga abilidad o sa kalampanan, nagkinahanglan gihapon sila ug angay sa suporta sa mga ginikanan sa pagpakabuhi dinhi sa kalibutan. Ang mosunod mao ang 10 ka mga giya nga ikonsiderar.

## 1. SUSIHA UNSAY GUSTO UG GANAHAAN SA INYONG MGA ANAK.

Imbis sultihan ang inyong young adult nga mga anak kon unsaon sa pagkuha unsay *inyong* hunahuna nga ilang gikinahanglan, pangutana sa *ilang* hiyas, mga tumong, ug mga damgo. Mahimong mohangyo sila ninyo sa pagtabang nila sa pagplano aron makab-ot kini. Kon maoy ilang buhaton, himoa ang *ilang* damgo nga giya sa inyong pag-istoryahanay. Susiha ang pros ug cons, pag-ampo alang sa giya, ug padayon sa pagpakigsulti. Kon sila wala masayud unsay gusto nila, awhaga sila sa pagpakigkita sa usa ka guidance counselor, mokuha og vocational interest test, o mosinati pa pinaagi sa pagtrabaho ug pagbolunter.

## 2. MAINAMPUONG MAGTUON SA DOKTRINA UG MGA PAKIGSAAD 121:34-46.

Kini nga mga bersikulo magamit sa mga inahan ug amahan. Nagtudlo kini og husto nga mga baruganan mahitungod kon unsaon sa paghatag og matarung nga mga giya sa atong hamtong nga mga anak.

## 3. PAGGAHIN OG PANAHOH DIHA SA DAGHANG MGA YOUNG ADULT.

Tingali inyong mahiba-loan nga ang mga anak sa ubang mga tawo interesado

usab kon giunsa ninyo sa pagdala sa nag-edad pa kamo og 20 hangtud 30. Ang mga young adult gustong mahibalo kon unsaon sa mga hamtong pagbalanse sa nagkalahi nga mga prayoridad, pagpili og trabaho, o makahibalo nga ila nang nakita ang ilang kapikas. Kon kamo makig-uban niining mga young adult, kamo mas makasabut og dugang mahitungod sa mga hagit nga giatubang sa ilang henerasyon.

**4. ISULTI ANG ILANG MGA GASA.** Ang pagtabang sa mga young adult sa pagdiskobre sa ilang mga talento ug interes makatabang nila sa paghunahuna og usa ka makatagbaw nga kaugmaon. Ipasabut nga ang mga tawo malingaw panagsa ra hangtud nga sila mohatag og igong paningkamot nga mahimong eksperto.



Bisan kadtong dunay daghang mga talento sa pagkawatawo kinahanglang mogahin og panahon sa pagpalambo niini aron molampus.

## 5. SALIG KANILA SA ILANG MGA DESISYON.

Wala kini magpasabut nga sila mohimo kanunay og hingpit nga mga pagpili. Kini nagpasabut sa pagsalig nga sila makabangon ra, nga ang Dios mapasayloon, ug nga ang kinabuhi mahimong makahuluganon kaayo bisan kon kini naglakip sa pagbuntog sa mga kapakyasan o sa paglahutay sa mga pagsulay. Ang gagmayng *mga anak* mahimong madaot gumikan sa trauma, ang mga young *adult* motubo gikan sa pagbuntog sa babag imbis sa paglikay niini. Hatag og emosyonal ug praktikal nga suporta, i-awhag ang pagpahulay gikan sa kaugtas, pag-ampo uban nila ug alang nila, ug magpakatawa og ginagmay.



## 6. DAYGA SILA SA ILANG MGA PANING-KAMOT.

Ang pagdayeg sa mga young adult sa pagkakugihan ug pagbangon makatabang nila nga magpadayon pa og dugay sa mga buluhaton, sa dugang nga mga hagit, ug malingaw labaw pa sa ilang mga buhat. Usa ka pormula nga gipakigbahin ni Presidente Thomas S. Monson nag-ingon, “Ang pagtrabaho mosangpot sa kalampusan kay sa magdamgo lang.”<sup>1</sup>

**7. TINGUHAA ANG INSPIRASYON.** Ang atong mga pag-ampo ug hugot nga pagtuo makatabang nato sa pag-abli sa atong mga kasingkasing sa paghatag og higayon sa Dios sa pag-usab nato. Usa ka babaye nga akong nailhan nabalaka sa gitan-aw sa iyang hamtong nga mga anak. Gibati niya nga ang salida nagpakita og kawalay pagtahud ug panagbangi, bisan tuod kini giisip nga angay sa ilang edad. Dili gustong manghilabut, siya nag-ampo ug nagpu-asa og balik-balik kon unsay buhaton o isulti. Usa ka buntag ang iyang umagad nga babaye mitawag aron sa pagpatambag kon unsaon sa pagdumala ang walay tahud ug panag-away sa iyang mga anak. Ang akong higala mipaambit sa iyang obserbasyon mahitungod sa salida sa TV, usa ka impluwensya nga wala gayud mamatikdi sa iyang umagad nga babaye. Ang batanong nga ginikanan mihisgot sa isyu uban sa ilang mga anak. Mga kausaban gikaayunan, ug ang kahimtang sa panimalay milambo.



## 8. HISGUTI ANG MAHITUNGOD SA KWARTA.

Ang pagkasensitibo ngadto sa inyong kaugalingong mga sitwasyon ug kahingkod sa matag anak, pag-mainampoon sa paghukom unsa nga pinansyal nga tabang, kon aduna, ang ihatag sa inyong mga anak. Tingali nagkinahanglan lamang sila sa inyong tabang sa paghimo og badyet. Kon hatagan ninyo sila og pinansyal nga tabang, klaroha sa sinugdanan kon gusto ba ninyong pabayaran o gamiton sa laing paagi. Dayon ikalipay ang paghatag nila og responsibilidad



sa pagdumala sa ilang mga pundo ug magkat-on gikan sa mga sayop, lakip sa binuhatan nga morag wala nay ugma kon sila mopalabi og gasto karon.

**9. PAGMAPAUBSANON.** Kon gibati ninyo nga mosityon sa kaugalingon tungod sa pagkasayop sa pagkaginkan, paningkamot nga magpaubos pa imbis maulaw. Pangayo og pasaylo, sulti unsay inyong buhaton aron molambo, ug dayon padayon uban sa pagsalig. Himoa ang inyong mga anak nga mosulti gikan sa pag-obserbar kaninyo nga ang inyong sayop dili katapusan, ang pag-pangayo og pasaylo dili timailhan sa kahuyang, ug ang pagpasaylo sa uban ug sa atong kaugalingon makahatag og kalinaw.

## 10. SUKDA ANG TINUOD NGA KALAMPUSAN.

Kon kita mag-focus pag-ayo kon unsay ikasulti sa uban nato tungod sa mga pagpili sa atong mga anak (maayo man o dautan), mawad-an kita sa tumong, ug sa kasagaran mawala ang Espiritu. Hinumdumi nga ang atong kalampusan isip mga ginikanan dili kon unsa ka maayo nagsunod ang atong mga anak sa atong mga mithi apan pinaagi kon unsa kamakanunayon ug walay paghinakog *kita* nagsunod niini.

Samtang kita mainampoon nga maghunahuna sa mga panginahanglan ug sa mga personalidad sa matag usa sa atong mga anak nga young adult, ang Espiritu makatabang nato sa paggiya nga walay pagpanaway, pagsuporta nga dili manobra, ug mohatag nilag kagawasan apan dili mobiya nila. Kon buhaton nato kini, ang atong mga anak nga young adult mosalig nga kita ug ang Ginoo anaa sa ilang bahin. ■

*Ang tagsulat nagpuyo sa Utah, USA.*

### MUBO NGA SULAT

1. Thomas S. Monson, “Great Expectations” (Church Educational System fireside for young adults, Ene. 11, 2009), 6; [speeches.byu.edu](http://speeches.byu.edu).

## SI NEPHI MITUBAG SA AKONG MGA PANGUTANA

**N**atawo ko sa Simbahan, apan ang akong pamilya panagsa ra mosimba samtang ako nagtubo pa. Bisan pa niini, kanunay kong naka-kita ug paagi nga makasimba nga ako lang. Sa sayong bahin niadtong 1970 nagserbisyo ko isip usa ka magtutudlo sa seminary sa Pittsburg, Kansas, USA. Sa among pagtuon sa Basahon ni Mormon, akong gihagit ang klase—lakip nako—sa pagbasa sa tibuok nga basahon. Usa ka adlaw samtang nagbasa, nakadawat ko og usa ka gamhanan nga pagpamatuod nga kini tinuod.

Pipila ka tuig ang milabay ang akong mga ginikanan mibisita. Samtang sila nagbisita, ang akong amahan mihisgot sa mga butang nga wala kami magkauyon nga dili nako hisgut an uban niya. Namugos siya, hinoon, bisan pa niana, hangtud hapit na ako

masuko. Nananghid kong mobiya makadiyot ug miadto sa kwarto, diin ako miluhod ug nag-ampo sa Langit-nong Amahan ug nangayo Kaniya og panabang sa pag-atubang sa akong amahan. Ang tubag miabut sa akong hunahuna: ang asoy ni Nephi ug sa naguba nga pana.

Mibasa ko sa istorya sa 1 Nephi kapitulo 16. Naghunahuna ko kabahin ni Nephi nga nagpaubos sa pagduol sa iyang amahan, kinsa nagbagulbol batok sa Ginoo, sa pagpangutana kon asa siya moadto sa pagkuha og pagkaon (tan-awa sa bersikulo 23). Uban niana nga hunahuna, gibati nako nga naaghat nga moduol sa akong amahan ug nangayo sa iyang giya ingon man usab panalangin sa priesthood.

Sa dihang mibalik ko sa sala ug nangayo ni Papa og panalangin, ang

iyang kasingkasing natandog ug siya misugod sa paghilak. “Hunahunaon usa nako kana,” siya miingon.

Sulod sa misunod nga pipila ka adlaw siya nagpuasa ug nag-ampo. Dayon, sa wala pa si Papa ug Mama mibiya, siya mihatag nako og maanin-dot nga panalangin.

Human niana nga kasinatian, si Papa nag-usab sa iyang kinabuhi. Sa ilang pagpauli gikan sa Kansas, ang akong mga ginikanan mibisita sa Adan-on-di-Ahman, Missouri, USA, diin ang akong amahan nakaangkon og gamhanan nga espirituhanong kasinatian.

Sa wala madugay, akong mga ginikanan nahimong aktibo ug mapasaligon nga mga Santos sa Ulahing mga Adlaw. Sa misunod nga mga tuig, nagserbisyo sila og duha ka mga misyon—usa sa Germany ug usa sa Temple Square sa Siyudad sa Salt Lake. Si papa nagserbisyo isip patriyarka sa stake sa dihang siya namatay sa tuig 1987.


Ang Ginoo nasayud nga si Papa usa ka maayong tawo. Pinaagi sa Basahon ni Mormon nga akong nadawat ang akong tubag, ug pinaagi sa akong pagbuhat sa aghat nga si Papa nasayud nga siya kinahanglan nga mahimong usa ka lider alang sa among pamilya. Kini nga kasinatian nakapausab namong tanan.

Akong nakat-unan nga ang Basahon ni Mormon sa tinuod mao ang lain nga tugon ni Jesukristo ug nga kini gisulat alang sa atong panahon. Ako nasayud nga ako makasalig niini kon ako mawad-an og kadasig ug sa bisan unsang sitwasyon. Ang mga tubag anaa diha.

Sa pagkatinuod, ang “mga pulong ni Kristo mosulti [kanato] tanan nga mga butang unsay [atong] buhaton” (2 Nephi 32:3). ■

Judy M. Smith, Kansas, USA

**M**ibasa ko sa istorya ni Nephi ug sa naguba nga pana, ug gibati nako nga naaghat nga moduol sa akong amahan ug nangayo og giya ug panalangin sa priesthood.





# DUHA KA MGA SULAT GIKAN NI MAMA

Niadtong 1996 ang akong asawa ug ako dunay duha ka mga anak nga lalaki, nag-edad og kwatro ug siete. Kami ang tipikal nga batan-ong pamilya nga busy. Usa ka lawom nga gabii ang akong asawa nakahigayon sa pagsulat sa akong pag-umangkon, si Glen, nga nagserbisyo og misyon sa Finland.

Sa pipila ka rason, gibati niya nga gikinahanglan siyang mosulat og taas-taas—nga dunay mga detalye kon unsay gibuhay sa matag sakop sa pamilya, unsa na ang ilang espirituhanong kahimtang, kon unsay nahitabo sa akong calling sa Simbahan ug sa iyang calling sa Simbahan, ang mga istorya sa iyang pagkakabig, sa iyang mga pagbati mahitungod sa misyonaryo nga buhat, ug sa iyang pagpamatuod sa ebanghelyo.

Nindot kadto nga sulat, apan nag-hunahuna ko kon ang akong pag-umangkon nagkinahanglan ba gayud sa daghang impormasyon. Dayon siya misulat kaniya pag-usab.

Milabay ang unom ka tuig, samtang ako nagserbisyo isip bishop ug ang among anak nga mga lalaki nag-edad og 10 ug 13, ang akong kalibutan kalit lang nausab. Niadtong Enero 2, 2002, ang akong asawa, 42 anyos lang, namatay sa atake sa kasingkasing.

Sa panimalay naningkamot ko nga magpadayon ang pagsunod sa mga baruganan sa “Ang Pamilya: Usa Ka Pamahayag ngadto sa Kalibutan.”<sup>1</sup> Akong nakaplagan nga ako makadumala ug makahatag sa gikinahanglan, apan wala nako mahatag sa akong mga anak ang pag-alima nga ilang gikinahanglan. Bisan pa niana, kami naningkamot pag-ayo kutob sa among mahimo.

Niadtong Hunyo 2012 ang akong kamanghuran, si Sam, nagserbisyo og full-time nga misyon sa Colorado Denver South Mission, mipadala nako og email. “Usa ka butang nga nindot kaayo ang nahitabo niini nga semana,” siya misulat. “Nakadawat ko og duha

ka mga sulat gikan ni Mama.”

Mipasabut siya nga siya nakadawat og mga package gikan sa iyang ig-agaw nga si Glen nga naglakip sa mga sulat nga iyang gisulat ngadto kaniya samtang siya didto sa Finland.

“Siya miingon nako nga kining duha ka mga sulat ni Mama nga gipadala ngadto niya sa iyang misyon gisulat alang gayud nako samtang nagmisyon ko,” misulat si Sam. “Busa iyang gipadala nako, ug kini talagsaon!”

Ang pagkahibalo sa pagkakabig, pagpamatuod, ug mga pagbati sa iyang inahan sa misyonaryo nga buhat usa ka “dakong moral nga suporta niini nga panahon”, misulat si Sam. Miingon siya nga siya nagplano nga pakopyahan ang mga sulat ug ipadala ang orihinal.

“Wala koy ideya nga ikaw nagserbisyo isip presidente sa elders quorum o isip ward mission leader, misulat si Sam. Iyang nahibaloan nga sa dihang kwatro anyos pa siya, siya “moambak sa higdaanan pagkahuman sa pag-ampo ug mosinggit ‘gusto kong mahimong usa ka misyonaryo.’”

Ang mga sulat gamhanan, personal, ug makatandog sa dihang gisulat niadtong 1996, apan sa mga panghitabo sa misunod nga mga tuig, nahimo pang mas gamhanan.

Dayon siya midugang og butang nga iyang nakat-unan mahitungod sa iyang inahan: “Si mama nakahibalo nga ako mahimong usa ka wrestler tungod kay siya miingon nga ako makadani ug mahimong amigo sa usa ka wrestler. :)”

Nakahilak ko sa reaksyon ni Sam sa mga sulat. Pipila ka semana ang milabay iyang gipadala kini sa balay. Gamhanan kini, personal, ug makatandog sa dihang gisulat niadtong 1996, apan sa mga panghitabo sa misunod nga mga tuig, nahimo pang mas gamhanan.

Ang sulat sa akong asawa nakapalig-on sa akong pag-umangkon, apan sama sa “pagsalibay sa tinapay ngadto sa katubigan” (tan-awa sa Ecclesiastes 11:1), mibalik kini paglabay sa katuigan aron sa pagpanalangin sa iyang misyonaryong anak ug biyudo nga bana. ■

Ken Pinnegar, California, USA

## MUBO NGA SULAT

1. Tan-awa sa “Ang Pamilya: Usa ka Pamahayag ngadto sa Kalibutan,” *Liahona*, Nob. 2010, 129.



# AKONG NAKITA ANG NAWONG SA IMONG INAHAN

Usa ka Domingo sa summer sa 2002, mibangon ko nga naghunahuna sa akong inahan, kinsa bag-ohay lang namatay. Akong gibisitahan ang akong home ward sa Pacific Palisades, California, USA, diin ang akong mama misimba sulod sa hapit 50 ka tuig.

Miluhod ko sa pag-ampo aron sa pagsulti sa Ginoo kon unsa ka dako ang akong kamingaw kaniya ug nangayo og espirituhanon nga kasinatian nianang adlaw.

Nianang hapon ako nagplano nga motabong sa sibya sa pagpahinungod pag-usab sa Nauvo Illinois Temple sa stake building sa Santa Monica, California. Subo lang, naulahi ako sa pag-abut aron makasulod sa

sesyon. Mibalik ko sa akong sakyanan ug mipaigon sa freeway.

Samtang nagdrayb ko, nakadungog ko og tingog nga nag-ingon, “Randi, susiha si Mary!” Si Mary usa ka suod nga higala sa among pamilya ug usa ka mahalaron nga miyembro sa laing tinuohan. Siya ug ang iyang anak nga babaye si Natasha nagpuyo tupad sa akong Tiya nga si Ruby sobra sa 25 ka tuig. Tungod kay sila walay pamilya sa duol, sila nahimong kabahin sa among pamilya. Pagkamatay sa akong tiya niadtong 1984, ang akong mama kanunay mobisita ni Mary, kanunay magdala og gamay nga regalo o iyang linuto.

Sa sinugdanan akong gibaliwala

ang aghat. Ako dili lang makaadto nga wala magpahibalo, ug wala nako ang akong cell phone aron makatawag kaniya. Sa kalit lang ang tingog miabut pag-usab, mas kusog na karon: “Randi, susiha si Mary!” Niining higayona naminaw ko sa tambag, bisan tuod hapit wala na koy igong panahon sa paggawas sa freeway.


Sa dihang miabut ko sa ilang Mary, siya mitimbaya nako apan morag masakiton. Nakita nako nga siya naghilak. Nangutana ko kaniya unsay nahitabo. Mitubag siya nga kanunay siyang nasakit ug nag-antus tungod sa kadaot sa liog. Usab, hapit wala na siyay pagkaon. Miingon siya nga luya na kaayo siya nga moadto sa botica o sa merkado.

Sa dihang ako nangutana niya nga nong wala siya motawag sa among pamilya, siya miingon, “nag-ampo ko ug mihangyo sa Langitnong Amahan sa pagpadala og tawo aron sa pagtabang kanako.”

Giingnan nako siya nga ang Langitnong Amahan nakadungog sa iyang mga pag-ampo ug mipadala nako. Naggakos mi, ug dayon siya misulti nako og usa ka butang nga dili gayud nako makalimtan. Miingon siya, “Sa imong pag-abut sa may pultahan, akong nakita ang nawong sa imong inahan, dili ang imong nawong.”

Diha-diha dayon akong gibati ang matam-is nga espiritu sa akong inahan nga duol nako, ug ako nadasig sa pagserbisyo sama sa pagserbisyo sa akong inahan. Ang iyang kinabuhi, human sa tanan, puno sa pagserbisyo sa uban.

Manghinaw ko nga dili gayud nako makalimtan ang kaimportante sa pagpatalinghug sa tingog sa Espiritu ug sa ehemplo sa akong inahan nga gipakita nako sa pagserbisyo sa uban. ■  
Randi Reynolds Allen, California, USA



Sa dihang ako miabut sa ilang Mary, siya mitimbaya kanako apan morag masakiton. Nakita nako nga siya nga naghilak.

# IMONG GILUWAS ANG AKONG KAMINYOON

Sa dihang nagtrabaho ko sa konstruksyon sa Oman gikan sa 1979 hangtud sa 1986, nagtrabaho ko sa ministry of defense. Ang ministry mohatag nako og mga proyekto nga nahimutang sa labing hilit nga dapit sa nasud, ug sa kasagaran ako lang ang supervisor nga magbantay sa mga proyekto. Ako lang usab ang miyembro sa Simbahan nga nagtrabaho sa ministry.

Usa ka adlaw didto sa among punoang buhatan sa kompaniya, nakasugat ko sa usa ka electrical engineer kinsa, sama kaniadto, mihimo og negatibo nga mga komentaryo mahitungod sa Simbahan. Gipasagdan ra nako ang iyang mga komentaryo tungod kay sa kasagaran kadiyot ra ko sa punoang buhatan sa dili pa ako mobiya para sa laing proyekto.

Sa wala madugay, hinoon, kining tawhana gi-assign sa pagsusi sa electrical work sa mga proyekto nga gitukod sa utlanan sa Oman uban sa Yemen. Naka-iskedyul kami nga magkita og usa ka oras sa dili pa siya mobalik ngadto sa punoang buhatan.

Sa dihang siya miabut, iyang gi-inspeksyon ang trabaho ug nakita nga ang tanan maayo ra. Atol sa among panag-uban, akong gisentro ang among panag-istoryahanay sa trabaho ug dayon midrayb niya ngadto sa landingan aron pagpagikan kaniya.

Kusog ang ulan niadtong higayona, ug ang landingan, nahimutang sa ibabaw sa bukid nga 6,000 ka pye (1,830 m) ibabaw sa Indian Ocean, natabunan sa mga panganod. Ang biyahe sa akong kaubanan malangan.

Nagkulba-kulba ang akong kasingkasing tungod kay akong nahunahunaan nga kinahanglan kong maghulat diha sa sakyanan uban niini nga tawo. Human makaampo sa hilom, nakahunahuna ko sa pagpangutana niini nga tawo mahitungod sa iyang pamilya, ilabi na sa iyang asawa.

Ako kining gibuhay, ug ang enhinyero kalit nakahilak, miingon nga bag-o lang siyang nakadawat og sulat nga ang iyang asawa nagtinguha og diborsyo. Ang pulong nga *gugma* diha-diha misantop sa akong hunahuna, ug sa misunod nga duha ka oras naghigot kami mahitungod sa *gugma* alang sa uban ug sa *gugma* sa Ginoo nga si Jesukristo alang natong tanan. Wala ko kabantay nga kami nahimong managhigala. Sa pagtapos namo sa among panag-istoryahanay, mihayag na ang panganod ug ang enhinyero misakay sa iyang eroplano. Sa wala madugay ako nakadungog nga siya mi-resign sa iyang posisyon ug mipauli.

Pipila ka tuig sa wala madugay samtang nag-outing uban sa Aaronic Priesthood sa Plymouth, usa ka siyudad sa habagatang kabaybayonan sa England, nakabantay ko og usa ka tawo nga nagpadulong nako. Samtang siya nagkaduol, siya miingon, "Nagtugyud kong ikaw lagi, Neil."

Ang electrical engineer gikan sa Oman. Ang sunod nga mga pulong

nga iyang gisulti nagpabilin sa akong kasingkasing: "Salamat nimo sa pagpakigsulti nako kabahin sa *gugma* didto sa bukid anang adlaw. Imong giluwat ang akong kaminyoon, ug ako hangtud sa hangtud mapasalamaton."

Nag-istoryahay mi og kadiyot, ug siya milakaw. Wala na ko makakita kaniya sukad.

Mapasalamaton kaayo ko sa inspirasyon nga akong nadawat didto sa Oman. Kini nakapanalangin sa engineer ug nakahatag nako og kalig-on sa pagpadayon sa akong mga gituohan sa Simbahan kon ako naginusara ug layo sa panimalay. ■  
Neil S. Roy, Yorkshire, England

**N**agkulba-kulba ang akong kasingkasing tungod kay akong nahunahunaan nga kinahanglan kong maghulat diha sa sakyanan uban niini nga tawo nga mihimo og negatibo nga mga komentaryo mahitungod sa Simbahan.





Ni Elder  
Gerrit W. Gong  
Sa Seventy

# PAGKAHIMONG

## Hingpit diha kang Kristo

**K**ita manganta uban sa atong mga anak, “Gibati nako ang gugma sa akong Manluluwas, ang gugma nga libreng gihatag niya nako.”<sup>1</sup>

Ang Iyang maulaon nga gugma, walay pagpugong nga gihatag, mao nga “gatas ug dugos, walay bayad ug walay presyo” (2 Nephi 26:25). Walay kinutuban ug walay katapusan (tan-awa sa Alma 34:10), ang Pag-ula nag-dapit nato sa “pagduol ngadto kang Kristo, ug paghingpit diha kaniya” (Moroni 10:32).

Ang pagsabut sa libreng matubsanong gugma nga gihatag sa Manluluwas makapalingkawas nato gikan sa gituohan sa kaugalingon, sayop ug dili reyalidad nga mga gipaabut kon unsa ang pagkahingpit. Ang ingon nga pagsabut makapawala sa kahadlok nga kita dili hingpit—ang kahadlok nga kita masayop, ang kahadlok nga kita dili maayo, ang kahadlok nga kita pakyas itandi sa uban, ang kahadlok nga kita wala magbuhat sa igo aron makaangkon sa Iyang gugma.

Libre nga gihatag ang matubsanon nga gugma sa Manluluwas makatabang kanato nga mahimong mas mapasayloon ug dili mahukmanon sa uban ug sa atong kaugalingon. Kini nga gugma nag-ayo sa atong mga

**Ang pagsabut sa libreng matubsanong gugma nga gihatag sa Manluluwas makapalingkawas nato gikan sa gituohan sa kaugalingon, sayop, ug dili reyalidad nga mga gipaabut kon unsa ang pagkahingpit.**

relasyon ug naghatag kanato og mga oportunidad sa paghigugma, pagsabut, ug sa pagserbisyo sama sa pagserbisyo sa atong Manluluwas.

Ang Iyang matubsanon nga gugma makapausab sa atong konsepto sa pagkahingpit. Makabutang kita sa atong pagsalig diha Kaniya, magma-kugihon sa paghupot sa Iyang mga sugo, ug magpadayon diha sa hugot nga pagtuo (tan-awa sa Mosiah 4:6)—bisan gani mobati usab kita nga mas mapainubsanon, mapasalamaton, ug magsalig sa Iyang maayo nga buhat, kalooy, ug grasya (tan-awa sa 2 Nephi 2:8).

Sa mas dako nga pagsabut, ang pagduol kang Kristo ug ang pagpakahingpit diha Kaniya nagbutang sa kahingpitan diha sa mahangturon nga panaw sa atong espiritu ug lawas—sa tinuod, ang mahangturon nga panaw sa atong mga kalag (tan-awa sa D&P 88:15). Ang pagkahimong hingpit nga resulta sa atong panaw sa pisikal nga kinabuhi, kamatayon ug pagkabanhaw, nga tanan nga mga butang mapahiuli “ngadto sa ilang tukma ug hingpit nga bayanan” (Alma 40:23). Naglakip kini sa proseso sa espiritwal nga pagkatawo, diin makadala og “usaka dako nga kausaban” sa atong mga kasingkasing ug kinaiya (Mosiah 5:2). Kini nagpakita sa atong pagkalunsay sa tibuok kinabuhi pinaagi sa Kristohanong pagserbisyo ug pagkamasulundon sa mga sugo sa Manluluwas ug sa atong mga pakigsaad. Ug kini miila sa makahingpit nga relasyon tali sa mga buhi ug sa mga patay (tan-awa sa D&P 128:18).

Ang pulong *kahingpitan*, hinoon, usahay masaypan sa pagsabut nga dili gayud makahimo og sayop. Tingali kamo o inyong kaila naningkamot pag-ayo nga mahingpit niini nga paagi. Tungod kay ang maong pagkahingpit ingon og dili makab-ot, bisan



ang atong pinakamaayo nga paningkamot makapabalaka, makawala sa paglaum, o makaluya. Walay kalampusang naningkamot kita sa pagkontrolar sa atong mga kahintang ug sa mga tawo nga naglibut nato. Nabalaka kita sa mga kahuyang ug mga sayop. Sa pagkatinuod, magkadako ang atong pagpaningkamot, magkalayo ang atong bation gikan sa pagkahingpit nga atong gitinguha.

Sa unsay mosunod, ako nagtinguha sa pagpalawom sa atong pagpasalamat alang sa mga doktrina sa Pag-ula ni Jesukristo ug alang sa gugma ug kalooy sa Manluluwas nga libreng gihatag nato. Modapit ko kaninyo sa paggamit sa inyong pagsabut sa doktrina sa Pag-ula sa pagtabang sa inyong kaugalingon ug sa uban, lakip ang mga misyonaryo, mga estudyante, sa mga young single adult, mga amahan, mga inahan, single nga mga lider sa pamilya, ug sa uban nga mobati nga napugos sa pagpangita sa kahingpitan o aron mahimong hingpit.

### Ang Pag-ula ni Jesukristo

Giandam gikan sa katukuran sa kalibutan (tan-awa sa Mosiah 4:6–7), ang Pag-ula sa Manluluwas nagtugot nato sa pagkat-on, paghinulsol, ug pagtubo pinaagi sa atong kaugalingong mga kasinatian ug mga pagpili.

Niining mortal nga pagsulay, sa hinay-hinay “pagtulun-an ngadto sa laing pagtulun-an” (D&P 98:12) espirituhang paglambo ug makapausab og “dako nga kausaban” sa kasingkasing (Alma 5:12, 13; Mosiah 5:2) ang espirituhang mga kasinatian makatabang nato sa pagduol ngadto kang Kristo ug paghingpit diha Kaniya. Ang pamilyar nga mga pulong “lahutay hangtud sa katapusan” nagpahinumdom nato nga ang mahangturong kalamboan sa kasagaran naglakip og panahon ug proseso.

Sa panapos nga kapitulo sa Basahon ni Mormon, ang talagsaong propeta



nga si Moroni nagtudlo nato unsaon sa pagduol ug paghingpit diha kang Kristo. Kita “molimud sa [atong] mga kaugalingon sa tanan nga dili diosnon.” Kita “mohigugma sa Dios sa [atong] tibuok nga gahum, hunahuna ug kusog.” Dayon ang Iyang grasya igo alang kanato, “niana ang iyang grasya [kita] mahimo nga hingpit diha kang Kristo.” Kon kita “dili molimud” sa gahum sa Dios, kita mahimong “pagasantoson diha ni Kristo tungod sa grasya sa Dios, nga “anaa sa pakigsaad sa Amahan ngadto sa kapasayloan sa [atong] mga sala, nga kita “mahimo nga balaan, nga walay lama” (Moroni 10:32, 33).

Sa katapusan, ang “mahinungdanon ug katapusang sakripisyo” sa Manluluwas nga nakapahimo sa mga “kalooy, diin mobuntog sa kaangayan, ug modala og mga kahigayunan ngadto sa mga tawo nga sila mahimo nga makabaton og hugot nga pagtuo ngadto sa paghinulsol” (Alma 34:14, 15). Sa pagkatinuod, ang atong “hugot nga pagtuo ngadto sa paghinulsol” importante alang kanato sa pagduol ngadto kang Kristo, paghingpit diha Kaniya, ug makatagamtam sa mga panalangin sa

**Ang atong Manluluwas lamang ang nagpuyo og hingpit nga kinabuhi, apan gani Siya nakakat-on ug nagtubo sa mortal nga kasinatian.**

“mahinungdanon ug walay katapusan nga laraw sa katubsan” (Alma 34:16).

Hingpit nga pagdawat sa Pag-ula sa atong Manluluwas makadugang sa atong hugot nga pagtuo ug mohatag kanato og kaisug sa pagbiya sa atong mapugsanon nga mga paghandom nga kita kinahanglan nga o mohimo sa mga butang nga hingpit. Ang pig-ot nga panghunahuna nag-ingon nga hingpit gayud kaayo o wala nay pag-laum. Apan kita mahimong mapasalamatong modawat, isip anak nga mga lalaki ug anak nga mga babaye sa Dios, nga kita Iyang labing mahinungdanon nga binuhat (tan-awa sa Salmo 8:3–6; Mga Hebreohanon 2:7), bisan tuod kita sa gihapon nag-uswag.

Kon masabtan nato ang libreng gihatag nga maulaong paghigugma sa atong Manluluwas, dili na kita mahadlok nga Siya tingali maghuhukom nga walay kalooy ug mangita og sayop. “Kay gipadala sa Dios ang iyang Anak nganhi sa kalibutan, dili aron ang kalibutan iyang pagahukman sa silot, kondili aron ang kalibutan maluwas pinaagi kaniya” (Juan 3:16–17). Ug kita makasabut nga gikinahanglan ang panahon ug proseso alang sa pagtubo (tan-awa sa Moises 7:21).

### Ang Atong Hingpit nga Ehempro

Ang atong Manluluwas lamang ang nagpuyo og hingpit nga kinabuhi, ug gani Siya nakakat-on ug nagtubo sa mortal nga kasinatian. Sa pagkatinuod “siya wala makadawat sa kahingpitan sa sinugdanan, apan nakaangkon og grasya ug dugang pa nga grasya, hangtud nga siya nakadawat sa kahingpitan” D&P 93:13.

Siya nakakat-on pinaagi sa mortal nga kasinatian nga “modala diha kaniya [atong] mga kahuyang . . . nga siya mahimo nga masayud sumala sa unod unsaon pagtabang ang iyang mga katawhan” (Alma 7:12). Siya dili mosimpig sa mga tintasyon, sala, o sa

inadlaw-adlaw nga mga pagpamugos, apan Siya usab nakasinati sa tanang mga pagsulay ug mga hagit sa pagkamortal (tan-awa sa D&P 122:8).

Sa Wali sa Bukid, ang Manluluwas mimando nato: “Busa kamo kinahanglan magmahingpit” (Mateo 5:48). Ang Greyigo nga pulong alang sa *hingpit* mahimong hubaron nga “kompleto, nahuman na, hingpit nga milambo” (sa Mateo 5:48, footnote b). Ang atong Manluluwas nagsugo nato nga mahimong kompleto, nahuman na, hingpit nga molambo—sa paghingpit sa mga hiyas ug kinaiya nga gipakita Niya ug ang atong Amahan sa Langit.<sup>2</sup>

Atong tan-awon kon sa unsang paagi nga ang paggamit sa doktrina sa Pag-ula makatabang niadtong kinsa mobati nga sila nagkinahanglan sa pagpangita sa kahingpitan o mahimong hingpit.

### Ang pagkaperpeksyonista

Ang sayop nga pagsabut kon unsa ang gipasabut nga mahimong hingpit moresulta sa *pagkaperpeksyonista*—usa ka kinaiya o pamatasan nga nagkinahanglan og usa ka dalayegon nga mga tinguha nga mahimong maayo ug nahimong usa ka dili angay nga pagdahom nga mahimong hingpit *karon*. Ang pagkaperpeksyonista usahay moabut gikan sa pagbati nga kadto lamang hingpit ang angay nga higugmaon o nga kita dili angayan nga magmalipayon gawas kon kita hingpit.

Ang pagkaperpeksyonista makaingon nga walay kinatulgan, kabalaka, paglangay-langay, pagkawala sa kadasig, pagpangatarungan sa kaugalingon, ug kasubo. Kini nga mga pagbati makatabon sa kalinaw, kalipay, ug kasiguroan nga gusto sa atong Manluluwas nga atong maangkon.

Ang mga misyonaryo kinsa gusto nga mahimong hingpit karon mahimong mabalak-on o mawad-an sa kadasig kon ang ilang pagkat-on sa pinulongan sa misyon, pagtan-aw sa

mga tawo nga bunyagan, o pagdawat og mga assignment sa pagpangulo sa misyon wala dayon mahitabo. Alang sa dunay abilidad nga mga batan-on nga anad na sa kalampusan, ang misyon mahimong unang dako nga hagit sa kinabuhi. Apan ang mga misyonaryo mahimong magmasulundon gayud bisan dili hingpit. Ilang masukod ang ilang kalampusan una sa ilang pasali sa pagtabang sa mga indibidwal ug mga pamilya “mamahimong matinud-anon nga mga miyembro sa Simbahan kinsa nagtagamtam sa presensya sa Espiritu Santo.”<sup>3</sup>

Ang mga estudyante nga nagsugod sa pag-eskwela, ilabi na niadtong mibiya sa panimalay alang sa kolehiyo, nag-atubang sa kadasig ug mga kabalaka. Ang mga eskolar nga estudyante, atleta, mga artist, ug uban pa nga kaniadto “malampuson ug inila” nga karon mibati nga ubos ug uya-mot. Sayon alang sa mga estudyante nga dunay kalagmitan nga mahimong perpeksyonista nga mobati niana, bisan unsaon pa nila pagpaningkamot, pakyas sila kon dili sila ang nag-una sa tanang mga butang.

Tungod sa panginahanglan sa kinabuhi, ang mga estudyante makakat-on usahay nga maayo ra gayud ang pagbuhat sa tanan nilang mahimo ug nga dili kana kanunay posible nga mahimong labing maayo.

Kita usab mopatuman og mga ekspektasyon sa pagkahingpit sa atong kaugalingong mga panimalay. Ang usa ka amahan o inahan mahimong mobati nga napugos nga mahimong hingpit nga kapikas, ginikanan, tig-atiman sa panimalay, tigsangkap, o kabahin sa usa ka hingpit nga pamilya nga Santos sa Ulahing mga Adlaw—karon.

Unsa ang makatabang niadtong kinsa nakigbatok sa mga kalagmitan nga mahimong perpeksyonista? Pagpangutana nila og makatabang nga mga pangutana ug makadapit og

matinuoron ug detalyado nga mga tubag makatabang nila nga masayud nga kita modawat ug nahigugma nila. Modapit sila sa uban sa pag-focus sa positibo. Motugot sila nato sa pagsulti nga unsay atong gibati maayo ra. Ang pamilya ug mga higala makalikay sa mga pagtandi ug hinoon mohalad og sinsero nga pag-awhag.

Laing seryoso nga dimensyon sa perpekسیونista mao ang pagpasunod sa uban sa atong dili praktikal, mahukmanon, o dili mapasayloon nga mga sumbanan. Ang mao nga kinaiya sa tinuod, naglimud o naglimit sa mga panalangin sa Pag-ula sa Manluluwas sa atong kinabuhi ug sa kinabuhi sa uban. Sama pananglit, ang mga young single adult mahimong maglista sa gitinguha nga mga kalidad sa usa ka potensyal nga kapikas ug sanglit wala makaminyo tungod sa dili praktikal nga mga ekspektasyon alang sa hingpit nga kompanyon.

Sa ingon, ang usa ka sister dili gustong makig-date sa usa ka talagsaon, takus nga lalaki nga wala makapasar sa sukdanan sa pagkaperpekسیونista—siya dili kamaong mosayaw, wala magplano nga magdato, wala magmisyon, o moangkon sa miaging problema sa pornograpiya sukad masulbad pinaagi sa paghinulsol ug pagtambag.

Sa samang paagi, usa ka igsoon nga lalaki mahimong makig-date sa usa ka talagsaon, takus nga sister kinsa dili mohaum sa iyang dili praktikal nga profile—dili siya ganahan og mga sports, dili presidente sa Relief Society, dili beauty queen, dili kamaong mobadyet, o wala moangkon sa kahuyang kaniadto sa Pulong sa Kaalam, nga karon nasulbad na.

Siyempre, kinahanglan natong hunahunaon ang mga kalidad nga atong gitinguha sa atong mga kaugalingon ug sa potensyal nga kapikas. Kinahanglan natong ipadayon ang atong labing taas nga mga paglaum ug mga

sumbanan. Apan kon kita mapaubsanon, masurprisa kita sa kamaayo sa wala damha nga mga dapit, ug kita makahimo og mga oportunidad nga mas masuod ngadto sa usa ka tawo kinsa, sama nato, dili hingpit.

Ang hugot nga pagtuo miila niana, pinaagi sa paghinulsol ug sa gahum sa Pag-ula, ang kahuyang mahimong malig-on ug gihinulsulan nga sala sa tinud-anay mapasaylo.

Ang malipayon nga kaminyoon dili mao ang resulta sa duha ka hingpit nga mga tawo nga nagsinaaray. Hinoon, ang debosyon ug gugma molambo samtang ang duha ka mga tawo nga dili hingpit molig-on, mopanalangin, motabang, moawhag, ug mopasaylo. Ang asawa sa usa ka moderno nga propeta sa makausa gipangutana kon unsay kahimtang nga maminyo sa usa ka propeta. Maalamon siyang mitubag nga siya wala maminyo og usa ka propeta; siya naminyo og usa ka tawo kinsa hingpit nga mahaloron ngadto sa Simbahan bisan unsa nga calling nga iyang madawat.<sup>4</sup> Sa laing pagkasulti, paglabay sa panahon, mga bana ug asawa molambo og dungan—tagsa-tagsa ug isip usa ka magtiayon.

Ang pagpaabut sa hingpit nga kapikas, hingpit nga edukasyon, hingpit nga trabaho, o hingpit nga balay dugay ug masulub-on. Maalamon kita kon mosunod sa Espiritu sa importanting mga desisyon sa kinabuhi ug dili motugot nga ang pagduda nga sangputanan sa mga demanda sa perpekسیونista makapugong sa atong pag-uswag.

Alang niadtong kinsa mobati kanunay og kahamol o kabalaka, sa sinserong paagi pangutan-a ang inyong kaugalingon, “Ako bang hatagan og kahulugan ang *pagkahingpit* ug *kalamposan* pinaagi sa mga doktrina sa matubsanon nga gugma sa Manluluwas o pinaagi sa mga sumbanan sa kalibutan? Sukdon ba nako ang *kalamposan* o *kapakyasan* pinaagi

sa Espiritu Santo nga nagpamatuod sa akong matarung nga mga tinguha o sa pipila ka kalibutanon nga mga sumbanan?”

Alang niadtong kinsa mobati og kaluya sa pisikal o emosyonal nga paagi, sugdi ang regular nga pagkatulog ug pagpahulay, ug sa paggahin og panahon sa pagkaon ug magpahayahay. Hibalo nga ang pagka-busy dili sama sa pagkahimong takus, ug ang pagkahimong takus wala magkinahanglan og kahingpitan.<sup>5</sup>

Kadtong kanunay nga makakita sa ilang kaugalingong mga kahuyang, sauloga uban sa pasalamat ang mga butang nga maayo ninyo pagkabuhay, ma-dako man o ma-gamay.

Alang niadtong kinsa nahadlok og kapakyasan ug kinsa langayan, usahay tungod sa sobra nga pagpangandam, timan-i ug laumi nga wala na kinahanglana nga mopalayo sa mahagiton nga mga kalihokan nga makahatag og dakong kalamboan!

Kon gikinahanglan ug angay, pangayo og espirituhanong tambag o kasaligan nga medikal nga pagtagad sa pagtabang ninyo nga makarelaks, makapalambo og positibo nga mga paagi sa paghunahuna ug mohan-ay sa inyong kinabuhi, makapakunhod sa mga kinaiya nga dili makaayo sa kaugalingon, ug sinatia ug ipahayag ang dakong pagpasalamat.<sup>6</sup>

Ang walay pailub makapugong sa hugot nga pagtuo. Ang hugot nga pagtuo ug pagpailub makatabang sa mga misyonaryo nga makasabut sa bag-ong pinulongan o kultura, ang mga estudyante nga makamaster sa bag-ong mga hilisgutan, ug mga young single adult sa pagsugod sa paglig-on og mga relasyon kay sa maghulat sa tanan nga mahingpit. Ang hugot nga pagtuo ug pagpailub makatabang usab niadtong naghulat sa clearance nga mabugkos sa templo o pagpahiuli sa mga panalangin sa priesthood.





**Kadtong kanunay nga makakita sa ilang kaugalingong mga kahuyang, sauloga uban sa pasalamat ang mga butang nga maayo ninyo pagkabuhat, ma-dako man o ma-gamay.**

Samtang kita molihok ug dili aghaton sa paglihok (tan-awa sa 2 Nephi 2:14), kita makakita og paagi tali sa susama nga mga hiyas ug makakab-ot og daghan sa kalamboan sa kinabuhi. Makita kini diha sa “katugbang,” nga mao ang “natingob sa usa” (2 Nephi 2:11).

Sama pananglit, mahimo kitang mohunong sa pagkatapulan (tan-awa sa D&P 88: 124) nga dili modagan labaw pa kay sa atong kusog (tan-awa sa Mosiah 4:27).

Kita mahimo nga “matinguhaon nga moapil diha sa usa ka maayo nga katuyoan” (D&P 58:27) samtang usab matag karon ug unya mohunong nga “pagmalinawon, ug hibalo nga Ako mao ang Dios” (Salmo 46:10; tan-awa usab D&P 101:16).

Makaplagaan nato ang atong mga kinabuhi pinaagi sa pagwagtang sa atong kinabuhi tungod sa Manluluwas (tan-awa sa Mateo 10:39; 16:25).

“Ayaw pagluya diha sa maayo nga buhat” (D&P 64:33; tan-awa usab sa Mga Taga-Galacia 6:9) samtang maggahin og tukma nga panahon sa pagbag-o sa espirituhanon ug pisikal nga paagi.

Mahimo kitang mangomedy apan dili magbinuang.

Kita mahimong mokatawa sa kinasingkasing apan dili inarogante.

Ang atong Manluluwas ug ang Iyang Pag-ula nagdapit kanato sa “pagduol ngadto kang Kristo, ug maghingpit diha kaniya.” Samtang ato kining buhaton, Siya nagsaad nga ang Iyang grasya “igo alang kaninyo, nga pinaagi sa iyang grasya kamo mahimo nga hingpit diha kang Kristo” (Moroni 10:32).

Alang niadtong nabug-atan sa kabalaka sa pagpangita sa pagkahingpit o nga mahimong hingpit karon, ang libreng gihatag nga maulaong gugma sa atong Manluluwas mihatag nato og kasiguroan:

“Umari kanako, kamong tanan nga nabudlay ug nabug-atan, ug papahulayon ko kamo.

“. . . Kay masayon ang akong yugo, ug magaan ang akong luwan” (Mateo 11:28, 30).<sup>7</sup> ■

#### MUBO NGA MGA SULAT

1. “I Feel My Savior’s Love,” *Children’s Songbook*, 75.
2. Tan-awa usab sa Russell M. Nelson, “Perfection Pending,” *Ensign*, Nob. 1995, 86–88.
3. *Isangyaw ang Akong Ebangheho: Usa ka Giya sa Misyonaryo nga Pangalagad* (2004), 13.
4. Tan-awa sa Lavina Fielding, “Camilla Kimball: Lady of Constant Learning,” *Ensign*, Okt. 1975, 62.
5. Tan-awa, pananglitan sa, Dieter F. Uchtdorf, “Upat Ka Tawag,” *Liahona*, Mayo 2013, 58–61. Si Presidente Uchtdorf usab mipasidaan, “Ang uban gani tingali magtuo nga ang ilang bili sa kaugalingon nag-agad sa kataas sa lista sa ilang buhatunon” (“Kabahin sa mga Butang nga Labing Mahinungdanon,” *Liahona*, Nob. 2010, 20).
6. Kini nga ideya nagagikan ni Carlos F. ug Alane Kae Watkins, mental health advisers sa Asia Area, nga na-assign sa Hong Kong. Laing mga ideya alang niini nga artikulo naggikan ni Susan Gong, Larry Y. ug Lynda Wilson, Randy D. ug Andrea Funk, Janet S. Scharman, ug sa mga misyonaryo sa Indonesia Jakarta Mission.
7. Tan-awa usab sa Cecil O. Samuelson, “What Does It Mean to Be Perfect?” *New Era*, Ene. 2006, 10–13; Janet S. Scharman, “Seeking Perfection without Being a Perfectionist,” sa *Virtue and the Abundant Life: Mga pakigpulong gikan sa BYU Religious Education and Wheatley Institution Symposium*, ed. Lloyd D. Newell ug sa uban (2012), 280–302.

# BALAANG MGA PAKIGSAAD

## MAKAHIMO OG LIG-ONG MGA KRISTIYANO

*Unsa man ang mahitungod sa paghimo ug pagtuman sa mga pakigsaad uban sa Dios nga naghatag kanato og gahum?*



**Ni Elder D. Todd Christofferson**

Sa Korum sa Napulog  
Duha ka mga Apostoles

**N**iadtong Agosto 15, 2007, ang Peru nahiagom og grabing linog nga miguba sa hapit tanang siyudad nga daplin sa dagat sa Pisco ug Chincha. Sama sa daghang ubang mga lider sa Simbahan ug mga miyembro, si Wenceslao Conde, ang presidente sa Branch sa Simbahan sa Balconcito sa Chincha, diha-diha dayon mitabang sa uban kansang mga panimalay nangaguba.

Upat ka adlaw human sa linog, si Elder Marcus B. Nash sa Seventy didto sa Chincha nagtabang sa pagpahigayon sa tabang sa Simbahan didto ug nahimamat si Presidente Conde. Samtang sila naghisgot sa kalaglagan nga nahitabo ug unsa ang nahimo sa pagtabang sa mga biktima, ang asawa ni Presidente Conde, si Pamela, miduol, nagkugos sa usa sa iyang gamayng anak. Si Elder Nash nangutana ni Sister Conde kon kumusta ang iyang mga anak. Uban sa pahiyum, mitubag siya nga tungod sa kaayo sa Dios luwas ug maayo ra silang tanan. Nangutana siya sa balay sa mga Condes.

“Wala na,” yano siyang miingon.

“Ang inyong mga butang?” nangutana siya.

“Ang tanan nalubong diha sa natumpag namong panimalay,” mitubag si Sister Conde.

“Ug bisan pa niana,” miingon si Elder

Nash, “ikaw nagpahiyom samtang kita nag-istorya.”

“Oo,” siya miingon, “ako nag-ampo ug ako malinawon. Aduna kami sa tanan nga among gikinahanglan. Nia ang usag usa kanamo, nia ang among mga anak, nabugkos kami sa templo, nia namo kining talagsaon nga Simbahan, ug nia namo ang Ginoo. Matukod namo pag-usab ang balay uban sa tabang sa Ginoo.”

### **Ang Gahum sa mga Pakigsaad**

Unsa ang tinubdan sa maong moral ug espirituhanong gahum, ug unsaon sa pag-angkon niini? Ang tinubdan mao ang Dios. Ang atong access niana nga gahum pinaagi sa atong mga pakigsaad uban Kaniya. Ang pakigsaad usa ka kasabutan tali sa Dios ug sa tawo, usa ka pag-uyon kansang mga panginahanglanon gitakda sa Dios.<sup>1</sup> Niining balaang mga kauyunan, ang Dios nagbugkos sa iyang Kaugalingon sa pagpaluyo, pagbalaan, ug pagbayaw nato agig balos sa atong pasalig sa pagserbisyo Kaniya ug pagsunod sa Iyang mga sugo.

Unsa may anaa sa paghimo ug pagtuman sa mga pakigsaad uban sa Dios nga naghatag nato og gahum sa pagpahiyom sa mga kalisud, sa pag-usab sa mga kalisdanan ngadto sa kadaugan, nga “matinguhaon nga moapil

diha sa usa ka maayo nga katuyoan, . . . ug magpahinabo sa daghan nga pagkamatarung” (D&P 58:27)?

### Nalig-on pinaagi sa mga Gasa ug mga Panalangin


Una, samtang kita magmasulundon sa mga baruganan ug mga sugo sa ebanghelyo ni Jesukristo, kita makatagam-tam og padayon nga mga panalangin nga gisaad sa Dios sa Iyang pakigsaad uban nato. Kadto nga mga panalangin naghatag og mga kapanguhaan nga atong gikinahanglan sa paglihok kay sa aghaton sa paglihok samtang kita magpa-dayon sa kinabuhi. Sama pananglit, ang mga sugo sa Gi-noo sa Pulong sa Kaalam kabahin sa pag-atiman sa atong pisikal nga lawas mopanalangin kanato una ug labaw sa ta-nan sa “kaalam ug dako nga mga bahandi sa kahibalo, gani ang mga gitago nga mga bahandi” (D&P 89:19). Dugang pa, kini mosangpot sa kinatibuk-an mas himsog nga kina-buhi ug kagawasan gikan sa makadaut nga pagkaadik. Ang pagkamasulundon naghatag nato og mas dakong pagkon-trolar sa atong kinabuhi, mas dakong kapasidad sa pagba-lik ug pag-adto, sa pagtrabaho ug sa paglalang. Siyempre,

ang edad, aksidente, ug mga sakit dili kapugngan moabut gyud, apan bisan pa niana, ang atong pagkamasulundon niini nga balaod sa ebanghelyo makapalambo sa atong kapasidad sa pag-atubang niining mga hagit.

Sa dalan sa pakigsaad makakaplag kita og usa ka maka-nunayon nga suplay sa mga gasa ug tabang. “Ang gugma nga putli dili mopakyas” (1 Mga Taga-Corinto 13:8; Moroni 7:46), gugma mamunga og gugma, kalooy mamunga og ka-looy, hiyas mamunga og hiyas, pasalig mamunga og kama-ununyon ug pagserbisyo mamunga og hingpit nga kalipay. Kabahin kita sa katawhan sa pakigsaad, usa ka komunidad sa mga Santos kinsa nag-awhag, nagpaluyo ug nangalagad sa usag usa. Sama sa gipasabut ni Nephi, “Ug kon kini mao nga ang mga katawhan maghupot sa mga sugo sa Dios siya moamuma kanila, ug molig-on kanila” (1 Nephi 17:3).

### Nalig-on sa Dugang nga Hugot nga Pagtuo

Kini modala nato sa ikaduhang mga paagi diin ang atong mga pakigsaad mohatag og kalig-on—maka-hatag kini og hugot nga pagtuo nga gikinahanglan sa



paglahutay ug sa pagbuhat sa tanang mga butang nga angay sa Ginoo. Ang atong kaandam sa pagdala ngari nato sa ngalan ni Kristo ug sa pagsunod sa Iyang mga sugo nagkinahanglan og usa ka matang sa hugot nga pagtuo, apan samtang kita motahud sa atong mga pakigsaad, kana nga hugot nga pagtuo modako. Sa unang bahin, ang gisaad nga mga bunga sa pagkamasulundon mamahimong klaro, nga nagmatuod sa atong hugot nga pagtuo. Ikaduha, ang Espiritu mosulti sa kahimuot sa Dios, ug kita mobati nga luwas diha sa Iyang padayon nga mga panalangin ug tabang. Ikatulo, bisan unsa ang mahitabo, atong maatubang ang kinabuhi uban sa paglaum ug kakalma, nasayud nga kita molampus sa katapusan tungod kay kita aduna sa saad sa Dios ngari kanato sa tagsa-tagsa, pinaagi sa ngalan, ug kita nasayud nga Siya dili makapamakak (tan-awa sa Enos 1:6; Ether 3:12).

Ang unang mga lider sa Simbahan niini nga dispensasyon mipamatuod nga ang pagsunod sa pakigsaad naghatag og kasiguroan nga atong gikinahanglan sa panahon sa pag-sulay: “Kini mao [ang kahibalo nga ang ilang agianan paingon sa kinabuhi nakatuman sa kabubut-on sa Dios] nga nakapahimo sa karaang mga santos sa paglahutay sa ilang tanang mga kasakit ug mga pagpanggukod, ug sa pagdala sa . . . dili lamang sa pagkadaot sa ilang mga kagamitan, ug pag-usik sa ilang kabtangan, nga malipayon, apan usab sa pag-antus sa kamatayon sa labing makalilisang nga matang; (dili lamang motuo) nga kon matun-as na kining yutan-ong payag, didto sa langit aduna kitay balay gikan sa Dios, usa ka puloy-anan nga dili binuhat sa mga kamot, ug walay pagkatapos. (2 Cor. 5:1).”<sup>2</sup>

Kining dugang nga gipasabut nga ang paghalad bisan unsang sakripisyo nga gikinahanglan sa Dios nato, kita makaangkon sa saksi sa Espiritu nga atong dalan husto ug makapahimuot sa Dios.<sup>3</sup> Niana nga kahibalo, ang atong hugot nga pagtuo walay kinutuban, nakabaton sa kasiguroan nga ang Dios sa tukma nga panahon mohimo sa matag kasakit nga atong bahandi. (Tan-awa sa D&P 97:8–9.)

### Nalig-on pinaagi sa “Gahum sa Pagkadiosnon”

Atong gikonsiderar, una, ang mga panalangin nga makahatag og gahum ug, ikaduha, ang endowment sa hugot nga pagtuo nga itugot sa Dios niadtong motuman sa ilang mga pakigsaad uban

Kaniya. Sa katapusan nga mga aspeto sa kalig-on pinaagi sa mga pakigsaad nga akong hisgutan mao ang pagtugyan sa balaan nga gahum. Ang atong pasalig sa pakigsaad ngadto Kaniya nagtugot sa atong Langitnong Amahan sa Iyang balaan nga mga impluwensya, “ang gahum sa pagkadiosnon” (D&P 84:20), modagayday sa atong mga kinabuhi. Mahimo Niya kini tungod kay pinaagi sa atong pag-apil sa mga ordinansa sa priesthood, atong gamiton ang atong kabubut-on ug mopili sa pagdawat niini. Ang atong pag-apil sa mga ordinansa nagpakita usab na kita andam sa pagdawat og dugang nga responsibilidad nga moabut uban sa dugang nga kahayag ug espirituhanong gahum.

Sa tanan nga mga ordinansa, ilabi na niadtong anaa sa templo, kita gitugahan og gahum gikan sa kahitas-an (tan-awa sa D&P 109:22). Kining “gahum sa pagkadiosnon” moabut niana nga tawo ug pinaagi sa impluwensya sa Espiritu Santo. Ang gasa sa Espiritu Santo usa ka bahin sa bag-o ug walay katapusan nga pakigsaad. Kini mao ang mahinungdanon nga bahin sa atong bunyag, ang bunyag sa Espiritu. Kini mao ang mensahero sa grasya diin ang dugo ni Kristo magamit aron sa pagkuha sa atong mga sala ug mobalaan nato (tan-awa sa 2 Nephi 31:17). Kini ang gasa diin si Adan “nabuhì siya sa iyang kaugalingon” (Moises 6:65). Pinaagi kadto sa Espiritu Santo nga ang karaang mga Apostoles nakalahutay sa tanan nga ilang gilahun ug pinaagi sa mga yawe sa ilang priesthood misangyaw sa ebanghelyo ngadto sa kalibutan nga nailhan sa ilang panahon.

Sa dihang misulod kita sa balaanong mga pakigsaad,

ang Espiritu Santo mao ang atong maghuhupay, atong giya, ug atong kauban. Ang mga bunga sa Espiritu Santo “ang malinawon nga mga butang sa imortal nga himaya; ang kamatuoran sa tanan nga mga butang; nga nagpalihok sa tanan nga mga butang, diin nakapabuhì sa tanan nga mga butang; kana nga nasayud sa tanan nga mga butang, ug adunay gahum sumala sa kaalam, kalooy, kamatuoran, kaangayan ug paghukom” (Moises 6:61). Ang mga gasa sa Espiritu Santo mao ang pagpamatuod, hugot nga pagtuo, kahibalo, kaalam, pagpadayag, mga milagro, pagpang-ayo, ug gugmang putli, sa paghingalan sa pipila lang (tan-awa sa D&P 46:13–26).

Ang Espiritu Santo mao ang nag-saksi sa inyong mga pulong kon kamo





nagtudlo ug nagpamatuod. Ang Espiritu Santo kinsa, samtang kamo namulong sa dili maayong mga dapit, mibutang sa inyong kasingkasing unsa ang inyong isulti ug motuman sa saad sa Ginoo nga “kamo dili pagalibugon atubangan sa mga tawo” (D&P 100:5). Ang Espiritu Santo kinsa nagpadayag sa unsang paagi ninyo kuhaon ang sunod nga daw hilabihan ka dako nga babag. Pinaagi sa Espiritu Santo nga anaa ninyo aron ang uban mobati sa tiunay nga gugma ni Kristo ug makadawat og kalig-on aron mopadayon sa unahan. Ang Espiritu Santo usab, sa Iyang kinaiya isip ang Balaang Espiritu sa Saad, nga nagmatuod sa katinuod ug sa kaepektibo sa inyong mga pakigsaad ug mga saad sa Dios diha ninyo (tan-awa sa D&P 88:4–5; 109:14–15).

### Ang Langitnong Amahan Magauban Kaninyo

Balaang mga pakigsaad makahimo og lig-ong mga Kristiyano Ako moawhag sa matag usa nga

magpakasarang ug modawat sa tanang mga ordinansa sa priesthood nga inyong mahimo ug dayon magmatinud-anong motuman sa mga saad nga inyong gihimo pinaagi sa pakigsaad. Sa mga panahon sa kalisdanan, himoa nga ang labing mahinungdanon mao ang inyong mga pakigsaad ug himoa ang inyong pagkamasulundon nga eksakto. Dayon makapangayo kamo pinaagi sa pagtuo, nga walay pagduhaduha, sumala sa inyong panginahanglan, ug ang Dios motubag. Siya mopaluyo kaninyo samtang kamo naningkamot ug nagbantay. Sa Iyang kaugalingong panahon ug paagi Siya molugway sa Iyang mga kamot nganha kaninyo, mag-ingon, “Ania Ako.” ■

*Gikan sa pakigpulong sa Abril 2009 nga kinatibuk-ang komperensya, “Ang Gahum sa mga Pakigsaad.”*

#### MUBO NGA MGA SULAT

1. Tan-awa sa Giya ngadto sa mga Kasulatan, “Pakigsaad,” [scriptures.lds.org](http://scriptures.lds.org).
2. *Lectures on Faith* (1985), 67.
3. Tan-awa sa *Lectures on Faith*, 69–71.



  
**MGA LEKSYON  
SA DOMINGGO**  
.....  
Ang Hilisgutan Niining Bulana:  
**Mga Ordinansa ug  
mga Pakigsaad**

# UNSAY INYONG NAKITA?

*Kon kita magtuon ug mamalandong sa mga simbolo diha sa mga ordinansa sa ebanghelyo, ang atong mga hunahuna masentro diha kang Jesukristo.*

**Ni David A. Edwards**

Mga Magasin sa Simbahan

**T**ungod kay ang mga simbolo naglibut kanato, dili kaayo kita maghunahuna niini. Apan ang makugihong pagbantay sa mga simbolo sa ebanghelyo mahimong usa ka yawe ngadto sa labaw nga panabut.

Ang mga kasulatan naggamit sa mga pulong sama sa *matang, anino, simbolo, timaan, timailhan, sambingay, handumanan, saksi, o pagpamatuod* sa paghulagway sa usa ka butang nga gituyo aron mapunting ang atong mga hunahuna ngadto sa lain pang butang (tan-awa sa Moises 6:63). Sama pananglit, sa dihang si Jesus mipasiugda sa sakrament diha sa Katapusang Panihapon, Siya mihatag

sa Iyang mga disipulo sa gipikas-pikas nga tinapay nga ilang kaunon ug miingon, “Kini mao ang akong lawas nga gihatag alang kaninyo: buhata ninyo kini sa paghandum kanako” (Lucas 22:19). Karon, klaro kaayo nga ang tinapay dili literal nga Iyang lawas; sama sa Iyang giingon, gituyo kini sa *pagpahinumdum* kanato sa Iyang lawas—*ug daghan pa*. Kana ang nakahimo sa mga simbolo nga gamhanan kaayo—kini mopasabut bisan dili mogamit og mga pulong ug makaugmad og pipila ka mga susamang hunahuna diha-diha, nga nagdugang og gilawumon ug kahulugan.

Siyempre, ang mga ordinansa dili

lamang pangsimbolo nga mga lihoc; kini nagdala og tinuod nga gahum sa pagpanalangin kanato pinaagi sa awtoridad sa priesthood. Apan kini usab naglakip og mga simbolo nga nagtudlo kanato mahitungod sa Manluluwas ug mahitungod sa atong mga pakigsaad. Bisan ang buhat sa pagtugyan ngadto ug pagdawat og usa ka ordinansa sa priesthood mao ang usa ka makitang timailhan sa hugot nga pagtuo ug pagkamapainubsanon sa usa ka tawo. Ania ang kadaghanan sa mga simbolo nga may kalabutan sa mga ordinansa sa bunyag, kumpirmasyon, ug ang sakrament, ingon man ang pipila sa mga ideya nga may kalabutan niini. ■

## BUNYAG



**Giisa nga tuong kamot:** pagkab-ut ngadto sa langit, pagsaksi ngadto sa langit; usab timaan sa usa ka panumpa (tan-awa sa Genesis 14:22; Daniel 12:7)

**Pagpaunlod:** ang kamatayon, paglubong ug Pagkabanhaw ni Kristo (tan-awa sa Mga Taga-Roma 6:3-4); atong espirituhanong pagpakatawo og usab diha kang Kristo (“igaaanak sa tubig” [Juan 3:5])

**Tubig:** paghugas, paglimpyo, pagkalunsay gikan sa sala

**Puti nga sinina:** kaputli (“walay usa ka tawo nga maluwas gawas kon ang iyang mga saput mahugasan nga puti . . . [ug] mahugasan . . . pinaagi sa dugo [ni Kristo] [Alma 5:21]); pagkaporeho (adunahan o kabus, tanan magsul-ob sa sama nga sinina sa bunyag, kay “ang tanan managsama ngadto sa Dios” [2 Nephi 26:33])

## KUMPIRMASYON

**Pagpandong sa mga kamot:** pisikal nga paghikap niadtong nagrepresentar sa Dios, pagbalhin sa mga panalangin gikan sa Dios ngadto sa uban

**Pagdawat sa gasa sa Espiritu Santo:** gitawag og “bunyag sa kalayo” (tan-awa sa 2 Nephi 31:13); pagkalimpyo ug espirituhanong pagpakatawo og usab diha kang Kristo



## SAKRAMENT

**Pagkaon sa pan:** paghinumdom sa lawas ni Jesukristo (tan-awa sa Mateo 26:26–29), ang pan sa kinabuhi (“siya nga moari kanako dili gutumon” [Juan 6:35], “siya nga mokaon niining maong tinapay mabuhi sa dayon” [Juan 6:58])

**Pagluhod aron mag-ampo:** pagpaubos, pagtugyan ngadto sa kabubut-on sa Dios; timaan sa walay kata-pusan nga pakigsaad (tan-awa sa D&P 88:131)

**Ang pagpikas-pikas sa pan:** lawasnong pag-antus ni Kristo alang kanato, Iyang pisikal nga kamatayon, Iyang Pagkabanhaw aron kita mabuhi pag-usab

**Pagbutang og pan ug tubig sa atubangan sa kongregasyon:** mga simbolo sa sakripisyo ni Kristo, nga maoy nagtapos sa sakripisyo pinaagi sa pagpaagas sa dugo (tan-awa sa Alma 34:13–14); kita karon mohalad og usa ka “sakripisyo ngadto sa Ginoo . . . nga usa ka masulub-on nga kasingkasing ug usa ka mahinulsulon nga espiritu” (D&P 59:8)

**Pag-inom sa tubig (bino sa orihinal):** ang dugo ni Kristo (gipaagas sa Getsemani, atol sa Iyang pag-antus diha sa mga sundalo, ug diha sa krus), diin “nagahinlo kanato gikan sa tanang sala” (1 Juan 1:7) ug “anaa sa pakigsaad sa Amahan ngadto sa kapasayloan sa [atong] mga sala” (Moroni 10:33); dugo isip “sa lingkuranan sa kinabuhi o kusog nga mahinungdanon sa tanan nga unod (Giya ngadto sa mga Kasulatan, “Dugo”; scriptures.lds.org) ug kana nga nag-ula alang sa mga sala pinaagi sa sakripisyo (tan-awa sa Levitico 17:11); buhi nga tubig (tan-awa sa Juan 4:14)



### NAG-FOCUS SA PAG-ULA

“Ang matag ordinansa sa ebanghelyo nag-focus sa usa o laing paagi ngadto sa pag-ula ni Ginoong Jesukristo, ug mao kana kon ngano nga kining piho nga ordinansa [sa sakrament] uban sa tanan niini nga mga simbolo ug paglarawan mas dali ug pabalik-balik nga moabut kanato kay sa uban sa atong kinabuhi.”

Elder Jeffrey R. Holland sa Korum sa Napulog Duha Ka mga Apostoles, “This Do in Remembrance of Me,” *Ensign*, Nob. 1995, 67.

## APIL SA PAG-ISTORYAHANAY

### MGA BUTANG NGA PAMALAN-DUNGON SA DOMINGGO

- Sa unsang paagi ang mga simbolo sa mga ordinansa sa bunyag, kumpirmasyon, ug sa sakrament makatabang kanimo sa paghinumdom sa Manluluwas ug sa imong mga pakigsaad?
- Unsay mosulod sa imong hunahuna atol sa sakrament matag semana?

### MGA BUTANG NGA MAHIMO NIMONG BUHATON

- Pagsulat sa imong journal og usa ka butang nga imong gihunahuna o gibati atol sa sakrament.
- Sa simbahan, maghisgut kabahin sa usa ka simbolo sa sakrament ug sa unsang paagi kini makatabang kanimo sa paghinumdom sa Manluluwas.



# ATONG LUNA

## BUNYAG ALANG SA AKONG LOLO

Mapasalamaton ako nga ang among mga lider sa kabatan-onan nagplano sa pagbisita sa templo. Samtang nangandam kami alang niini nga biyahe ngadto sa Apia, Samoa, nalipay kami niining talagsaon nga oportunidad. Malipayon kami nga miadto sa templo aron sa paghimo og mga bunyag alang sa patay—alang niadtong anaa sa kalibutan sa espiritu nga nagpaabut kanamo sa pagpangita sa among family history ug mohimo sa buhat alang kanila.

Atol sa bunyag, akong nakita ang usa ka batan-ong lalaki sa among grupo nga gibunyagan alang ni Faataga Agavale, ang akong lolo. Nakahilak ako sa tumang kalipay, ug ako nasayud nga anaa didto ang iyang espiritu. Nalipay kaayo ko nga among nahimo ang buhat alang kaniya diha sa templo.

Saini Agavale, Samoa



## MAHINUNG DANON NGA IMPORMASYON GIKAN SA USA KA HIGALA

Sip usa ka tin-edyer, dili ko ganahan moadto sa simbahan, mao nga wala kaayo koy nasayran mahitungod sa Biblia o mahitungod sa Dios, ug dili pud nako gusto. Sa dihang 17 anyos ko, usa nako ka higala miingon kanako nga usa siya ka Mormon. Wala akoy ideya kon unsa na ang Mormon. Akong gisultihan ang akong higala, “Kon gusto kong masayud og bisan unsa mahitungod niana nga simbahan, ako mismo ang mangita.”

Nakakita nga wala kaayo koy pagpakabana bahin sa relihiyon, siya mihatag nako og Basahon ni Mormon ug mihangyo nako sa pagbasa niini ug sa pag-ampo mahitungod niini. Siya wala mamugos nako. Sa wala madugay nianang gabhiona samtang akong giablihan ang basahon, akong namatikdan iyang pagpamatuod nga gisulat diha sa atubangan. Samtang nagbasa ko niini, akong gibati nga kinahanglan ko nga masayud pa mahitungod sa Basahon ni Mormon. Busa misugod ako sa pagbasa sa 1 Nephi. Naganahan kaayo ko sa pagbasa niini. Kinahanglan nga daghan pa ko og makat-unan.

Sa usa ka family home evening, ang iyang pamilya

mitudlo kanako kabahin sa ebanghelyo ni Jesukristo. Ang tanan ingon og makatarunganon. Sa wala madugay gitudloan ko sa mga misyonaryo ug nabunyagan ug nakumpirmahan nga usa ka miyembro sa tinuod nga Simbahan sa Ginoo. Ang ebanghelyo nakatabang kanako nga mahibalo kinsa ko, diin ko gikan, ug asa ako mahimo nga moadto kon ako magmatinud-anon.

Samtang ako naghinumdom, akong nakita kon sa unsang paagi nga ang Espiritu Santo mitabang kanako nga gusto pa nga magkat-on. Samtang nadugangan ang akong pagkat-on, nausab ang akong kinaiya mahitungod sa simbahan ug sa Dios. Sa unang higayon sa akong kinabuhi, gusto nako nga mobuhat sa unsay gusto Niya nga ipabuhat kanako.

Ang Basahon ni Mormon nakapausab sa akong kinabuhi, ug mapasalamaton ako sa akong higala kinsa mipakigbahin niini ngari kanako. Ang usa ka tinuod nga higala mopakigbahin og mahinungdanon nga impormasyon sama niini.

Michael P., Ohio, USA



**Ni Randall L. Ridd**

Ikaduhang  
Magtatambag  
sa Kinatibuk-ang  
Kapangulohan sa  
Young Men

# TRABAHO

## KINSAY NAGKINAHANGLAN NIINI?

*Ang trabaho dili kanunay makalingaw, apan tingali mahibulong kamo sa kanindot sa inyong bation niini.*

**I** sip usa ka batan-ong lalaki, ganahan ko nga magdula ug maglingaw-lingaw sama ni bisan kinsa. Ug sa dihang nag-16 na ko, ganahan ko makig-date ug makig-uban sa akong mga higala. Mas nalingaw ko niadto nga mga kalihokan kay sa mga trabaho.

Apan, sama sa kadaghanan kaninyo, ako adunay trabaho. Ang akong amahan nagtrabaho sa negosyo sa konstruksyon, nagtukod og mga panimalay, ug kanunay iyang paapilon ang akong tulo ka mga igsoon ug ako sa pagtabang kaniya. Ang trabaho init ug mapugsanon; adunay mga higayon nga dili gyud ko ganahan motrabaho. Apan kami adunay mga iskedyul nga tumanon ug mga proyekto nga kompletuhon, mao nga kami nagkugi matag adlaw hangtud nga mahuman ang trabaho. Bisn tuod ako wala makamatngon niini nianang panahona, ang pagtrabaho uban sa akong pamilya mitudlo kanako og daghang mga leksyon.

### Ang Katagbawan Moabut gikan sa usa ka Maayong Pagkabuhat nga Trabaho

Ang pagtukod og mga panimalay nagkinahanglan og daghang mga panahon, paningkamot, ug pagkaek-sakto. Usa ka dapit diin ako nagtuo nga dili kami kinahanglang eksakto gayud mao ang pagkalot sa mga footing alang sa balay. Ang akong amahan lahi og hunahuna.

Sa pagpahimutang sa pundasyon sa usa ka balay, unahon nimo ang pagkalot ug pagbu-bu sa mga footing. Ang mga footing mao ang mga hanig nga semento nga mas lapad sa pundasyon. Kon ang mga footing nabuhosan ug migahi na, imong ibu-bu ang pundasyon ibabaw sa footing. Dayon imoha kining tabunan og balik sa kinalot nga yuta.

Kanunay akong naghunahuna kon importante ba gyud nga hingpit ang pagka-kwadrado sa mga footing. Total, kay gitabunan man kini sa yuta, dili ni makita ni bisan kinsa, ug dili kini makapahuyang sa estruktura nga

nagsuporta sa balay. Apan ang akong amahan gusto gyud nga ang mga footing kwadrado ug patag, gisukod sa sakto ug mainampingong paagi, ug iya kining gibuhat sa matag balay nga iyang gitukod.

Sa paghinumdom, akong naamgo-han nga ang akong amahan mihimo sa tanan niyang trabaho uban sa sama nga pag-amping, gani bisan sa mga butang nga dili mabantayan sa tag-iya. Ang iyang pagkadetalyado sa trabaho nagpasabut nga ang mga tawo makasalig kaniya sa pagbuhat og maayo nga trabaho, ug siya adunay katagbawan nga mahibalo nga maayo kaayo ang kalidad sa iyang trabaho ug nga modayeg niini ang mga tag-iya.

Mahimong may mga panahon nga walay laing masayud gawas ninyo ug ang Ginoo kon unsa ka maayo ninyong gihimo ang buhat nga gikinahanglan ninyo nga buhaton. Pagmasaligon nga ang Ginoo *maoy* nasayud sa inyong paningkamot. Samtang inyong buhaton ang inyong labing maayo, kamo mobati og kamaayo sa inyong



kaugalingon, nasayud nga kamo napalambo og kaligdong, kasaligan ug mapuslanon nga mga kahanas.

Makakat-on kamo pinaagi sa inyong kasinatian sa kabililhon sa balaod sa ting-ani sa Ginoo: “Kay bisan unsay igapugas sa tawo, mao usab kana ang iyang pagaanohon” (Mga Taga-Galacia 6:7; tan-awa usab sa D&P 130:20–21).

### Ang Kinaiya Moapekto sa Tanan

Ang pagkalot sa mga footing nagpasabut og dugayng kahago, sa mga oras nga naa ang kainit, ug moangkon ko, dili kanunayng maayo akong kinaiya kabahin niini. Matag higayon nga masakpan ko sa akong inahan nga nagreklamo sa trabaho, siya moingon, “Pagbantay. Mawala unya na ang imong panalangin, ug kinahanglan gihapon ka nga motrabaho!” (Tan-awa sa D&P 58:28–29.) Husto siya. Ang pagreklamo dili gyud makapawagtang sa trabaho; makapawagtang lang kini sa katagbawan ug sa daghang mga panalangin sa pagbuhat niini.

Akong nabantayan nga kon akong pilion ang pagpaminaw sa akong inahan ug motrabaho uban sa malipayon nga kasingkasing, mas dali nga molabay ang panahon, mas maayong pagkatrabaho ang buluhaton, ug mas nagmalipayon ko kay sa kon ako nagreklamo. Ang kinaiya moapekto sa tanan.

### Ang Labing Importante nga Trabaho Mao ang Buhat sa Dios

Ang pagserbisyo og misyon maoy usa ka kasinatian nga nakatabang sa akong pagsabut sa akong kaugalingon. Akong naamguhan nga walay laing buhat nga mas importante kay sa buhat sa atong Langitnong Amahan, nga mao ang pagpanalangin kanato, Iyang mga anak: “Kay tan-awa, mao kini ang akong buhat ug ang akong himaya—ang pagpahinabo sa pagkamortal ug sa kinabuhi nga dayon sa tawo” (Moises 1:39).

Samtang kamo nagbuhat sa buhat sa Langitnong Amahan sa pag-alagad sa Iyang mga anak, inyong makapalagan, sama ni Alma, ang dakong

kalipay nga mahimong “himan diha sa mga kamot sa Dios aron sa pagdala sa pipila ka mga kalag ngadto sa paghinulsol; ug kini mao ang [inyong] hingpit nga kalipay” (Alma 29:9).

### Usa ka Pagdapit

Busa kinsay nanginahanglan sa trabaho? Kitang tanan! Kini mao ang tinubdan sa pagpaningkamot sa kaugalingon, kalamposan, ug hingpit nga kalipay niining kinabuhia. Samtang kamo magmalipayong motrabaho, tanang naglibut ninyo moani og buhong nga ani tungod sa mga liso nga inyong gipugas.

Samtang magpadayon kamo sa inyong semana, ako modapit kaninyo sa paghunahuna mahitungod sa mga leksyon nga akong nakat-unan ug dayon sulayi kini nga eksperimento: sa sunod higayon nga hatagan kamo og trabaho nga buhaton, hatagi kini sa inyong pinakamaayo nga paningkamot, pagbaton og malipayon nga kinaiya, ug tan-awa unsa ang mahitabo. Masurpresa kamo sa kalipay ug kamaayo nga inyong bation. ■

# PAGBALHIN OG TUBO GAMIT ANG LAPUKON NGA SAPATOS


*Dili na ko gusto nga  
mobalhin og usa pa ka  
tubo sa sprinkler.*

Ni Raymond M. Allton

“Salamat, Bishop Rowley. Malipayon kami nga motabang.” Si Brother Hulet, among tigtambag sa korum sa deacon, mikuha sa clipboard gikan sa mga kamot sa bishop ug mipahibalo, “Duna koy listahan sa gustong moboluntaryo sa umahan sa Simbahan. Sigurado ko nga ang Ginoo malipay kon kitang tanan motabang niining moabut nga semana.”

“Unsa nga matang sa tabang?” Madudahon kong nangutana. Kini nga ideya sa umahan sa Simbahan mora og dili kaayo makalingaw.

“Ang ato lamang buluhaton karong semanaha mao ang pagbalhin sa tubo sa sprinkler.”



Magbalhin sa tubo! Nakuyawan ko sa mga pulong. Nakahunahuna ko niadtong pipila ka bulan na ang milabay sa dihang si mama miinsister nga motrabaho ko panahon sa among bakasyon sa ting-init. Sa among gamay nga lungsod, usa ra ka butang ang gipasabut ana—magbalhin sa mga tubo. Mao nga sa tibuok panahon sa ting-init, ako ug ang akong ig-agaw nga si Scott namalhin sa mga tubo.

Sa unang adlaw sa among trabaho sa ting-init, nagbarug mi nga naglantaw tadlas sa halapad kaayong lugar sa green alfalfa. Ang mga tubo nga tag-40 ka pye ang gitason (12 m) gisumpay-sumpay sa usa ka tul-id nga linya nga daw pipila ka kilometro ang gitason. Human sa usa ka mubo nga pagbansay, si Scott ug ako mitangtang sa among una nga tubo. Gialsa ni Scott ang pikas tumoy, ug ang bugnaw nga tubig misabyag sa akong goma nga sapatos. Among gialsa ang tubo agi sa pilit nga lapok ug gitaud kini didto sa sunod nga nagbarug nga tubo. Samtang kami naglakaw balik ngadto sa sunod nga tubo, ang akong basa nga sapatos nagkabug-at samtang nagkabaga ang lapok nga mipilit niini. Sa katapusan, ang lapok, tubig, ug among kaugalingong mga singot mibasa sa among mga sinina ug nakapaguol namo pag-ayo.

Ang akong hunahuna mibalik ngadto sa pagboluntaryo sa umahan sa Simbahan. “Nan, morag dili—dili ko makaadto,” nagkanga-kanga ko. “Kinahanglan ko nga moadto sa akong kaugalingong trabaho kada buntag.”

“Walay problema na,” misiguro si Brother Hulet. “Kanunay nga hapon na kami moadto sa umahan sa Simbahan.” Gipasa-pasa ni Brother Hulet ang listahan sa moboluntaryo. “Sa dihang ang matag usa kaninyo gi-orden sa priesthood, gihatagan kamo og gahum sa paglihok ubos sa ngalan sa Dios. Ug kon kita moserbisyo Kaniya pinaagi sa pagserbisyo sa uban, kita naglihok diha sa Iyang ngalan. Gawas pa, uban sa pagtabang natong tanan, ang trabaho ingon og dili na lisud.”

Ang lista gipasa ngari kanako. Dili ko makatuo nga, sa pagkakaran, ang tanan nagpalista nga moadto matag adlaw karong semanaha. Wala ba sila masayud unsa kini ka miserable? Akong gibati ang gibug-aton sa matarung nga pagpamugos sa akong mga kaubanan ngari kanako. Nagpanuko, akong gilista akong ngalan ug gipasa kini.

Lunes sa hapon, naglingkod ko sa akong kwarto nagpahuway gikan sa trabaho sa buntag sa dihang nakadungog ko ni Brother Hulet nga nagbusina sa gawas. Nagduhaduha ko sa makadiyot usa pa ko misul-ob og balik sa akong baho, umug nga sinina pangtrabaho.

Sa wala madugay miabot mi sa umahan sa Simbahan. Ang tanan gawas nako midali pag-adto sa umahan. Nagpaulahi ko, gaduko ang ulo, nagpatid-patid sa mga bato, sa

dihang nakalitan ko sa usa ka kamot nga miagbay sa akong abaga. “Salamat sa imong pag-uban,” si Brother Hulet miawhag. “Nasayud ko nga mitrabaho ka og maayo ganhang buntag.” Hilum mi nga nanglakaw sulod sa pipila ka gutlo. Dayon miuna siya aron sa pag-organisar sa grupo.

Ako siyang gitan-aw ug gihunahuna ang iyang gisulti kanako. Mitrabaho ko og maayo nianang buntaga. Gikapoy ko ug nanimaho, ug gusto kong mouli sa balay. Apan si Brother Hulet diay? Siya usab mitrabaho og maayo nianang buntaga. Gani, mao usab ang tanan nga mga lalaki. Busa ngano man nga daw malipayon man sila nga mianhi?

Miapas ko sa uban, ug misugod mi sa among trabaho. Sa sinugdanan, naningkamot ko nga modasig sa akong kaugalingon pinaagi sa paghunahuna sa halangdong sakripisyo nga akong gihimo. Apan sa wala madugay ang akong pagsige og hunahuna sa kaugalingon natapos, ug akong namatikdan unsa ka paspas ang among trabaho uban sa tabang sa tanan. Nagkinataw-anay ug nag-istoryahanay mi, ug sa kalit akong naamguhan nga nalingaw na diay ko! Sa pipila ka mubong mga oras among nahuman ang among buluhaton.

Sa among pagpamauli, nakaamgo ko nga ang akong gituohan nga dili makaya nga sakripisyo ingon og gamay ra. Gani, uban sa pagtabang sa tanan, ingon og dili kadto usa ka sakripisyo.

Gipahunoy ni Brother Hulet ang iyang sakyanan atubangan sa akong balay ug milingi kanako. “Salamat sa imong tabang karon. Ang imong pagkugi nakapahimo niining sayon alang kanatong tanan.” Siya mipahiyum ug mikidhat.

Mibawos ko og pahiyum. “Salamat, apan ang atong pagtinabangay tanan maoy naghimo niini nga sayon.” Nanaog ko sa sakyanan ug gisirado ang pultahan.

Misugod si Brother Hulet sa pagpadagan sa sakyanan. “Nan, magkita ta ugma?” misinggit siya diha sa abli nga bintana.

“Oo. Magkita ta ugma,” miingon ko. ■  
*Ang tagsulat nagbuyo sa Utah, USA.*



# MUBO UG DIREKTA



Kon ako makig-istorya sa akong mga higala kabahin sa Simbahan, sila moingon nga sila dili interesado tungod kay kini adunay daghan kaayong mga lagda. Unsay akong isulti kanila?

Ang atong kinaiya ngadto sa bisan unsang “lagda” dako og kala-butan sa kon unsay atong naandan. Kon ang inyong mga higala naanand nga dili magsepilyo ug ikaw misulti kanila nga magsepilyo ka kada adlaw tungod kay gitudloan ka, tingali sila maghunahuna niini nga usa ka mapig-uton nga lagda. Apan kamo wala gani maghunahuna niini isip lagda tungod kay nabatasan na kini, usa ka paagi sa kinabuhi. Samtang sila tingali naghunahuna nga ang dili pagsepilyo usa ka matang sa kagawasan, kamo masayud sa mga problema nga padulngan niini ug unsa ka mas maayo ang bation nga adunay limpyo, himsog nga mga ngipon.

Mao usab kini sa mga “lagda” sa Simbahan. Ang inyong mga higala

tingali maghunahuna nga ang mga sumbanan nga atong gisunod mapig-uton, apan kamo nasayud nga ang Ginoo ug ang Iyang mga sulugoon mihatag niini ngari kanato sa pagtabang kanato nga mopuyo og mas maayong kinabuhi ug makabalik sa Langitnong Amahan. Usab, ang pagkamasulundon sa mga sugo sa Dios kanunay nga nagdala og mga panalangin, dili maoy kinaminosan ang pagpakig-uban sa Espiritu Santo. Mahimo ninyong sulayan sa paghulagway niini nga mga kaayohan ug mga panalangin ngadto sa inyong mga higala, ug kamo makasulti kanila nga ang bugtong paagi aron mailhan gayud kon ang mga “lagda” gikan ba sa Dios mao ang pagsulay niini (tan-awa sa Juan 7:17). ■

## Ngano nga gilalang kita sa Dios?

Importante kini nga masabtan nga ang Dios wala “molalang” kanato sa paagi nga kita gipatumaw gikan sa wala. Adunay sukaranang bahin kanato nga anaa na bisan sa wala pa ang pagkatawo sa atong espiritu: “Ang tawo mao usab diha sa sinugdanan uban sa Dios. Ang salabutan, o ang kahayag sa kamatuoran, wala malalang o mabuhat, ni dili gayud mahimo” (D&P 93:29). Tungod kay kita nasayud niini, kita usab nasayud nga ang tinguha sa Langitnong Amahan sa paglalang kanato dili pasagad o binuut-buot apan may halawum nga katuyoan. Si Propeta Joseph Smith mitudlo, “Ang Dios mismo sa kaugalingon, nakakita nga siya anaa sa taliwala sa mga espiritu ug kahimaya-an, tungod kay siya mas labaw pa ka maalamon, nakakita nga angayan sa pagmugna og mga balaod diin ang uban makabaton og kahigayunan sa pag-uswag sama sa iyang kaugalingon” (*Mga Pagtulun-an sa mga Presidente sa Simbahan: Joseph Smith* [2007], 251; tan-awa usab sa Moises 1:39). Tungod kay ang Langitnong Amahan gusto nga kita adunay kahigayunan sa pag-uswag ug mahimong sama kaniya, Siya milalang sa atong mga espiritu, ug Siya mihatag og usa ka plano sa kaluwasan ug kalipay nga kinahanglan nga maglakip niining yutan-on nga kasinatian. Tingali, ang labing yano ug labing maayo nga tubag niini nga pangutana mao usab ang tubag sa kon ngano ang Dios nagbuhat sa tanan: tungod kay Siya nahigugma kanato. ■

# ANG MGA BUTANG USAHAY LAHI KAY SA ATONG NAKITA

Siguroa nga ang inyong lingaw-lingaw ug panimpalad dili  
modala kaninyo ngadto sa makuyaw nga dalan.

*(Tan-awa sa Helaman 3:29.)*





# PAGSERBISYO ALANG SA

Ni Rasem Maluff

**N**iadtong 2011, akong gihimo ang usa sa labing importante nga mga desisyon sa akong kina-buhi. Kini nakahatag kanako sa labing mahinungdanon nga mga panalangin nga sukad akong naangkon. Mihukom ko nga moserbisyo og misyon, apan dili kini sayon nga desisyon.

Ang Ginoo mihatag kanako og oportunidad nga malingaw sa football atol sa akong pagkabata ug sa akong kabatan-onan. Akong girepresentar ang Paraguay sa internasyonal nga mga sangka, nagbiyahe uban sa nas-yonal nga team sa football sa kabatan-onan sa among nasud, ang Libertad, ngadto sa mga nasud sa Uropa, Asya, ug South America.

Maayo gani, ang akong mga ginikanan kanunayng mipauban sa akong mga kalihokan sa sports og tukma nga edukasyon ug espirituhanon nga pagmatuto. Ang hugot nga pagtuo ug pagpamatuod sa akong inahan mao gayud ang mga liso diin ang akong kaugalingong hugot nga pagtuo ug pagpamatuod mitubo. Tungod sa iyang pagkamatitud-anon, miapil ko

sa seminary bisan sa akong busy nga iskedyul sa dula.

Bisan og nakadungog na ko mahitungod sa full-time nga mga misyon sukad pa sa akong pagkabata, wala pa gyud ko makadesider sa pagserbisyo og misyon. Kana nausab sa dihang ang akong amahan midawat sa tawag sa pagserbisyo sa bishopric sa among ward. Lisud kini nga desisyon alang sa akong amahan, tungod kay siya nalambigit gayud sa akong mga kalihokan sa sport. Anaa siya kanunay sa akong pagpraktis og football ug sa mga sangka, ug migahin kami og dakong panahon nga magkauban. Tungod niini, ang pagdawat sa tawag nga moserbisyo sa bishopric nagpasabut nga dili na siya makahatag og panahon sa pagsuporta sa akong propesyon.

Sa miting sa sakrament diin gipaluyohan ang akong amahan, usa ka gamhanan nga hunahuna miabut kanako, nagsulti kanako nga ang mga sakripisyo sa uban makawang ra kon dili ako andam nga mosakripisyo sa importante nga mga butang

alang sa husto nga mga rason. Atol sa mga pagpamatuod, usa ka tawo namulong mahitungod sa ideya nga kon kita masulundon, ang atong mga pamilya mahimong mahangturon. Kana nga hunahuna mitandog sa akong kasingkasing, ug ako nakahukom nga akong buhaton ang bisan unsa kutob sa akong mahimo aron makauban ang akong pamilya sa kahangturan. Atol sa mga klase niadto nga Domingo, ang kaimportante sa pagsunod sa mga sugo nahisgutan sa makadaghan nga higayon. Kusog kaayo nakong nabati ang Espiritu nga nag-aghat kanako sa pagserbisyo sa Ginoo nga panahon sa family home evening, akong gipahibalo ang akong .....

**Walay laing nakahatag kanako og ingon ka hingpit nga kalipay ug kalinaw o nakahatag kanako og ingon kadaghan nga mga milagro sama sa akong misyonaryo nga pagserbisyo.**  
.....



**INYONG AD-LAW ALANG SA MISYON**

*Sa pagtan-aw og video (sa Iningles) mahitungod sa New Zealand nga rugby player nga si Sidney Going, bisitaha ang [lds.org/go/going](http://lds.org/go/going).*



# SAKTO NGA MGA RASON

pamilya sa akong desisyon sa pagserbisyo og misyon.

Ang akong desisyon nagpasabut nga kinahanglan nakong hunongon una ang akong edukasyon sa kolehiyo ingon man sa paghusay sa akong lima ka tuig nga kontrata uban sa akong football club. Gikan sa sinugdanan, ang Ginoo miabli og mga pultahan ug mihikap sa mga kasingkasing aron mahusay ang kontrata.

Human nako masumiter ang akong mga papeles sa misyon, naminaw ko sa Abril 2011 nga kinatibuk-ang komperensya, diin si Elder Neil L. Andersen sa Korum sa Napulog Duha ka mga Apostoles mipakigbahin sa misyonaryo nga kasinatian ni Sidney Going, kinsa nahimong usa ka propesyonal nga magdudula sa rugby ug usa ka miyembro sa nasyonal nga team sa New Zealand. Ang kamatuoran nga si Brother Going miserbisyo og misyon ug wala madugay mibalik ug mipadayon sa iyang propesyon nagtudlo kanako og usa ka leksyon. Sa akong tibuok misyon hangtud niining adlaw, ang pabalik-balik

nga pagpaminaw ngadto niana nga pakigpulong mipanalangin kanako ug naghatag og kalinaw sa akong kasingkasing. Ang dili maihap nga mga pagpamatuod nga gipakigbahin kanako sa pamilya, ward, ug mga miyembro sa stake sa lain-laing mga panahon wala lamang naglig-on sa akong desisyon sa pagserbisyo apan usab naglig-on kanako atol sa lisud nga mga higayon sa akong misyon.

Usa ka dugang nga tinubdan sa katagbawan sa akong kinabuhi mao nga ang akong desisyon nga mosulod sa nataad sa misyon nakatabang sa akong tulo ka pinakasud nga mga higala nga modesisyon usab sa pagserbisyo og misyon. Sila wala madugay miserbisyo isip mga zone leader, isip assistant sa presidente sa misyon, ug gani isip usa ka presidente sa branch. Karon ang among mga mata nakapunting diha sa dalan nga motugot kanamo nga makabalik ngadto sa presensya sa Langitnong Amahan.

Dili na ako ang samang tawo kon si kinsa ko tulo ka tuig na ang milabay. Ang akong labing dako nga tinguha

mao ang pagbuhat sa kabubut-on sa Ginoo. Ang Ginoo mipanalangin kanako “usa ka gatus ka pilo” (Mateo 19:29). Ako adunay usa ka buhi ug tinuod nga pagpamatuod sa kaba-laan sa Langitnong Amahan, sa Iyang Pinalanggang Anak ug sa Iyang Pag-ula, ang makapalimpyo nga gahum sa Balaang Espiritu sa Dios, ug sa kabilulongan nga buhat ug katingalahan niining ulahing mga adlaw, sa dihang ang ebanghelyo gipahiuli nganhi sa kalibutan pinaagi ni Propeta Joseph Smith (tan-awa sa Isaias 29:14).

Ang akong kasingkasing napuno sa gugma ug pasalamat alang niining sagrado nga panahon ug sa pagkaila ug paghigugma sa daghan kaayong mga kaigsoonan didto sa Uruguay Montevideo Mission. Pipila lamang ang ingon ka dako nga mga panalangin sama sa pagserbisyo taliwala kanila. Walay laing nakahatag kanako og ingon ka hingpit nga kalipay ug kalinaw o nakahatag kanako og ingon kadaghan nga mga milagro sama sa akong misyonaryo nga pagserbisyo. ■  
*Ang tagsulat nagpuyo sa Paraguay.*

# ANG MGA MORMON NAGTUO **GYUD** SA DIOS



*Sa usa ka airport nga layo sa balay, aduna akoy kahigayunan sa pagpakigbahin sa ebanghelyo ngadto sa usa ka estranghero.*



Ni Brenda Hernandez Ruiz

Nagbiyahe ako gikan sa Mexico padulong sa Montana, USA, ug adunay mubong higayon nga mapundo sa Denver, Colorado. Milibut ko sa airport, diha sa dagkong bintana ako nagtan-aw sa mga eroplano nga milan- ding ug milupad. Nakulbaan ko tungod kay wala pa gayud ako makasakay og eroplano sukad. Ang airport ingon og dako kaayo.

Mitan-aw ko sa akong tiket ug nakaamgo nga aduna pa akoy duha ka oras sa dili pa molarga ang akong sak- yan nga eroplano. Mihukom ko nga mangita og lugar nga kalingkuran ug magbasa hangtud nga mosaka na ko sa eroplano. Mibati ko og kahadlok samtang nangita ko og lugar nga kalingkuran. Hapit tanang lingkuranan naa nay naglingkod. Mihukom ko nga molingkod tupad sa edaran nga babaye kinsa ingon og nag-inusara. Siya ra ang bug- tong tawo nga ingon og dili makahadlok kanako.

Mga usa pa ka oras ang milabay una ko mihukom nga makigsulti kaniya. Akong gipaila-ila ang akong kaugalingon;

medyo maayo ra siya ug ganahan siya maghisgut kanako kabahin sa mga kalampanan sa iyang apo. Nangutana siya og gamay kabahin nako, ug misugilon ko niya kabahin sa akong kinabuhi sa Mexico. Dayon aduna koy usa ka kalit nga kadasig nga mopakigbahin sa ebanghelyo ngadto ka- niya. Nangutana siya nako mahitungod sa akong relihiyon, ug ako siyang giingnan nga usa ako ka miyembro sa Ang Simbahan ni Jesukristo sa mga Santos sa Ulahing mga Adlaw.

Siya miingon nga wala gayud siya makadungog niini.

Mipahiyum ko ug miingon, “Nailhan usab kami isip mga Mormon.”

Diha-diha dayon nausab ang iyang kinaiya. Ang iyang pamayhon ug paagi sa pakigsulti kanako nausab. Daw wala siya masayud unsay isulti. Akong gibati nga ang among panag-istoryahanay nahuman na, apan misulay gihapon ko sa pakigsulti kaniya. Ako siyang gipangutana kabahin sa iyang relihiyon. Siya misulti sa walay pagduha- duha, “Katoliko ko.”



Dayon siya miingon, “Wala ko makasabut. Nindot kaayo ka nga babaye. Ingon og desente ka. Nan, ngano man nga gusto ka nga mahimong usa ka Mormon?”

Nakalitan ko niini nga komentaryo, ug wala ko masayud kon unsaon sa pagtubag. Mihalad ko og hilum nga pagampo, naghangyo sa Langitnong Amahan nga tabangan ko sa pagpasabut unsa ang pagka Santos sa Ulahing mga Adlaw ngari kanako. Ako siyang giingnan nga ganahan kaayo ko isip usa ka miyembro sa Simbahan, ug tungod sa mga pagtulunan sa ebanghelyo, nahimo akong mas maayo nga tawo ug motan-aw sa mga butang uban sa panglantaw.

Siya daw natingala ug miingon, “Ang mga Mormon dili motuo sa Dios.”

Naningskamot kong dili makakatawa niini nga komentaryo; hinoon mipahiyum ko ug nakaamgo nga kini ang akong kahigayunan sa pagpakigbahin sa kamatuoran ngadto kaniya. Akong gipasabut ang pipila sa atong sukaranang mga pagtuo. Ako siyang gitudloan mahitungod

sa plano sa kaluwasan ug sa importansya sa mga pamilya. Ingon og dili gihapon siya kombinsido, busa mihukom ko nga magpamatuod ngadto kaniya. Didto sa usa ka dako nga airport, napanalanginan ko og kaisug sa pagpakigbahin sa akong pagpamatuod mahitungod ni Joseph Smith, mahitungod sa buhi nga propeta ug mga apostoles, ug mahitungod sa gugma nga akong gibati ngadto sa ebanghelyo ug sa Basahon ni Mormon.

Akong gitan-aw ang relo. Oras na aron mosakay ko sa akong eroplano.

Kadtong hapon milig-on sa akong pagpamatuod sa paagi nga wala nako masinati sukad. Nalipay ko nga akong gipakigbahin ang akong pagpamatuod kaniya ug mapasalamaton nga ako nakatabang sa pag-usab sa iyang hunahuna mahitungod sa mga miyembro sa Simbahan. Ako karon mas masaligon kon adunay mangutana kanako kabahin sa Simbahan. ■

*Ang tagsulat nagpuyo sa Chihuahua, Mexico.*



Ni Presidente  
Boyd K. Packer

Presidente sa  
Korum sa Napu-  
log Duha ka mga  
Apostoles

*Ang mga sakop sa  
Korum sa Napulog  
Duha ka mga Apos-  
toles gitawag nga  
mga linain nga saksi  
ni Jesukristo.*

# Unsa ang atong mahimo aron **TAKUS** sa Espiritu?



Paminaw og makapabayaw nga musika.



Pagmatinahuron sa pagsulti.



Paghinulsol kon kamo makahimo og sayop.



Pagsinina og tarung.

Kon inyo kining  
buhaton, kamo  
pagabantayan ug  
ang Espiritu Santo  
mogiya kaninyo.

# Ang Akong Leksyon kabahin sa Hugot nga Pagtuo



Emma R., edad 11, Texas, USA

Pipila ka tuig ang milabay, nagtudlo ko og usa ka leksyon sa family home evening kabahin sa hugot nga pagtuo. Ang akong pamilya migahin og daghang mga higayon nga maghisgut kabahin sa hugot nga pagtuo tungod kay ang akong magulang nga lalaki adunay mga pangutana kon nganong kita nagkinahanglan og hugot nga pagtuo. Akong gitanom ang usa ka binhi sa melon sa usa ka gamay nga kopa. Akong gisultihan ang akong pamilya nga ang hugot nga pagtuo sama sa usa ka binhi. Kon inyo kining atimanon og maayo, ang binhi motubo.

Wala pa kaayo mi magmalampuson sa pag-ugmad og mga tanaman. Apan nanghinaut ko nga akong matatubo kini nga tanom ug nga ako mahimong maayo nga ehemplo sa hugot nga pagtuo. Akong gibutang ang kopa sa bintana ug giatiman kini. Naghulat ko ug nag-ampo nga ang akong binhi motubo.

Hapit na ko moundang, apan human sa usa ka semana sa katarasan nakakita ko og pipila ka mga berde nga nanggitib. Mitubo kini

diha sa may bintana sa misunod nga semana. Dayon ang akong mga ginikanan mitabang nako nga makakita og lugar nga matamnan niini sa luyong nataran.

Akong giatiman og maayo ang akong tanom. Gibisbisan ko kini ug giibtan sa mga sagbut. Mipadayon kini sa pagdako. Nalipay kaayo ko!

Paglabay sa pipila ka semana, nakabantay ko sa mga bulak, ug dayon misugod pagpanggamaw ang gamayng mga bunga. Among nakita ang pito ka mga melon nga mitubo diha sa tanom gikan sa akong usa ka gamay nga binhi. Alang kanako

kadto usa ka milagro ug ang tubag sa akong mga pag-ampo. Ang bunga tam-is, sama sa giingon sa Alma 32:42: “Ug tungod sa inyong kakugi ug sa inyong hugot nga pagtuo ug sa inyong pailub uban ang pulong sa pag-alima niini, nga kini mogamot diha kaninyo, tan-awa, dili madugay kamo mopu-pu sa bunga niini, diin bililhon kaayo, diin tam-is labaw sa tanan nga tam-is.”

Kini nga kasinatian nakapalipay kaayo nako ug mitudlo kanako ug sa akong pamilya nga ang hugot nga pagtuo ang usa ka tinuod nga baruganan sa ebanghelyo ni Jesukristo. ■

## IMONG TURNO

Gusto namo nga motanom og usa ka binhi uban kaninyo: nakahunahuna ba kamo sa pagpakigbahin sa inyong mga kasinatian diha sa *Liahona*? Among dawaton ang tinuod nga mga istorya kon giunsa ninyo sa pagsunod sa ebanghelyo ni Jesukristo. Sama pananglit, mahimo kamong mosulat mahitungod sa usa ka panahon diin gitubag ang inyong pag-ampo o dihang gidapit ninyo ang usa ka higala ngadto sa simbahan.

Ang inyong mga ginikanan makatabang ninyo sa pagpadala niini: online sa [liahona.lds.org](http://liahona.lds.org), pinaagi sa email sa [liahona@ldschurch.org](mailto:liahona@ldschurch.org), o pinaagi sa koreo ngadto sa address sa pahina 3. Palihug ilakip ang ngalan sa inyong ward o branch ug pagtugot sa ginikanan.



## **UNSAY NAKANINDOT SA PAG-ANGKON OG LAWAS?**

Ang atong mga lawas importante kaayo ug balaan nga ang Ginoo mitawag niini nga mga templo (tan-awa sa 1 Mga Taga-Corinto 3:16–17). Ug ang pag-angkon og lawas makalingaw usab! Ang mga lawas mahimo modagan, mokanta, mokatkat, mokatawa, mo-drawing, molangoy, mosayaw, ug mobuhat og uban pang makalingaw nga mga kalihokan. Usab, atong magamit ang atong mga lawas aron sa pagkat-on, pagtabang sa mga tawo, paghimo og mga pamilya, ug paghimo sa kalibutan nga mas maayong dapit.

## **NGANO NGA KITA ADUNAY MGA LAWAS?**

Sa wala pa kita matawo, kita mga espiritu nga walay pisikal nga mga lawas. Daghan ang mga butang nga dili nato mahimo hangtud nga kita adunay usa ka lawas. Ang Dios mipadala kanato dinhi sa yuta aron sa pagkuha og mga lawas. Nagkinahanglan kita sa espiritu ug lawas aron mahimong sama sa Langitnong Amahan. (Tan-awa sa D&P 88:15.)



# Ang Akong Lawas Usa

## UNSA KAHA KON ADUNAY MGA BUTANG NGA DILI KO GANAHAN KABAHIN SA AKONG LAWAS?

Usahay ang atong mga lawas dili molihok, mobuhat, o lahi ra tan-awon sigon sa atong gusto niini. Bisan unsa pa ang atong mga lawas karon, kita makapili nga magmapasalamaton niini ug gamiton kini sa pagbuhat og maayo nga mga butang dinhi sa yuta. Moabut ang adlaw, ang matag usa kanato mabanhaw ug makabaton og lawas nga hingpit (tan-awa sa Alma 40:23). Ang Dios nahigugma nato bisan unsa pa ang atong mga lawas, ug makahigugma usab kita sa atong kaugalingon.

## NGANONG DILI MAN SUSAMA ANG ATONG HITSURA?

Ang mga lawas lain-lain ang mga porma, kolor, ug gidak-on, ug kini kabahin sa plano sa Langitnong Amahan. Bisan tuod ang matag lawas lahi, kitang tanan gilalang sumala sa panagway sa Dios (tan-awa sa Genesis 1:26). Kana nagpasabut nga ang atong mga lawas gisunod diha sa lyang hingpit nga lawas. Ang matag usa ka lawas matahum tungod kay ang matag usa niini usa ka gasa gikan sa atong mahigugmaong Langitnong Amahan.



## UNSAON MAN NAKO PAGTAGAD ANG AKONG LAWAS?

Kinahanglan nga kita motratar sa atong mga lawas sa samang paagi nga kita moatiman sa bisan unsa nga bililhon nga bahandi—ubang sa gugma ug pagtahud. Pinaagi sa mga propeta ug sa Pulong sa Kaalam, ang Langitnong Amahan misulti kanato kon unsa ang dili maayo alang sa atong mga lawas ug unsa ang makaayo. Daghan ang mga butang nga atong mahimo aron sa pag-atiman sa atong mga lawas:

- Kaon sa makahimsog nga mga pagkaon ug pag-ehersisyo.
- Pagsinina og tarung ug himoang limpyo kanunay ang atong mga lawas.
- Tahura ang mga lawas sa ubang mga tawo.
- Ayaw markahi ang atong mga lawas og mga patik o mga pagpatusok.
- Ayaw paggamit og mga drugas, alkohol, tabako, kape, o tsa.
- Pagdula og luwas ug makalingaw nga mga dula ug magpalayo gikan sa mga kalihokan nga makuyaw.

Kon atong ampingan ang atong mga lawas, mas makahimo kita sa pagbati sa Espiritu Santo.

**Samtang kita nag-atiman sa atong mga lawas sa paagi nga ang Dios mimando, mapanalanginan kita! (Tan-awa sa Mosiah 2:41; D&P 89:18–21.)**

# ka TEMPLO

Ni Marissa Widdison  
Mga Magasin sa Simbahan



# Mahimo Kitang mga Miyembro sa Simbahan pinaagi sa Bunyag ug Pagkumpirma

Ni Jennifer Maddy

Si Mariela miabut sa balay gikan sa eskwelahan nga nagmug-ot ang iyang nawong. “Unsay problema?” Nangutana si Mama samtang nagtanom siya og mga bulak sa tanaman.

“Misaad si Sonia nga makigdula kanako, unya dili diay,” si Mariela miingon. Miyaka siya sa yuta tupad ni Mama.

“Kalooy gud,” miingon si Mama. “Importante gyud nga motuman sa mga saad. Sa sunod semana kon ikaw bunyagan ug kumpirmahan na, mahimo ka og importante kaayo nga mga saad, nga gitawag og mga pakigsaad.”

“Mao ba?” nangutana si Mariela. Siya

naghinam-hinam nga magpabunyag.

Gibutang ni Mama ang yellow nga bulak diha sa yuta. “Ikaw mosaad sa pagsunod sa mga sugo. Ikaw usab mosaad sa pagdala sa ngalan ni Jesu-kristo diha kanimo. Unsa ang saad sa Langitnong Amahan kon imo kining buhaton?”

Gihunahuna ni Mariela ang iyang nakat-unan sa Primary. “Nga ako makabatun sa Espiritu Santo uban kanako.”

“Mao kana,” miingon si Mama. “Mamahimo ka usab nga usa ka miyembro sa Simbahan ni Jesus. Unsaon nimo pagtuman sa imong saad sa pagsunod sa mga kasugoan?”

“Mahimo akong magmabination, ug makasulti ko sa kamatuoran, si Mariela miingon. “Unsay buot ipasabut sa pagdala sa ngalan ni Jesus ngari kanako?”

“Kini nagpasabut nga maningkamot ka nga mahisama Kaniya ug mobuhat sa unsay Iyang gusto nga imong buhaton,” miingon si Mama. “Unsay imong mabuhat aron mahimong mahisama kang Jesus?”

Gipatuyok-tuyok ni Mariela ang morado nga bulak tali sa iyang mga tudlo. “Akong tuparan paglingkod ang bag-ong babaye sa eskwelahan. Ug maningkamot ko nga magbinuotan ngadto ni Sonia,” siya miingon.

“Nindot kana nga mga ideya,” miingon si Mama. “Ug kon ikaw moambit sa sakrament, imong hinumduman ang imong mga saad.”

Mipahiyum si Mariela. “Nasayud ko og lain nga saad—sa pagbisbis sa bulak aron makaangkon ta og matahum nga tanaman!” ■

*Ang tagsulat nagpuyo sa Utah, USA.*

## Kanta ug Kasulatan

- “Bunyag,” *Songbook sa mga Bata*, 54 (mga bersikulo 1 ug 3)
- Juan 3:5

## Mga Ideya alang sa Panag-istorya sa Pamilya


Si Mariela naghunahuna og mga paagi nga iyang matuman ang iyang mga pakigsaad sa bunyag pinaagi sa pagsunod ni Jesu-kristo. Ang inyong pamilya makahunahuna og mga pamaagi nga mahimong mas mahisama ni Jesus diha sa panimalay, sa eskwelahan, ug sa ubang mga dapit. Paghimo og tumong sa pamilya sa paghunahuna sa pakigsaad sa bunyag kon kamo moambit sa sakrament.





# Makatuman Ko sa Akong Pakigsaad sa Bunyag


Aron makahimo og salida kabahin sa inyong mga pakigsaad sa bunyag, guntinga ang kwadro ug mga gilis sa litrato. Ipapilit o i-tape ang duha ka mga gilis sa litrato aron mahimong taas nga gilis (isapaw ang A ug B). Ipapilit o i-tape ang kwadro ug gilis sa litrato ngadto sa baga nga papel. Guntinga subay sa putol-putol nga linya diha sa kwadro aron sa paghimo og duha ka gagmayng gisi. Isulod ang gilis sa litrato agi sa mga gisi aron ang mga litrato makita diha sa atubangan sa kwadro.




**MAKATUMAN KO SA AKONG  
PAKIGSAAD  
SA BUNYAG**



**A**




Mosaad ko nga mosunod sa mga sugo.




Kon ako bunyagan,  
ako mohimo og mga saad ngadto sa  
Langitnong Amahan.


**B**



Mosaad ko nga mohinumdom  
ni Jesukristo ug maningkamot nga  
mahisama Kaniya.



Kon moambit ko sa sakrament, akong  
hinumduman ang akong mga saad ngadto sa  
Langitnong Amahan.



Kon akong tumanon ang akong mga pakig-  
saad sa bunyag, ang Langitnong Amahan  
nagsaad nga ako makabaton sa Espiritu  
Santo sa paggiya kanako.



# ATONG PAHINA



Lesslie Q., edad 6, Ecuador



Lady Q., edad 9, Ecuador



Satya S., edad 11, Indonesia



"Ang Basahon ni Mormon," William M., edad 10, Brazil



Sa among pasundayag sa Primary usa ka tuig, ako ang mitukar sa piano alang sa "Ako Mipuyo sa Langit." Pagkasunod tuig ako ang nangulo sa sinyas pinulongan alang sa "Gusto Ko nga Makita ang Templo." Pagkasunod tuig ang akong tumong mao ang pagkat-on sa "Kon Maminaw ko sa Akong Kasingkasing." Nasayud ko nga ang Ginoo mihatag kanako og mga talento, ug kinahanglan ko nga mopalambo niini ug mogamit niini sa pagpanalangin sa uban—dayon ang akong talento motubo. Ako nasayud nga ako anak nga babaye sa Dios ug nga si Jesukristo mihatag sa lyang kinabuhi alang kanako.

Luna Marisol I., edad 8, Argentina



Ni Elder Eduardo  
Gavarret

Sa Seventy

# Andam sa Pagserbisyo

*“Pagkat-on diha sa imong kabatan-on sa paghupot sa mga sugo sa Dios” (Alma 37:35).*

**N**agtubo ko sa siyudad sa Minas, Uruguay. Sa dihang sayis anyos pa ko, ang akong inahan ug mga magulang nga babaye nabunyagan sa Simbahan. Ang akong amahan wala gyud magpamiyembro sa Simbahan, apan kanunay siya nga nalipay nga moadto mi sa simbahan. Mituman pa gani siya sa Pulong sa Kaalam ug mibayad sa ikapulo.

Ang among branch gamay kaayo, ug wala kami building sa simbahan. Kami magpundok sa usa ka inabangan nga balay. Ang balay adunay gamay nga swimming pool sa gawas nga among gamiton alang sa bunyag.

Samtang nagkaduol na ang akong ikawalong birthday, naghinamhinam ako nga mabunyagan. Apan sa adlaw sa bunyag, nag-ulan kini ug tugnaw kaayo. Ang akong mama miingon nga dili lang siguro ako magpabunyag nianang adlaw tungod sa bugnaw nga panahon. Apan birthday nako kadto, ug gusto kong magpabunyag nianang adlaw.

Nakahinumdom ko nga misul-ob sa akong puti nga sinina ug miadto sa pool aron sa pagpabunyag. Nasayud ko nga bugnaw kaayo ang tubig, apan wala nako batia ang kabugnaw. Ako nasayud nga ako nagbuhat sa sakto nga butang, ug

ako adunay mainit nga pagbati.

Sa wala madugay gitukod ang usa ka chapel alang sa among branch. Niadtong panahona ang mga miyembro sa Simbahan mahimong makatabang sa pagtukod sa mga meetinghouse. Ang akong trabaho mao ang pagpamunit sa mga lansang ug mga turnilyo nga nangahulog sa yuta aron magamit

pag-usab. Yano lang kadto nga trabaho, apan importante kaayo kini ngari kanako. Kini nagtudlo kanako unsaon sa pagserbisyo, ug kini mitabang kanako sa pagpangandam alang sa umaabut nga pagserbisyo sa Simbahan. Hinumdumi nga bisan og kamo mga batan-on pa, ang mga butang nga inyong gihimo karon importante. ■





# Ako si Pedro gikan sa Brazil

Gikan sa usa ka interbyu uban ni Amie Jane Leavitt

**S**i Pedro nagpuyo sa pinakadako nga nasud sa Habagatang Amerika—Brazil. Siya nagpuyo sa Curitiba, ang kapital sa estado sa Paraná sa Brazil. Si Pedro ganahan nga mogahin og panahon uban sa iyang mama ug papa ug iyang magulang nga lalaki ug manghud nga babaye. Sila ganahan nga mobisita sa templo ug maguban nga moadto sa baybayon. Si Pedro nangindahay nga mahimong usa ka misyonaryo sa umaabut nga adlaw! ■

\* "Hello, mga higala!" sa Portuguese.



*Olá, amigos!\**

*Matag buntag ako mobasa sa mga kasulatan ug mag-ampo uban sa akong pamilya sa dili pa ko moadto sa eskwelahan. Ang akong paborito nga mga subject mao ang art ug ang kasaysayan sa Brazilian nga mga Indian. Dyutay ra ang akong mga higala sa eskwelahan nga mga miyembro sa Simbahan. Makigsulti ako kanila mahitungod sa unsay akong gituohan ug modapit kanila nga moadto sa simbahan uban kanako.*



Ganahan ko modrawing. Mogahin ko og daghang mga oras kada semana sa akong artwork. Ganahan usab ko nga mobisita sa library ug motan-aw sa mga basahon sa art.



Ang akong paborito nga istorya sa kasulatan mao ang pagbalik ni Nephi sa Jerusalem aron sa pagkuha sa mga palid nga tumbaga. Ganahan ko sa paghimo ug pagkab-ot sa mga tumong. Nagplano ko sa pag-angkon sa akong Faith in God Award sa dili pa mag-12.



Nakamatikud ba mo nga nawala ang silyo sa pasaporte gikan sa Enero? Mahimo nimo kining guntingon ug idugang na kini karon!



### GUSTO KO NGA MAKITA ANG TEMPLO

Ang akong pamilya ganahan nga mobisita sa templo sa Curitiba ug kauban nga manglakaw diha sa mga tanaman. Kwatro anyos pa lang ako sa dihang gitukod ang templo, apan akong nahinumduman nga mikuyog sa paglibut atol sa open house. Usa kini ka espesyal nga panumduman alang kanako.

### ANDAM NA NGA MOADTO!


Ang maleta ni Pedro gisudlan na sa pipila sa iyang paborito nga mga butang. Asa niining mga butanga ang inyong isulod sa inyong maleta?



Ganahan kong magdula og football. Ang laing sport nga akong gusto mao ang hapkido, usa ka matang sa martial art gikan sa Korea.



Inigka dako nako, gusto nako nga mahimong usa ka misyonaryo. Gusto kong moserbisyo sa Manaus tungod kay anaa didto ang kalasangan sa Amazon. Dayon gusto ko nga magtrabaho isip usa ka tigdisenyo sa art.



# Si Sarah Milakaw ug Milakaw

Ni Heidi Poelman

Gibase sa usa ka tinuod nga istorya



Si Sarah miambak ug milukso. Andam na siya nga makiglakaw libut sa Silver Lake uban sa iyang pamilya. Ang iyang igsoon nga lalaki, si Josh, midagan na sa unahan.




Sa wala madugay gibati na ni Sarah ang kainit sa adlaw sa iyang mga bukton. Ang iyang mga bitiis misugod na og kakapoy.

“Ayaw kabalaka,” miingon si Mama. “Hapit na ta mabalik sa atong sakyanan.”

Dayon si Sarah nakakita og usa ka dako nga pisi nga orange nga gi-ali sa dalan. “Ang taytayan naguba,” miingon si Papa. “Kinahanglan kitang maglakaw tuyok sa lawa.”

“Apan gikapoy kaayo ko!” Miingon si Sarah. Si Josh milingkod diha sa yuta ug nagmug-ot.



“Nakahinumdom ba kamo sa istorya sa mga pioneer?” Si Mama nangutana.

Mitando si Sarah. Ganahan siya sa mga pioneer.

“Kinahanglan silang molakaw og layo kaayo,” miingon si Mama. “Usahay init kaayo, ug usahay bugnaw gayud kaayo. Apan sila nagpadayon sa paglakaw. Sa dihang miabut sila sa ilang bag-o nga pinuy-anan, sila mitukod og mga balay ug mga templo.”

Si Sarah nalipay nga ang mga pioneer mipadayon sa pagpanglakaw. Siya usab mopadayon sa paglakaw. Iyang gitunol ang iyang kamot ngadto kang Josh. “Tana”, siya miingon. “Aduna pa kitay dugang nga laktunon.” ■

*Ang tagsulat nagpuyo sa Utah, USA.*







Sa unsang paagi nga ang inyong kinabuhi lahi kay sa kinabuhi sa mga unang pioneer? Sa unsang paagi kini managsama ra?

# IPUNTING ANG INYONG MGA MATA DIHA SA BAYBAYON

Ni Richard M. Romney

Mga Magasin sa Simbahan

Ang pagbiyahe gamit ang bangka ngadto sa usa ka isla sa usa ka duol nga national park ingon og maoy hingpit nga oportunidad nga mas maduol sa akong anak nga lalaki. Ang mga lider sa Aaronic Priesthood ug sa batanong mga lalaki sa among ward nagplano sa maong biyahe sulod na sa pipila ka bulan, ug nakahimo ko sa pagkuyog kanila.


Maayo ang kondisyon sa panglawas sa akong anak lalaki nga si McKay, nag-apil sa tulo ka sport sa high school. Mao tingali kana ang usa ka rason nga ang mga lider mibutang kanamo sa sama nga bangka—nasayud sila nga makabugsay siya og kusog kon gikinahanglan. Aduna akoy kasinatian sa paggiya og bangka, mao nga ingon og maayo kami nga team.

Naghinam-hinam usab ako nga adunay higayon diha sa lawa aron makig-istorya. Si McKay nakasinati og daghang problema sukad namatay ang iyang inahan, ug wala ko kanunay makaresponde sa pinakamaayong paagi sa iyang mga panginahanglan ug mga interes.

Aduna kami pagbansay, aduna kami mga life vest, kahibalo mi molangoy, ug sinati ang among mga lider nga naggiya kanamo.

Ang wala namo mapangandami mao ang hangin. Nakabugsay na kami og pipila ka kilometro, dayon mitabok sa tunga-tunga sa lawa ug nagkaduol na sa baybayon sa dihang dili kasarangang kusog nga hangin ang misugat kanamo.

Ang ubang mga bangka nakaabot gyud sa baybayon, apan si McKay ug ako anaa sa katapusang bangka. Nagkadagko ang mga balud,



*Ang akong anak nga lalaki mitudlo kanako og gamhanan nga leksyon mahitungod sa kon asa motan-aw ug unsaon sa paglahutay.*

ug natipas mi sa among padulngan samtang padayon kami nga nagbugsay, naningkamot sa paghimo og bisan unsa nga pag-uswag sa unahan. Misugod ko sa pagkaluya ug nakulbaan. Mikabya ko ngadto sa tubig gamit ang tanan kong kusog, naningkamot sa paggiya sa bangka nga mabalik ngadto sa saktong padulngan, apan daw nagpabilin kami diha sa among nahimutangan.

Nameligro kami nga matikyaob sa dihang sa katapusan miangkon ko sa pagsulti nga wala ko masayud kon aduna pa ba koy kusog sa pagpadayon. Dayon miingon ang akong anak, “Nagtan-aw ka sa mga balud, Pa. Wala tay padulngan kon mao na ang imong buhaton. Kinahanglang ipunting nimo ang imong mga mata diha sa baybayon. Nakakita ka anang kahoy sa bungtod? Mao kana ang atong tumong. Pag-focus niana, ug maluwas ra ta ani.”

Sakto gayud siya. Sa dihang nag-focus na ko sa kahoy, makagiya ko ngadto sa among padulngan. Ang akong mga bukton mibati og bag-ong kusog. Si McKay mimando sa among pagbugsay—“Bira. Pahulay. Bira. Pahulay.” Ug sa hinay-hinay, miuswag mi.

Miabut mi sa baybayon, ang uban miduol aron sa pagtabang, ug milingkod mi ug mipakalma sa among pagginghawa. Nianang gabii sulod sa among tolda nag-istorya mi, amahan ug anak, mahitungod sa among kasinatian.

Manag-uban, among nahinumduman unsay gitudlo ni Presidente Thomas S. Monson kabahin sa parola sa Ginoo: “Kini nagbanwag tadlas sa mga unos sa kinabuhi. Kini nagtawag, ‘Dinhi ang dalan paingon sa kaluwasan; dinhi ang dalan paingon sa panimalay.’”<sup>1</sup>

Nianang hapon, usa ka kahoy didto sa baybayon maoy among parola. Sa dihang hapit na ko mawad-i sa paglaum, ang akong anak nga lalaki maalamong mitambag kanako nga dili motan-aw sa mga balud apan sa pagpunting sa akong mga mata ngadto sa baybayon. Ug nagtinabangay kami, sa daghang mga paagi. ■

## MUBO NGA SULAT

1. Thomas S. Monson, “Standards of Strength,” *New Era*, Okt. 2008, 2.



PAGHULAGWAY PINAAGI NI ROBERT T. BARRETT

## **PRESIDENTE THOMAS S. MONSON**

Sa dihang bata pa siya, si **Thomas S. Monson** nagbuhi og mga koneho ug **mga pati**. Nailhan sa iyang kamabination, gihatag niya ang iyang **pinanggag mga koneho** ngadto sa usa ka pamilya kinsa nagkinahanglan og pagkaon sa Thanksgiving ug ang iyang **tren-tren nga sakyanan** sa usa ka batang lalaki kinsa walay regalo sa Pasko. Sa iyang pagdako, siya nagtrabaho sa negosyo sa pamantalaan alang sa **Deseret News**. Isip usa ka Apostol, siya miorganisar sa unang stake sa East Germany ug nakakuha og pagtugot alang sa Simbahan sa pagtukod sa **Templo sa Freiberg Germany**. Si Presidente Monson mitawag sa tanang mga miyembro sa Simbahan sa pagluwas niadtong nagkinahanglan og tabang.

# Anaa Usab Niini nga Isyu

## PARA SA MGA YOUNG ADULT



### PAGKAHIMONG

Hingpit diha kang Kristo

p. 42

Ang pagsabut sa libreng gihatag nga matubsa-nong gugma sa Manluluwas makapalingkawas kanato gikan sa sayop ug dili tinud-anay nga pagdahum kon unsa ang kahingpitan.

## PARA SA MGA KABATAN-ONAN



p. 48

### BALAANG MGA PAKIGSAAD MAKAHIMO OG LIG-ONG MGA KRISTIYANO

Sa unsang paagi nga ang atong mga pakigsaad sa Dios makahatag kanato og kalig-on? Ania ang tulo ka mga paagi.

## PARA SA MGA BATA

### Ang Akong Leksyon kabahin sa Hugot nga Pagtuo

Si Emma mipatubo og mga melon aron pagtudlo sa iyang pamilya kabahin sa hugot nga pagtuo.



p. 67